

स्वर्ण संग्रह

शुभ भावाँ

एवं

गीत

स्वर्ण संग्रह

शुभ भावों एवं गीत

वर्षी-तप के उपलक्ष में
सद् भाव भेंट

श्रीमती मोहनी बाई डागा


नं: ३, टेलर एस्टेट दूसरी गली

कोडम्बाकम मद्रास -६०००२४.

१९९०-९२



प्रेरणा १००८ श्री रतन मुनिजी



स्वर्गीय श्री केवलचन्दजी डागा श्रीमती मोहनी बाई डागा

ॐ श्री शान्तिनाथाय नमः

चौबीस तीर्थकरों के माता-पिताओं का नाम

तर्ज : जेठ कूटे चूरमो देवरजी रादे दाल ।

नाभिराज पिता ने, मोरा देवी जी माय, वनिता नगरी का वन्दुं ऋषम जिनराज ॥१॥ जितशत्रु राजा पिता ने, विजया देवीजी माय, अयोध्या नगरी का वन्दुं अजित जिनराज ॥२॥ जितारथ राजा पिता ने, सेना देवीजी माय, सावत्यी नगरी का वन्दुं संभव जिनराज ॥३॥ संवर राजा पिता ने, सिद्धार्था देवीजी माय, वनिता नगरी का वन्दुं, अभिनन्दन जिनराज ॥४॥ मेघरथ राजा पिता ने, मंगलादेवीजी मांय, कोशलपुर नगरी का वन्दुं सुमति जिनराज ॥५॥ श्रीधर राजा पिता ने, सुषमा देवीजी माय, कोशम्बी नगरी का वन्दुं पद्मप्रभु जिनराज ॥६॥ प्रथिष्ठ राजा पिता ने, पृथ्वी देवीजी माय, बणारसी नगरी का वन्दुं सुपाश्वर्ज जिनराज ॥७॥ मासेन राजा पिता ने, लक्ष्मा देवी जी माय, चन्द्रापुरी नगरी का वन्दुं चन्द्रप्रभु जिनराज ॥८॥ सुग्रीव राजा पिता ने, रामादेवीजी माय, काकंदी नगरी

का वन्दुं सुविधि जिनराज ॥९॥ दृढरथ राजा पिता ने,
 नन्दा देवीजी मांय, भद्विलपुर नगरी का वन्दुं शीतल
 जिनराज ॥१०॥ विष्णु राजा पिता ने, विष्णु देवीजी
 माय, सिंहपुर नगरी का वन्दुं श्रेयांस जिनराज ॥११॥
 वसु राजा पिता ने, जया देवीजी माय, चंपापुर नगरी
 का वन्दुं वासपूज्य जिनराज ॥१२॥ कृतवर्म राजा
 पिता ने श्यामा देवीजी माय, कम्पिल पुर नगरी का
 वन्दुं विमल जिनराज ॥१३॥ सिंहसेन राजा पिता ने,
 सुयशा देवीजी मांय, अयोध्या नगरी का वन्दुं अनन्त
 जिनराय ॥१४॥ भानु राजा पिता ने, भद्रा देवीजी
 माय, रत्नपुरी नगरी का वन्दुं धर्म जिनराज ॥१५॥
 विश्वसेन राजा पिता ने, अचला श्री देवीजी माय,
 हस्तिनापुर नगरी का वन्दुं शान्ति जिनराज ॥१६॥
 सूर राजा पिता ने, श्री देवी जी माय, गजपुर नगरी का
 वन्दुं कुन्धु जिनराज ॥१७॥ सुदर्शन राजा पिता ने,
 देवीराणी जी माय, हस्तिनापुर नगरी का वन्दुं अरह
 जिनराय ॥१८॥ कुंभ राजा पिता ने, प्रभावती देवीजी
 माय, मिथिला नगरी का वन्दुं मल्लि जिनराज ॥१९॥
 सुमित्र राजा पिता ने, पद्मावती जी माय, राजग्रही
 नगरी का वन्दुं, मुनिसुव्रत जिनराज ॥२०॥ विजय
 राजा पिता ने, विप्रादेवीजी माय, मथुरा नगरी का
 वन्दुं नमि जिनराज ॥२१॥ समुद्र राजा पिता ने,

सेवादेवीजी माय, सोरियपुर नगरी का वन्दुं, अरिष्टनेमी
जिनराज ॥२२॥ अश्वसेन राजा पिता ने, वामादेवीजी
माय, बनारसी नगरी का वन्दुं पार्श्व जिनराज ॥२३॥
सिद्धारथ राजा पिता ने. त्रिशला देवीजी माय, कुंडलपुर
नगरी का वन्दुं, महावीर जिनराज ॥२४॥ केवलचन्दजी
पिता ने. हुलताबाई माय, भोपाल शहर का वन्दुं, पूज्य
अमोलक ऋषिजी महाराज ॥२५॥

चउदे म्पन

(तर्ज : दस लक्षण साधु तणो, मारव्या श्री भगवान)

दसमा स्वर्ग थकी चवीयाजी, चौवीसमा जिनराज ।
चउदे सपना देखियाजी, त्रिशला दे ज्यांरी मांय ॥
जिनंद माय, दीठाओ सपना सार ॥१॥
पहले गयधर देखियाजी, सूंडा--दण्ड, प्रचण्ड ।
दूजे ऋषभ देखियाजी, घोला धवरी सांडो ॥जिनंद॥२॥
तीजे सिंह सुलक्षणाजी, मुखसुं करे रे बगास ।
चौथे लक्ष्मीदेवताजी, कर रह्या लील विलाल ॥जि. ३॥
पंच वरण फूलां तणीजी, मोटी देखी फूल माल ।
छट्ठे चन्द्र उजासियाजी, अमिय झरे आकाश ॥जि. ४॥
दितकर ऊग्यो तेजसूजी, किरणा झाक झमाल ।
फरकती देखी ध्वजाजी, ऊंची अति असराल ॥जि. ५॥

कुंभ कलश रत्ना जड़योजी, उदक भर्यो सुविशाल ।
 कमल फूलां को ढाकनोजी, नवमो स्वपन रसाल ॥जि. ६॥
 पद्म सरोवर जल भरयो जी, कमल करी शोभाय ।
 देव-देवी रंग में रमेजी, देख्या आवे दाय ॥जि. ७॥
 क्षीर समुद्र चारों दिशाजी, जेनो मीठो नीर ।
 दूध जैसो पानी भरयो जी, तिन रो कोई न पार ॥जि. ८॥
 मोत्यां केरा झूमका जी, देख्या देव विमान ।
 देव-देवी कौतुक करेजी, आवता आसमान ॥जि. ९॥
 रत्नांरी राशि निर्मलीजी, देख्यो स्वपन उदार ।
 स्वपनो देख्यो तेरमो जी, हियड़े हर्ष अपार ॥जि. १०॥
 ज्वाला देखी दीपतीजी, अग्नि शिखा बहुतेज ।
 इतने जाग्या पद्मिनीजी, धरता स्वपना से हेत ॥जि. ११॥
 गजगति चाल्या मलकताजी, आया राजाजी रेपास ।
 भद्रासन आसन दियोजो, स्वामी पूछे हुल्लास ॥जि. १२॥
 कहो किन कारण आवियाजी, कहो थारा मननी बात ।
 चवदा सपना देखियाजी, अर्थ कहो साक्षात ॥जि. १३॥
 स्वपना सुन राया हर्षियाजी, कीनो स्वपन विचार ।
 तीर्थकर चक्रवर्ती होवसीजी, तीन लोक आधार ॥जि. १४॥
 प्रभाते पंडित तेडियाजी, करनो स्वपन विचार ।
 तीर्थकर चक्रवर्ती होवसीजी, तीन लोक आधार ॥जि. १५॥
 पंडित ने बहु धन दियोजी, वस्त्र ने फूल-माल ।
 गर्भवास पूरा थया जद, जनम्या पुण्यवंतबाल ॥१६॥

चौसठ इन्द्र आवियाजी, छप्पन दिशा कुमार ।
 असूचि कर्म निवारनेजी, गावे मंगलाचार ॥१७॥
 प्रतिबिम्ब पास में धरियोजी, माता ने विश्वास ।
 शकेन्द्र लीधा हाथ में जी, पंचरूप प्रकाश ॥जि. १८॥
 मेरु शिखर न्हवरावियाजी, तेहनो बहु विस्तार ।
 इन्द्रादिक सुर नाचियाजी, नाचे अप्सरा नार ॥जि. १९॥
 अठई महोत्सव सुर करेजी, द्वीप नन्दीश्वर जाय ।
 गुण गावे प्रभुजी तणांजी, हियड़े हर्ष न जाय ॥जि. २०॥
 प्रभाते जो स्वप्नो भणेजी, भणता आनन्द थाय ।
 रोग-शोक दूरा टलेजी, अशुभ कर्म सब जाय ॥जि. २१॥

॥ हथणी ॥

(तर्ज-हथणी सिनगारो के देव पूतलियां)

हथणी सिनगारो के देव विराजिया ॥टेरा॥
 आदिनाथ करे रे नमस्कार, मोरादेवीजी मायडिया ॥१॥
 हथणी सिनगारो के देव विराजिया ।
 शान्तिनाथजी करे रे नमस्कार, अचलादेवीजी मा. ॥२॥
 हथणी सिनगारो के देव विराजिया ।
 नेमीनाथजी करे रे नमस्कार, सेवादेवीजी मा. ॥२॥
 हथणी सिनगारो के देव विराजिया ।
 पार्श्वनाथ करे रे नमस्कार, वामादेवीजी मा. ॥४॥

हथणी सिनगारो के देव विराजिया ।

महावीर करे रे नमस्कार, त्रिशलादेवीजी मा. ॥५॥

हथणी सिनगारो के देव विराजिया ।

गौतमस्वामीजी करे रे नमस्कार, पृथ्वीदेवीजी मा. ॥६॥

हथणी सिनगारो के देव विराजिया ।

छोटा-मोटा करे रे नमस्कार, आप-आपरी मा. ॥७॥

॥ झालर ॥

(तज-झालर को झणको में सुन्योजी)

झालर को झणको में सुन्योजी कांई, नगरी वनिता री पोल । वनिता में आदिनाथ जनमियोजी कांई, माता मरुदेवीजी रा नंद ॥१॥ झालर को झणको में सुन्योजी कांई, नगरी हस्तिनापुर री पोल । हस्तिनापुर में शान्तिनाथ जनमियोजी कांई, माता अचलादेवीजी रा नंद ॥२॥ झालर को झणको में सुन्योजी कांई, नगरी सोरियापुर री पोल । सोरियापुर में नेमीनाथ जनमियोजी कांई, माता शिवादेवीजी रा नंद ॥३॥ झालर को झणको में सुन्योजी कांई, नगरी बणारसी री पोल । बणारसी में पार्श्वनाथ जनमियोजी कांई, माता वामादेवीजी रा नन्द ॥४॥ झालर रो झणको में सुन्योजी कांई, नगरी कुण्डलपुर री पोल । कुण्डलपुर

में महावीर जनमियोजी काई, माता त्रिशलादेवीजी
 रा नन्द ॥५॥ झालर रो झनको में सुनयोजी काई
 नगरी गोवर ग्राम री पोल । गोवर ग्राम में गौतम
 स्वामी जनमियोजी काई, माता पृथ्वीदेवीजी रा नन्द
 ॥६॥ झालर को झनको में सुन्योजी काई, सिकन्द्राबाद
 री पोल । जटे तो जिनरा पुत्र-पुत्री जनमियाजी काई,
 लेवोनी प्रभुजी रो नाम ॥७॥

॥ तारा ॥

(तर्ज-माहरा बाला वाहन जोतो)

माहरा बाला रे वाहन जोतो, प्रभातियो तारो ऊगियो ।
 तारो ऊगियो वनिता री पोल, जठे आदिनाथ जनमिया । १।
 माहरा बाला रे वाहन जोतो, प्रभातियो तारो ऊगियो ।
 तारो ऊगियो हस्तिनापुर री पोल, जठे शान्तिनाथ ज. ॥२॥
 माहरा बाला रे वाहन जोतो, प्रभातियो तारो ऊगियो ।
 तारो ऊगियो सोरियापुर री पोल, जठे नेमीनाथ ज. ॥३॥
 माहरा बाला रे वाहन जोतो, प्रभातियो तारा ऊगियो ।
 तारो ऊगियो बणारसी री पोल, जठे पार्श्वनाथ ज. ॥४॥
 माहरा बाला रे वाहन जोतो, प्रभातियो तारो ऊगियो ।
 तारो ऊगियो कुंडलपुर री पोल, जठे महावीर स्वामी ज. ॥

माहरा बाला रे वाहन जोतो, प्रभातियो तारो ऊगियो ।
 तारो ऊगियो गोवर-ग्राम रीपोल, जठे गौतमस्वामीजी ज. ।
 आदिनाथजी मोटा देव, जहाँ धर्म प्रकाशिया ।
 शान्तिनाथजी मोटा देव, जहाँ शान्ति वरताविया ।
 नेमिनाथजी मोटा देव, जहाँ पशुव छुड़ाविया ।
 पार्श्वनाथजी मोटा देव, जहाँ कमठ हटाविया ।
 महावीर स्वामीजी मोटा देव, जहाँ मेरु कपाया ।
 गौतम स्वामीजी मोटा देव, जहाँ प्रशन पूछिया ।

॥ दीपक ॥

(तर्ज-पोर पाछ लडी रात, उज्जले लक्ष्मी)

पहर पाछलडी रात, घर जोइये लक्ष्मी दीवलो ।
 दिवलो थारो वनितापुरी में टांग, जठे आदिनाथ जनमिया
 आदिनाथजी मोठा देव, जो धर्म प्रकाशियाजी ॥१॥
 दिवलो थारो हस्तिनापुर में टांग, जठे शान्तिनाथजी ज.
 शान्तिनाथजी मोटा देव, जो शान्ति वरतावियाजी ।
 दिवलो थारो सोरियापुर में टांग, जठे नेमिनाथजी ज.
 नेमिनाथजी मोटा देव, जो पशुव छुड़ावियाजी ।
 दिवलो थारो बणारसी में टांग, जठे पार्श्वनाथजी जन.
 पार्श्वनाथजी मोटा देव, जो कमठ हटावियाजी ।
 दिवलो थारो कुंडलपुर में टांग, जठे महावीर स्वामी ज.
 महावीर स्वामी मोटा देव, जो मेरु कपायियाजी ।

दिवलो थारो गोवर ग्राम में टांग, जठे गौतमस्वामीजी ज.
गौतमस्वामीजी मोटा देव, जो परशन पूछियाजी ।

॥ सूरज ॥

(तर्ज : डंगरिया री खिड़कियो राज)

निषद पर्वत रे ऊचां ओ रात सूरज भल ऊगिया,
केवल पाया आदिनाथ देव, जिन धर्म प्रकाशिया,
केवल पाया शान्तिनाथ देव, शान्ति वरताविया ।
केवल पाया नेमिनाथ देव, पशुव छुडाविया ।
केवल पाया पार्श्वनाथ देव, नाग-नागनी बचाविया ।
केवल पाया महावीर स्वामी देव, मेरु कंपाविया ।
केवल पाया गौतम स्वामी देव, परशन पूछिया ।
पोढ़या जागो वींद राजा ओ राज सूरज भल ऊगिया ।
थे तो लेवो अरिहंत रा नाम, सूरज भल ऊगिया ।
थे तो लेवो थारा माता-पिता रा नाम, सूरज भल ऊगिया ।

॥ दांतुण ॥

(तर्ज : उठो नेमीश्वर राज करली, दांतणियां)

उठो नेमीश्वर राज करलो दांतणियां,
काई जल भर जारी ओ राज दांतुण केला रो ॥
उठो नेमीश्वर राज करलो कलेवो,
पीणां तो रोटी ओ राज लचको लूणी को ॥

उठो नेमीश्वर राज कर लो जिमणियां,
 लाडू तो पेड़ा ओ राज सरस जलेबियां ॥
 उठो नेमीश्वर राज करलो मूचणियां,
 काई लूंग सुपारी ओ राज डोडा एलची ॥
 उठो नेमीश्वर राज करलो दोपहरी,
 कच्चा तो खोपरा ओ राज, गुंजा मिश्री का ॥
 उठो नेमीश्वर राज, करलो ब्यालूडो,
 काई पतला तो फलका ओ राज, दालज उड़दां की ॥
 उठो नेमीश्वर राज, करलो पोढ़णियां,
 काई हिंगलु तो डोलया ओ राज सेजां सावटो ॥
 उठो नेमीश्वर राज, करलो सिनगारो,
 काई केसरिया जामो ओ राज कसुमल पेचो है ॥
 उठो नेमीश्वर राज, करलो तिलकिया,
 काई काजल कुंकुंओ राज चोखा चांवलिया ॥
 उठो नेमीश्वर राज परण पधारजो,
 काई परण पधारो ओ राज, उग्रसेनजी री पोल ॥
 करुणा दिल आणी ओ राज, पाछा फिर गया,
 संजम लीना ओ राज, राजुल ने त्यागिया ॥

• • •

॥ वीरा ॥

(तंत्र : में थाने पूछूं माहरा वीरा वितजारा)

में थाने पूछूं माहरा वीराओ व्यापारी तो, वीरा ओ
व्यापारी तो । कित्सा रे मारग होय आवियाजी ॥१॥
जहाज में नहीं आया ये बाई, एरोपलेन में नहीं
आया तो, रेल-मोटर मांही आवियाजी ॥२॥
चोवटियो तो रुंद्यो माहरो, वीरा ओ व्यापारी तो २,
सेरियां वीरा री मोटरांजी ॥३॥
पोलिया तो रुंदी साहरी भावज ओ चूडावाली २,
कंवर भतीजा गोखामेजी ॥४॥
रसोइयां तो रुंदी माहरी बहन नूडावाली २,
कंवर भाणेजा पालणेजी ॥५॥
उजला-उजला कपडा थे, पेहरो जामण जाया तो २,
लोग जाने ओ वीरा ऊजलोजी ॥६॥
डोरा ओ कंठी थे, पेहरो जामण जाया तो २,
लोग जाने ओ वीरा लखपतिजी ॥७॥
लचपच लापसडी, ललोल जामण जायी तो २,
लोग जाणे ओ वीरा रसभरयोजी ॥८॥
पान सुपारो थे, चाबो जामण जाया तो २,
लोग जाने ओ वीरा रंग भरयोजी ॥९॥

पंचरंग पेचो वीरा, सुसरा-सारे बंधाओ तो २,
 सासुजी रे साड़ी बनारसीजी ॥१०॥
 पंचरंग पेचो वीरा, जेठ-सारे बंधाओ तो २,
 दिवर जिठानी रे पोमचाजी ॥११॥
 पिलिधा रे वेश वीरा, ननन्दल ने पहिरावो तो २,
 पंचरंग ननंदोयां रे मोलियाजी ॥१२॥
 पांचो ही कपड़ा वीरा, बहनोई सारे लावो तो २,
 बहिन रे बाली चूंदड़ीजी ॥१३॥

॥ राजुल री चूंदड़ी ॥

(तर्ज : रंगाइजो नेमोइवर चूंदड़ीजी)

ए कुण जी चूंदड़ी मोलवेजी, ए कुण जी खर्चैला
 दाम, रंगाइजो नेमजी चूंदड़ीजी ॥१॥
 समुद्र विजयजी चूंदड़ मोलवेजी, उग्रसेनजी खर्चैला
 दाम, रंगाइजो नेमजी चूंदड़ीजी ॥२॥
 ओढ़ पहरनने राजुल नीसरीजी, गया है द्वारिका री
 पोल, रंगाइजो नेमजी चूंदड़ीजी ॥३॥
 चार सज्जन मिल पूछियाजी, किण सज्जन री आ
 दीव के, रंगाइजो नेमजी चूंदड़ीजी ॥४॥
 उग्रसेन राजा री दीकरी जी, कंस राजा री बेन,
 रंगाइजो नेमजी चूंदड़ीजी ॥५॥

समुद्र विजयजी री कुल बहुजी, नेनडिया नेमनाथजी
 री नार, रंगाइजो नेमजी चूंदड़ीजी ॥६॥
 राजुल संयम आदर्योजी, पहुँची है मुक्ति मझार,
 रंगाइजो नेमजी चूंदड़ीजी ॥७॥ इति ॥

॥ राजुल की मेहन्दी ॥

(तर्ज-कठोडे मेहदी नीपजे नेमजी)

कठो रे मेहन्दी नीपजे नेमजी कठो रे खरीदन
 वाला मेहन्दी रंग राती ॥टेरा॥ मथुरा में मेहन्दी नीपजे
 नेसजी, सोरियापुर में खरीदन वाला नेमजी ॥१॥
 उग्रसेनजी मेहन्दी मोलवे नेमजी, समुद्रविजयजी खर्चला
 दाम नेमजी ॥२॥ रत्न कठोरयां में ओलसी नेमजी,
 भोजायं मांडेला हाथ राजुल रा साधबा नेमजी ॥३॥
 मेहन्दी लगाय ने राजुल नीसरया नेमजी, लीनो है
 संजम भार, सती मुगती सिधाविया नेमजी ॥४॥

॥ केसर ॥

(तर्ज-केसर मंगाइदो मूंगा मोलरी)

केसर मंगाइदो मूंगा मोलरी ॥टेरा॥ कठोडे केसर
 नीपजे, कठोडे खरीदन वाला ए संगवीए, केसर
 मंगाइदो मूंगा मोलरी ॥१॥ वनिता में केसर नीपजे,

हस्तिनापुर में खरीदन वाला ए संगवीए, केसर मंगाइदो मूंगा मोलरी ॥२॥ ए कुण जी केसर मोलवे, ए कुण जी खर्चैला दाम ए संगवीए, केसर मंगाइदो मूंगा मोलरी ॥३॥ नाभि राजाजी केसर मोलवे, विश्वसेन राजा खर्चैला दाम ए संगवीए, केसर मंगाइदो मूंगा मोलरी ॥४॥ ए कुण जी केसर घोटसी, ए कुण जी रालेला दूध ए संगवीए, केसर मंगाइदो मूंगा मोलरी ॥५॥ समुद्रविजयजी केसर घोटसी, सेवादेवीजी रालेला दूध ए संगवीए, केसर मंगाइदो मूंगा मोलरी ॥६॥ कीनाजी रा करसां ओ घेरा छांटना, कीनाजी रे चूदडियां घेरो, रंग ए संगवीए, केसर मंगाइदो मूंगा मोलरी ॥७॥ नेमीश्वरजी रे करसां ओ घेरा छांटना, राजुल रे चुन्दडियां घेरो, रंग ए संगवीए केसर मंगाइदो मूंगा मोलरी ॥८॥ आनन्द ऋषिजी मारासा रे करणां ओ घेरा छांटना, कल्याण ऋषिजी मारासा रे करसां ओ घेरा छांटना भानुऋषिजी मारासा रे चदरां घेरो रंग ए संगवीए, केसर मंगाइदो मूंगा मोलरी ॥९॥ नन्दकुँवरजी मारासा रे करसां ओ घेरा छांटना, साधरकँवरजी मारासा रे चदरां घेरो रंग ए संगवीए, केसर मंगाइदो मूंगा मोलरी ॥१०॥ श्री संघरे करसां ओ घेरा छांटना, बानां रे चुन्दडियां घेरो रंग ए संगवी ए केसर मंगाइदो मूंगा मोलरी ॥११॥ इति ॥

॥ बधाओ ॥

(तर्ज-ऊंची ऊंची मेड़िया शोभंती)

ऊंची-ऊंची मेड़िया शोभंती बधाओ जी, कांई दिवका रो उद्योत के राज बधाओ जी ॥१॥ हिगलु तो डोलयो डल रह्यो बधाओ जी, कांई कोमल बिछाई है, सेज के राज बधाओजी ॥२॥ जठे माता त्रिशला देवी पोढ़िया बधाओ जी, कांई सयना लिया दस चार के राज बधाओ जी ॥३॥ पहला गयधर देखिपा बधाओ जी, कांई दीठा है राज दरबार के राज बधाओ जी ॥४॥ दूजे ऋषभ सुलक्षणों बधाओ जी, कांई दीठा है गाय गवाल के राज बधाओजी ॥५॥ तीजे सिंह सुलक्षणों बधाओ जी, कांई वन मायें करे रे किलोल के राज बधाओजी ॥६॥ चौथे लक्ष्मी देवता बधाओ जी कांई सदा रे सवागण नार के राज बधाओ जी ॥७॥ पांचमी माला मलकंती बधाओ जी, कांई पांच वरण री होय के राज बधाओ जी ॥८॥ छठे चन्द्र सभी बधाओ जी ॥९॥ सातमों सूरज ऊगियो बधाओ जी, कांई सहस्र किरणां को राय के राज बधाओ जी ॥१०॥ आठमी ध्वजा फरकंती बधाओ जी, कांई सदा रे धर्म की लेर के राज बधाओ जी ॥११॥ नवमों कलश

रत्नां जड़ियो बधाओ जी, काई भरयो सम्पूर्ण होय के
 राज बधाओ जी ॥१२॥ पद्म सरोवर स्वामी दसमां
 बधाओ जी, काई कमल भरयो तिन मांय के राज
 बधाओ जी ॥१३॥ क्षीर समुद्र ग्यारहमां बधाओ जी,
 काई क्षीर को जैसो नीर के राज बधाओ जी ॥१४॥
 देव विमान बारहमां बधाओ जी, काई रुणझुण घंटा
 बाजे के राज बधाओ जी, रत्नारी राशि तेरमां बधाओ
 जी, काई रत्नां सु भरया भंडार के राज बधाओ जी
 ॥१६॥ अग्नि दीठा स्वामी दशमा बधाओ जी, काई
 झाल जपंति लेर के राज बधाओ जी ॥१७॥ चउदे तो
 रानी सपना देखिया बधाओ जी काई गया राजाजी
 के पास के राज बधाओ जी ॥१८॥ भद्रासन दियो बैठ
 नो बधाओ जी, काई दीनों घणो सन्मान के राज
 बधाओ जी ॥१९॥ तीर्थकर, चक्रवर्ति जन्मसी बधाओ
 जी, काई तीन भवन रा नाथ के राज बधाओजी ॥२०॥
 चैत्र सुदी तेरस ने जनमिया बधाओ जी काई छुप्पन
 कुमारियां मंगल गाया के राज बधाओजी ॥२१॥ चौंसठ
 इन्द्र मिल आविया बधाओ जी, काई मेरु शिखर नवाय
 के राज बधाओ जी ॥२२॥ महावीर नाम स्थापन
 कीनो बधाओ जी, काई मेल्या माताजी रे पास के राज
 बधाओ जी ॥२३॥ प्रभुजी तो संयम आदरया बधाओ

जी, काँई शासन रा सिरदार के राज बधाओजी ॥२४॥
 गावतडा सुख ऊपजे बधाओ जी, काँई सुणियां रो
 परम कल्याण के राज बधाओ जी ॥२५॥ थे तो
 गावोनी मंगल चार के राज बधाओ जी काँई होसी
 जय-जय कार के राज बधाओ जी ॥२६॥

॥ पतासा ॥

(तंत्र : छोटी वय में दिशा धारी, हुआ पाँड़न भारी)

त्रिशलादेवीजी रो आयो ने बुलावो, जब हुई तैयारी,
 पतासा दे देना, दे देना ॥१॥ ज्ञान भी देना, ध्यान
 भी देना, तपस्या देवो पचखाय ॥ पतासा दे देना, दे
 देना ॥२॥ सूत्र भी लाई, चौपाधियाँ भी लाई, माला
 लायी दोय चार ॥३॥ काम छोड़ स्थानक में आई,
 सामयिक दोय चार ॥४॥ भायां भी आया, बायां भी
 आई, वन्दना करूं बारम्बार ॥५॥ मंगलीक देवो
 पचखान करावो, दर्शन करां बारम्बार ॥६॥ इति ॥

॥ यिनोदिक गीत ॥

(तंत्र : कातो आयो मेढ़ना ने उतरयो ए रंग भगव)

कीर्ति पसरौ देश में जी, पसरौ परदेश मांय ।
 केसरिया तिलका शान्ति लालजी, आवोनी घर मांय ॥१॥
 जाऊं-जाऊं काँई करो थे, बैठोनी जाजम बिछाय ।

जीमोनी चावल दाल, तपस्या वाला रा कोड़ करने
रेवोनी दिन चार ॥२॥इति॥

॥ गुल का गीत ॥

(तर्ज : गाढ़ा भर गुल लाविया, रस मेवारो)

बाजारां में गुल आवियो रस मेवारो । जाय
बाबूलालजी खरीदियो रस मेवारो ॥१॥ व्याणसारो
बुढापो आवियो वाने गुलरो सीरो जिमावजो रस
मेवारो ॥२॥ वानी बाटकी रामचन्दजी ले गया रस
मेवारो ॥३॥ ये लारे पद्माबाई दौड़िया रस मेवारो ॥४॥
बादीजो रो सीरो मत खावजो रस मेवारो ॥५॥
दादीजी री मत दुःखजो आखियां रस मेवारो ॥६॥
वानी बुढापो सेवा करो रस मेवारो ॥७॥ ये तो जाय
ने सब पग पड्या रस मेवारो ॥८॥इति॥

॥ चौबीसी ॥

(तर्ज : पहला वन्दुजी श्री ऋषम जिनेश)

पहला वन्दुंजी श्री ऋषम जिनेश, दूजा अजितनाथ
वंदस्यां । कर जोडीजी प्रभुजी ने लांगुजी पाय, स्वामी
सुनोजी माहरी विनंती, धर्म सुनोजी माहरी विनन्ती ॥

नोट : इसी तरह चौबीस तीर्थंकरों का नाम लेना चाहिये ।

॥ चौदह स्वप्न ॥

(पहली ढाल, तर्ज : शारद माता नमूं सिरनामो)

नमूंजी शारद नाम तुम्हारा, अक्षर ज्ञान देवो मुझ
सारो ॥१॥ चौदह सपना त्रिशलादेवी ने देह्या, इन
सपनां रो करोनी विचारो ॥२॥ सोवन पलंग पोड्या
पटराणी, सपना देह्या इण विध जानी ॥३॥ पहला
गयवर दन्ताजी देह्या, दूजे ऋषभ घूघरू माल घंटा
बाजन्ता ॥४॥ तीजे सिंह सुलक्षणोजी, वन खण्ड माय
फिरे रे अकेलो ॥५॥ चौथे दीठा लक्ष्मी, ओस्वामी मलकंती
माता रो चाल सुहावे ॥६॥ पांचमो पंच वर्ण की माला,
कमल फूलांरी मालजी दीठी ॥७॥ छट्ठे सपना चन्द्र
जो देखी, अमिय झरंता दीठाओ स्वामी ॥८॥ सातमो
सूरज देह्या ओ स्वामी, सहस्र किरण रा दिनराज
विराजे ॥९॥ आठमो दीठा ध्वजा ओ स्वामी चारों
दिशां में लेरांजी लेवे ॥१०॥ नवमां सपना दीठा ओ
स्वामी, कुंभ कलश गल फूलांरी माला ॥११॥ पद्य
सरोवर देह्या ओ स्वामी, कमल भरयो तिण मांय ॥१२॥
क्षीर समुद्र देह्या ओ स्वामी, क्षीर को जैसो नीर ओ
स्वामी ॥१३॥ देवविमानिक दीठा ओ स्वामी, रुण-
झुण घंटा बाजे ॥१४॥ रत्नांरी राशि दीठा ओ स्वामी,

सपना तेरहमो भलाय विराजे ॥१५॥ चौदह सपना
 अग्नि जो देखी, धूम्र रहित शोभे ओ स्वामी ॥१६॥
 पोड्या राणी जाग्या ओ स्वामी, आया राजाजी रे
 पास ॥१७॥ भद्रासन बैठाय ओ स्वामी, सपना रो अर्थ
 बतायो ॥१८॥

॥ दुसरी ढाल ॥

(तर्ज : गज सायना रानी थे दीठाजी)

जठे राजाजी पंडित ने तेड़ावियाणी, जठे पंडित
 आया ततकाल । बोले अमृत वाणियाजी ॥१॥ मलकंता
 मंगल रानी थे दीठाजी, थारे होसी जी मंगला चार,
 बधाओ घर गावसीजी ॥२॥ गजवर सपना रानी थे
 दीठाजी, थारे पुत्र होसीजी गजवंत, गजवर ऊपर
 सोवसीजी ॥३॥ वृषभ सपना रानी थे दीठाजी, थारे
 पुत्र होसीजी रक्षावन्त, घणी रक्षा पालसीजी ॥४॥
 सिंह सपना रानी थे दीठाजी, थारे पुत्र होसीजी बलवंत,
 मेह कंपावसीजी ॥५॥ लक्ष्मी रो सपना रानी थे
 दीठाजी, थारे अन्नधन भरया रे भण्डार । दूनी रिद्धी
 होवसीजी ॥६॥ पंच वर्ण री माला रानी थे दीठाजी,
 थारे पुत्र होसीजी शील सुजान, पांचों इन्द्रियां वश
 करसीजी ॥७॥ अमिय झरंता चन्द्र रानी थे दीठाजी,

थारे पुत्र होसीजी अमीवंत, अंगूठे अमी झरसीजी ॥८॥
 सातमो सूरज रानी थे दीठाजी, थारे पुत्र होसीजी
 तेजवंत घणो यश पावसीजी ॥९॥ ध्वजा रो सपना
 रानी थे दीठाजी, थारे पुत्र होसीजी ध्वजावंत, ध्वजा
 आगे चालसीजी ॥१०॥ कुंभ कलश रानी थे दीठाजी,
 थारे पुत्र होसीजी कुलवंत घणा कुल दीपावसीजी ॥११॥
 पद्म सरोवर रानी थे दीठाजी, थारे पुत्र होसीजी पदवी-
 वंत, तीर्थकर पदवी पात्रसीजी ॥१२॥ क्षीर समुद्र रानी
 थे दीठाजी, थारे पुत्र होसीजी क्षमावंत, देवां मांही
 सोवसीजी ॥१३॥ देवविमाण रानी थे दीठाजी, थारे
 पुत्र होसीजी महावीर, चौंसठ इन्द्र सेवा करेजी ॥१४॥
 रत्नारी राशि रानी थे दीठाजी, थारे पुत्र होसीजी,
 रिद्धिवंत, द्विगुणी-तिगुणी सिंग चढ़ेजी ॥१५॥ अग्नि
 शिखा रानी थे दीठाजी, थारे पुत्र होसीजी चारित्रवंत,
 चारित्र व्रत पालसीजी ॥१६॥ पंडित ने दक्षिणा दीनीजी,
 कांई दीनो घणो सन्मान सोनो दीनो सोलमोजी ॥१७॥

॥ तीसरी ढाल ॥

(तर्ज : रानी ने पहलो डोहला उपन्योजी, रानी रा धूकतडा)

त्रिशलादेवी जी बैठा महल में जी, वाने डोहलो
 उपन्यो मन मांय, सिद्धारथ ने वीनवेजी ॥१॥ रानी ने

पहलो डोहलो उपन्योजी, इन्द्राणी रे कुंडल पेरेन आस
 के, सिद्धारथ पेरावियाजी ॥२॥ रानी ने दूजो डोहलो
 उपन्योजी, ये तो दया-धर्म चित्त जाय के, खिम्पा धर्म
 पालनोजी ॥३॥ रानी ने तीजो डोहलो उपन्योजी, दान
 देवन मन जाय के, अभयदान मोटकाजी ॥४॥ रानी ने
 चौथो डोहलो उपन्योजी, रानी ने शील पालन मन
 जाय के, व्रत पाले मोटको जी ॥५॥ रानी ने पांचमो
 डोहलो उपन्योजी, तपस्या करन मन जाय, नौकारसी
 तप करेजी ॥६॥ रानी ने छट्ठो डोहलो उपन्योजी,
 रानी रे भाव सामायिक मांय, पडिकमणो नित करेजी
 ॥७॥ रानी ने सातमो डोहलो उपन्योजी, रानी रो
 घेवरिया मन जाय के, चीनि खांडराजी ॥८॥ रानी ने
 आठमां डोहलो उपन्योजी, रानी ने लापसड़ी मन मांय,
 झरता घिरतराजी ॥९॥ रानी ने नवमो डोहलो
 उपन्योजी, रानी ने अजमो सूंठ सन जाय के, लाडू
 गूंदराजी ॥१०॥ सवा नौ मास पूरा हुआजी, चैत्र सुदी
 तेरस दिन जान, तीर्थकर जगमियाजी ॥११॥ जठे
 छप्पन कुमारियां मिल आवतीजी, साताजी ने करे
 नमस्कार, डर मती लावजोजी ॥१२॥ जठे सोनारी
 छुरिया नालो मोड़ियोजी, जठे रत्नां रा थाल बजायो,
 आनन्द बधावनांजी ॥१३॥ गंगा जल नीर नवावियाजी,

जठे पाठ पीताम्बर पलेटिया जी, महावीर जनमियाजी ॥१४॥ जठे धर्म पालणिये पोढावियाजी, जठे पोढाया
माताजी रे पास, महावीर जनमियाजी ॥१५॥ जठे
शकेन्द्र चली आवियाजी, वांका बालक ने लिया छे
उठाय, मेरु शिखर पर जा धरयाजी ॥१६॥ जठे चौंसठ
इन्द्र आवियाजी, जठे इन्द्राणियां गावे छे गीत, छप्पन
कुमारियां आयी मिलीजी ॥१७॥ जठे रत्नां रा कलश
जल भरयाजी, उठे बालक दिया नवाय, इन्द्र मन
चिन्तवेजी ॥१८॥ मोटी तो धार जल तणीजी, ये तो
देखी इन्द्र शंका लाय, बालक बे जावसीजी ॥२०॥
जठे प्रभुजी शंका निवारियाजी, मेरु पर्वत ने दियो रे
धुजाय, इन्द्र मन हरषियाजी ॥२०॥ जठे चौंसठ इन्द्र
पावें पड्याजी, स्वामी विनवां छे बे कर जोड़, गुनों
माहको खमजोजी ॥२१॥ जठे महावीर नाम स्थापन
करियोजी, लाया माताजी रे पास, पालणिये पोढावियाजी
॥२२॥ जठे दासी देवे बधावनाजी, सिद्धारथ राजा ने
जाय, तीर्थकर जनमियाजी ॥२३॥ सोनारी झारी जल
भरीजी, दासी ने दीनी नवाय, धन दीनो घणोजी ॥२४॥
जठे बंधिवान छुड़ावियाजी जठे दान दियो जलधार,
तीर्थकर जनमियाजी ॥२५॥ राजा दशोटन करावियाजी,
कांई बुलाया सब परिवार, जीमन ने आवियाजी ॥२६॥

जीमने सगला राजी हुआजी, राजा दीना सब सिर पाव,
 गेहणा दीना शोभता जी ॥२७॥ भद्रासन बैठावियाजी,
 ये तो मोतियां रा चौक पुरावियाजी, जठे कुंभ कलश
 ले आवियाजी ॥२८॥ गुण निष्पन्न नाम जो स्थापियाजी,
 ये तो नाम दियो वर्धमान, तीर्थकर जनमियाजी ॥२९॥
 मैं तो अरिहंतरा गुण गावस्यां जी, मैं तो गावस्यां चेत्र
 के मांही, तेरस ने वधावना जी ॥३०॥

॥ चौथी ढाल ॥

(तर्ज : गज सायना रानी थे दीठा जी)

कुण्डलपुर नगर सुहावनोजी, वीर लीनो संजम
 भारि, मिगसर वद ग्यारसजी ॥१॥ तपस्या तो कीनी
 आकरीजी, करम करया चकचूर, परिसा घणा सह्याजी
 ॥२॥ वैशाख सुदी दशमी दिनेजी, पाया है केवल ज्ञान,
 चार तीर्थ स्थापियाजी ॥३॥ साधु-साध्वी-भावक-
 श्राविका जी, धर्म रा दोय प्रकार, प्रभुजी प्रकाशिया
 जी ॥४॥ पावापुरी में पधारियाजी, कार्तिक वद अम्मा-
 वस्याजी जठे वीर पहुँच्या निर्वाण इन्द्र उत्सव क्रियोजी
 ॥५॥ जठे गौतम स्वामी केवल पामियाजी, जठे सुधर्मा
 पाट विराज, जम्बु परशन पूछियाजी ॥६॥ जठे गावतडा
 सुख उपजेजी, वांरो सुनियांरो पातक जाव, आनन्द
 बधावनाजी ॥इति॥

॥ हथनी ॥

(तर्ज-हथनी माहरी मलकंती चाली तो)

आ हथनी माहरी मलकंती चाली तो, समुद्र माहीं चाली तो, पांच कलश लेने नीसरिजी ॥१॥ पहलो तो कलश वनिता में मेलयो तो, वनिता में मेलयो तो, वनिता में आदिनाथ जनमियोजी ॥ आदि-नाथ जनम्या बड़ो उपकार तो, भलो उपकार तो, ज्यां देवां धर्म प्रकाशियाजी ॥२॥ दूजो तो कलश हस्तिनापुर में मेलयो तो, हस्तिनापुर में मेलयो तो, हस्तिनापुर में शान्तिनाथ जनमियाजी, शान्तिनाथ जनम्या बड़ो उपकार तो, भलो उपकार तो, ज्यां देवा शान्ति वरतावियाजी ॥२॥ तीजो तो कलश सोरियापुरमें मेलयो तो, सोरियापुरमें मेलयो तो, सोरियापुर में नेमिनाथजी जनमियाजी, नेमिनाथ जनम्या बड़ो उपकार तो, भलो उपकार तो, ज्यां देवा पशुव छुडावियाजी ॥३॥ चौथो तो कलश बणारसी में मेलयो तो, बणारसी में मेलयो तो, बणारसी में पाइर्वनाथ जनमियोजी ॥ पाइर्वनाथ जनम्या बड़ो उपकार तो, भलो उपकार तो, ज्यां देवा कमठ हठावियाजी ॥४॥ पांचमो तो कलश कुण्डलपुर में मेलयो तो, कुण्डलपुर में मेलयो तो, कुण्डलपुर में

महावीर स्वामी जनमियाजी, महावीर स्वामी जनम्या,
बड़ो उपकार तो, भलो उपकार तो, ज्यां देवा मेरू
कंपावियाजी ॥५॥

॥ तारा ॥

(तर्ज-सहेलियां ए आंबो मोरियो)

सहेलियां ए तारो ऊगियो, ओ तो ऊगियो ओ
वनिता रे मांय के, सहेलियां ए तारो ऊगियो ॥१॥ जठे
जनमिया ओ आदिनाथ देव के ॥ सहेलियां ॥२॥ जनम्या
रा हर्ष बधावना, संयम रा लाड न कोड ॥३॥ सहेलियां
ए तारो ऊगियो, ओ तो ऊगियो ओ हस्तिनापुर रे मांय
के, सहेलियां ए तारो ऊगियो ॥४॥ जठे जनम्या ओ
शान्तिनाथ देव के ॥ सहेलियां ॥५॥ जनम्या रा हर्ष
बधावना, संयम रा प्रभु लाड न कोड ॥६॥ सहेलियां ए
तारो ऊगियो, ओ तो ऊगियो ओ शोरियापुरी रे मांय
के, सहेलियां ए तारो ऊगियो ॥७॥ जठे जनम्या ओ
नेमीनाथ देव के ॥ सहेलियां ॥८॥ जनम्या रा हर्ष बधा
वना, संयम रा प्रभु लाड न कोड ॥९॥ सहेलियां ए
तारो ऊगियो, ओ तो ऊगियो ओ बणारसी रे मांय के,
सहेलियां ए तारो ऊगियो ॥१०॥ जठे जनम्या ओ पाश्र्व-
नाथ देव के ॥ सहेलियां ॥११॥ जनम्या रा हर्ष बधावना,

संयम रा लाड न कोड ॥१२॥ सहेलियां ए, तारो ऊगियो
ओ तो ऊगियो ओ कुंडलपुर रे मांय के, सहेलियां ए तारो
ऊगियो ॥१३॥ जठे जन्मया है महावीर देव के ॥
सहेलियां ॥१४॥ जनम्या रा हर्ष बधावना, संयम रा
लाड न कोड ॥१५॥ सहेलियां ए तारो ऊगियो, ओ तो
ऊगियो गोवर ग्राम के मांय के, सहेलियां ए तारो ऊगियो
॥१६॥ जठे जनम्या ओ गौतम स्वामी देव ॥ सहेलियां
॥१७॥ जनम्या रा हर्ष बधावना, संयम रा लाड न
कोड ॥१८॥

॥ दीपक ॥

(तर्ज :-कपूरं रा लियो पंथ सार, सभी सांज दियो बलेजी ॥)

वनिता रे मेलारे मांय, सभी सांज दियो बलेजी ॥
मोरादेवीजी जायो है पूत, तीन लोक रा राजवी जी
नाभि राजाजी पूछे है बात, किन वेला जनमियाजी ॥
जनम्या है आधी जी रात के, मोच्छव मंडावियोजी ॥
हस्तिनापुर रे मेलारे मांय, सभी सांज दियो बलेजी ॥
अचलादेवीजी जायो है पूत, तीन लोक रा राजवीजी ॥
विश्वसेन पूछे है बात, किन वेला जनमियाजी ॥
जनम्या है आधी जी रात के, मोच्छव मंडावियोजी ॥
शोरियापुर के महल के मांय, सभी सांज दियो बलेजी ॥

सेवादेवीजी जायो है पूत, तीन लोक रा राजवी जी ॥
 समुद्रविजयजी पूछे है बात, किन वेला जनमियाजी ॥
 जनम्या है आधी जी रात, मोच्छव मंडावियोजी ॥
 बणारसी के महल के मांय, सभी सांज दियो बलेजी ॥
 वामादेवीजी जायो है पूत, तीन लोक रा राजवी जी ॥
 अश्वसेन पूछे है बात, किन वेला जनमियाजी ॥
 जनम्या है आधी जी रात, मोच्छव मंडावियोजी ॥
 कुण्डलपुर के महल के मांय, सभी सांज दियो बलेजी ॥
 त्रिशलादेवीजी जायो है पूत, तीन लोक रा राजवीजी ॥
 सिद्धारथ राजा पूछे है बात, किन वेला जनमियाजी ॥
 जनम्या है आधी जी रात, मोच्छव मंडावियोजी ॥
 गोवर-ग्राम के महल के मांय, सभी सांज दियो बलेजी ॥
 पृथ्वीदेवीजी जायो है पूत, अंगूठे अमी झरेजी ॥
 दंडुभूति पूछे है बात के, किन वेला जनमियाजी ॥
 जनम्या है आधी जी रात, मोच्छव मंडावियोजी ।

॥ सूरज ॥

(तर्ज :—आज शहर में रत्नां रो सूरज ऊगियो)

आज वनिता में रत्नां रो सूरज ऊगियो, ऊगो
 माता मोरादेवीजी रो कुल में तीर्थकर, रंग रो बधाओ
 माहरे नाभि राजाजी रो आवियो, कीर्ति तो पसरि तीन

लोक रे मांयने ॥ चौसठ इन्द्र करे रे बधावना ॥
 आज हस्तिनापुर में रत्नां रो सूरज ऊगियो, ऊगो
 माता अचलदेवजी रो कुल में तीर्थकर, रंग रो बधाओ
 माहरे विश्वसेनजी रो आवियो, कीर्ति तो पसरी तीन
 लोक रे मांयने, चौसठ इन्द्र करे रे बधावना ॥२॥
 आज सोरियापुर में रत्नां रो सूरज ऊगियो, ऊगो
 माता सेवादेवीजी रो कुल में तीर्थकर, रंग रो बधाओ
 माहरे समुद्र विजयजी रो आवियो, कीर्ति तो पसरी
 तीन लोक रे मांयने, चौसठ इन्द्रकरे रे बधावना ॥३॥
 आज बनारस में रत्नां रो सूरज ऊगियो, ऊगो
 माता वामदेवीजी रो कुल में तीर्थकर, रंग रो बधावों
 माहरे अश्वसेनजी रो आवियो, कीर्ति तो पसरी तीन
 लोक रे मांयने, चौसठ इन्द्र करे रे बधावना ॥४॥
 आज कुण्डलपुर में रत्नां रो सूरज ऊगियो, ऊगो
 माता त्रिशालदेवीजी रो कुल में तीर्थकर, रंग रो बधाओ
 माहरे सिद्धार्थजी रो आवियो, कीर्ति तो पसरी तीन
 लोक रे मांयने, चौसठ इन्द्र करे रे बधावना ॥५॥

॥ क्लेवो ॥

(तर्ज—उठो माहरा बालक बनड़ा, करोनी क्लेवो)

उठो माहरा नैमीश्वर बनड़ा, करोनी दांतनियां
 इसड़ा दांतनियां थारा, भावज करावे

भावज करावे थारा, वीराजी हर्षवि
 इसडो कलेवो थारा, माताजी करावे
 माताजी करावे थारा, पिताजी हर्षवि
 फीणा तो रोटी ओ बनडा, लूणी रो लचको
 इसडा जिमणियां थारा, मामाजी करावे
 मामाजी करावे थारा, मामाजी हर्षवि
 खाजा तो लाडू बनडा, सरस जलेबी
 जीम चूटने बनडा, परण पधारो
 पशुवारी करुणा बनडा, पाछा जो फिरिया
 संजम लीनो बनडा, धर्म ने दिपाया
 गिरनारी ऊपर बनडा, मुगत सिधाया

॥ वीरा ॥

(तर्ज— भविका परम पजुशन आया)

केवल वीरा मिलवाने वेगा आयजो, मोक्ष पिय-
 रियारी बात बतायजो ॥टेरा॥ पियरिया में बेटी बाजूं,
 सासरिया में गांजूं । बहन ने वीरा आस तुम्हारी, मेल
 भूल मत जायजो ॥१॥ मात-पितारी पाय पडीजे,
 भावज ने नमन करीजे, भई रे भतीजा बहन भानजो,
 सहेलियां ने याद करीजे ॥२॥ वार तिवारां याद
 करीजो, चून्दड़ी चीर रंगायजो, अल्लांजो-पल्लां जडिया

रे साकिया, अध बीच चाँद कोरायजो ॥३॥ दिल्ली
 शहर को पोत मंगायजो, नानी सी बंदन बंदायजो ।
 बिन्दली रे वीरा लाल जडायजो, मुन्दड़ी में रतन
 जडायजो ॥४॥ साला बहनोई जयजिनेन्द्र बोलीजें,
 आतम कारज सारीजे कहे हीरालालजी सुन बहन
 सुमति, श्रीमुख गुण गायजो ॥५॥ इति ॥

॥ मेहन्दी ॥

(तर्ज :-सूती ने सपना आयो माहरी सैयां ए)

सूती ने सपना आयो माहरी सैयां ए, जागती
 तो विनीता में जाती माहरी सैयां ए, वनिता में
 आदिनाथ विराज्या माहरी सैयां ए, आदिनाथ रे
 पिछवाडे वाडी माहरी सैयां ए, वाडी में केसर बवाऊं
 माहरी सैयां ए, वाडी में मेहन्दी बवाऊं माहरी सैयां ए,
 मोरादेवीजी रे हाथ मंडावो माहरी सैयां ए, आदिनाथजी
 रे तिलक कढावो माहरी सैयां ए ।

सूती ने सपना आयो माहरी सैयां ए, जागती तो
 हस्तिनापुर में जाती माहरी सैयां ए, हस्तिनापुर में
 शान्तिनाथ विराज्या माहरी सैयां ए, शान्तिनाथ जी रे
 पिछवाडे वाडी माहरी सैयां ए, वाडी में केसर बवाऊं

माहरी सैयां ए, अचलादेवीजी रो हाथ मंडावो माहरी सैयां ए, शान्तिनाथजी रे तिलक कढावो माहरी सैयां ए ।

सूती ने सपना आयो माहरी सैयां ए, जागती तो सोरियापुरी में जाती माहरी सैयां ए, सोरियापुर में नेमीनाथ विराज्या माहरी सैयां ए, नेमीनाथ जी रे पिछवाडे वाडी माहरी सैयां ए, वाडी में केसर बवाऊं माहरी सैयां ए, सेवादेवीजी रे हाथ मंडावो माहरी सैयां ए, नेमीनाथजी रे तिलक कढावो माहरी सैयां ए ।

सूती ने सपना आयो माहरी सैयां ए, जागती तो बणारसी में जाती माहरी सैयां ए, बणारसी में पार्श्वनाथ विराज्या माहरी सैयां ए, पार्श्वनाथजी रे पिछवाडे वाडी माहरी सैयां ए, वाडी में केसर बवाऊं माहरी सैयां ए, वामादेवीजी रे हाथ मंडावो माहरी सैयां ए, पार्श्वनाथजी रे तिलक कढावो माहरी सैयां ए ।

सूती ने सपना आयो माहरी सैयां ए, जागती तो कुण्डलपुर में जाती माहरी सैयां ए, कुण्डलपुर में महावीर स्वामी विराज्या माहरी सैयां ए,

महावीर स्वामी रे पिछवाडे वाडी माहरी सैयां ए
 वाडी में केसर बवाऊं माहरी सैयां ए, त्रिशलादेवी
 जी रो हाथ मंडावो माहरी सैयां ए, महावीर
 स्वामीजी रे तिलक कढ़ावो माहरी सैयां ए ।

सूती ने सपना आयो माहरी सैयां ए, जागती
 तो गोवर-ग्राम में जाती माहरी सैयां ए, गोवर
 ग्राम में गौतम स्वामी विराज्या माहरी सैयां ए
 वाडी में केसर बवाऊं माहरी सैयां ए, पृथ्वीदेवीजी
 रा हाथ मंडावो माहरी सैयां ए, गौतम स्वामीजी
 रे तिलक कढ़ावो माहरी सैयां ए ।

॥ बघावो ॥

(सर्ज :—नाभि राजाजी चौंटे चाल्या, चूंदड़ी चार मोलाय ।)

वनिता नगरी में उच्छव होवे, नाभि राजा रा
 राज में । माता मोरादेवीजी जायो है पूत, बघावो
 राजा नाभि के घरे ॥१॥ नाभि राजाजी चौंटे चाल्या,
 चूंदडियाँ चार मोलाया, सजनी राती, पीली, हरी,
 कसुम्बा, चार, सगला रे मन भावती ॥२॥ नाभि
 राजाजी चौंटे चाल्या, चुड़ला चार मोलाया सजनी
 दान्त्या, लाख्या, राता, पीला चार, सगला रे मन
 भावता ॥३॥ नाभि राजाजी चौंटे चाल्या, छावां चार

मोलाया सजनी लाडु, पेडा, फिणिया. बर्फी, चार, सगला रे मन भावता ॥४॥ पेरया ओड्या भोजन कीना, अबे मने घर पुगावो चिरंजीवी ओ माता मीरादेवीजी थारा पूत, बधावो माहरे आवियो ॥५॥

॥ चौथीमी ॥

(तर्ज - शीतल जिनवर करू प्रणाम ॥)

नाभि राजा मोरादेवी नार, वनिता नगरी में लियो अवतार, धन-धन ओ मोरादेवी मांय, पहला श्री ऋषभनाथ स्वामी लियो अवतार ॥१॥ जितशत्रु राजा विजयादेवी नार, अयोध्या नगरी में लियो अवतार, धन-धन ओ विजयादेवी मांय, दूजा श्री अजितनाथ स्वामी लियो अवतार ॥२॥ जितारथ राजा सेनादेवी नार, सावथी नगरी में लियो अवतार, धन-धन ओ सेनादेवी मांय, तीजा श्रीसंभव स्वामी लियो अवतार ॥३॥ खंवर राजा सिद्धार्था देवीं नार, वनिता नगरीं में लियो अवतार, धन-धन ओ सिद्धार्थादेवी मांय, चौथा श्री अभिनन्दन स्वामी लियो. अवतार ॥४॥ मेघरथ राजा सुमंगलादेवी नार, कौशलपुरी में लियो अवतार, धन-धन ओ सुमंगलादेवी मांय, पांचमा श्रीं सुमतिनाथ स्वामी लियो अवतार ॥५॥ श्रीधर राजा सुषमादेवी नार,

कोशम्बी नगरी में लियो अवतार, धन-धन ओ सुषमादेवी
 मांय, छट्ठा श्री पद्मप्रभु स्वामी लियो अवतार ॥६॥
 प्रतिष्ठसेन राजा पृथ्वीराज नार, बणारसी नगरी में
 लियो अवतार, धन-धन ओ पृथ्वीदेवी मांय, सातमां
 श्री सुपाश्वनाथ स्वामी लियो अवतार ॥७॥ मासेन
 राजा लक्ष्मादेवी नार, चन्द्रपुरी नगरी में लियो अवतार
 धन-धन ओ लक्ष्मादेवी मांय, आठमा श्री चन्दाप्रभु
 स्वामी लियो अवतार ॥८॥ सुग्रीव राजा रामादेवी नार,
 काकंदी नगरी में लियो अवतार, धन-धन ओ रामादेवी
 मांय, नवमा श्री सुद्विधिताथ स्वामी लियो अवतार ॥९॥
 दृढ़रथ राजा नन्दादेवी नार, भद्रिलपुर नगरी में लियो
 अवतार, धन-धन ओ नन्दादेवी मांय, दसमा श्री
 शीतलनाथ स्वामी लियो अवतार ॥१०॥ विष्णुसेन
 राजा विष्णुदेवी नार, सिंहपर नगरी में लियो अवतार,
 धन-धन ओ विष्णुदेवी मांय, ग्यारहमा श्री श्रेयांसनाथ
 स्वामी लियो अवतार ॥११॥ वास पूज्य राजा जयादेवी
 नार, चंपा नगरी में लियो अवतार, धन-धन ओ
 जयादेवी मांय, बारहमां श्री वास पूज्य स्वामी लियो
 अवतार ॥१२॥ कृतभानु राजा श्यामादेवी नार,
 कंपिलपुर में लियो अवतार, धन-धन ओ श्यामादेवी
 मांय, तेरहमां श्री विमलनाथ स्वामी लियो अवतार ॥१३॥

सिंहसेन राजा सुयशादेवी नार, अयोध्या नगरी में लियो
 अवतार, धन-धन ओ सुयशा देवी मांय, चौदमा श्री
 अनन्तनाथ स्वामी लियो अवतार ॥१४॥ भानुराजा
 भद्रादेवी नार, रत्नपुरी नगरी में लियो अवतार, धन-
 धन ओ भद्रादेवी मांय, पन्द्रहमा श्री धर्मनाथ स्वामी
 लियो अवतार ॥१५॥ विश्वसेन राजा अचलादेवी नार,
 हस्तिनापुर नगरी में लियो अवतार । धन-धन ओ
 अचलादेवी मांय, सोलमा श्री शान्तिनाथ स्वामी लियो
 अवतार ॥१६॥ सूर राजा श्रीदेवी नार, गजपुर नगरी
 में लियो अवतार । धन-धन ओ श्रीदेवी मांय, सत्रहमा
 श्री कुंथुनाथ स्वामी लियो अवतार ॥१७॥ सुदर्शन
 राजा देवी रानी नार, गजपुर नगरी में लियो अवतार,
 धन-धन ओ देवी रानी मांय, अठारहमा श्री अरहनाथ
 स्वामी लियो अवतार ॥१८॥ कुंभ राजा प्रभावती
 नार, मिथिलापुर नगरी में लियो अवतार । धन-धन
 ओ प्रभावती मांय, उन्नीसमा श्री मल्लिनाथ स्वामी
 लियो अवतार ॥१९॥ सुमित्र राजा पद्मावती नार,
 राजग्रही नगरी में लियो अवतार । धन-धन ओ पद्मावती
 मांय, बीसमा श्री मुनिव्रत स्वामीजी लियो अवतार ॥२०॥
 विजयसेन राजा विप्रादेवी नार, मथुरा नगरी में लियो
 अवतार, धन-धन ओ विप्रादेवी मांय, इक्कीसमा

श्री नेमिनाथजी स्वामी लियो अवतार ॥२१॥ समुद्र-
 विजयजी राजा सेवादेवीजी मांय, शोरियापुर नगरी में
 लियो अवतार, धन-धन ओ सेवादेवीजी मांय, बाईसमा
 श्री अरिष्टनेमीजी लियो अवतार ॥२२॥ अश्वसेन
 राजा वामादेवी नार, बणारसी नगरी में लियो अवतार,
 धन-धन ओ वामादेवी मांय, तेईसमा श्री पार्श्वनाथ
 स्वामीजी लियो अवतार ॥२३॥ सिद्धारथ राजा
 त्रिशलादेवी नार, कुण्डलपुर नगरी में लियो अवतार ।
 धन-धन ओ त्रिशलादेवीजी मांय, चौबीसमा श्री महावीर
 स्वामी लियो अवतार ॥२४॥ इति ॥

॥ चौदह सपना ॥

(तच्छ — गुणभर ओरी ने पोढ़िया है गोरी तो)

गुणभर ओरी ने पोढ़िया है गोरी तो, चौदह ओ
 सपना रानी रनेमी ॥१॥ पेले ओ सपना में गयवर
 दीठा तो, दूजे ओ ऋषभ सुलक्षणोजी ॥२॥ तीजे ओ
 सपना में सिंह जो दीठा तो, चौथे ओ लक्ष्मी देवताजी
 पांचमी पांच वरणांरी ओ माला तो, छट्ठे ओ चांद
 अमी झरेजी ॥३॥ सातमा सूरज, आठमा ध्वजा तो,
 नवमो कलश रत्नां जडियोजी । पद्य सरोवर स्वामी
 दसमा ओ दीठा तो, क्षीर समुद्र स्वामी ग्यारहमाजी ॥४॥

देव विमानीक स्वामी बारहमां दीठा तो,
 * रुण-जुण घंटा मादल बाजियाजी ॥५॥
 रत्नारी राशि स्वामी तेरहमां दीठा तो,
 अग्नि दीठा ओ स्वामी चौदहमाजी ॥६॥
 चौदह ओ सपना तो दीठा है रानी तो,
 रानी ओ राज जगावियाजी ॥७॥
 जागो-जागो ओ माहरा सिद्धारथ राजा तो,
 इन सपना रो स्वामी फल किसोजी ॥८॥
 इन ने सपना रो रानी फल ऐसोजी,
 तीर्थकर-चक्रवती आपरे होसी तो,
 कुल मांहे कलश चढ़ावसीजी ॥९॥
 चैत्र सुदी तेरस ने तीर्थकर जनमिया तो,
 छप्पन कुमारियां मिल आवियाजी ॥१०॥
 सोनारी छुरिया तो नालो पर तात्योतो,
 रत्नां रा थाल बजावियाजी ॥११॥
 गंगा जल नीर नवायने लीधा तो,
 वस्त्र पीताम्बर पलेटियाजी ॥१२॥
 स्नान कराय ने हाथ माहें लीधा तो,
 माताजी रे पास पोढ़ावियाजी ॥
 धर्म पालणिये पोढ़ावियाजी ॥१३॥

अगर चन्दन सुं राजा गार गलावो तो,
 मोतीडासुं चोक पुरावियोजी ॥१४॥
 चारों ही दिशा में राजा तणीएबंधावो तो,
 ऊपर रालो बाला चून्दीजी ॥१५॥
 हाथां रे पयां रे राणी रे मेहन्दी दिरावो तो,
 चूडले ओ चोल मजीठजी ॥१६॥
 रतन जड़तरो राजा बाजोटियो ढलावो तो,
 कुंभ कलश आगे धरियोजी ॥१७॥
 भणियो तो गुणियो राजा पंडित बुलावो तो,
 नाम दिरावो वर्धमान रो जी ॥१८॥
 केशर कुंकरा रानी रे तिलक कडावो तो,
 नेणा ओ काजल गुलरह्योजी ॥१९॥
 ओढ़ पहरने रानी बाजोटिये विराजिया तो,
 पूत तीर्थकर रानी खोले लिया जी ॥
 मनरा मनोरप्र रानी पूरियाजी ॥२०॥
 सिद्धारथ राजा तो दशोटन कीधा तो ॥
 निवतिया है न्याती, गोत्री, परिवारनेजी ॥२१॥
 खाजा ने लाडू तो सरस जलेबी तो,
 घेवरिया छंटाया चीनी खांडसारी ॥२२॥
 सिद्धारथ राजा तो मूछणियां दिराया तो,
 लूंग सुपारी ओ डोडा एकचीजी ॥२३॥

सिद्धारथ राजा तो चलूये करायो तो,
 सोना री झारी ओ वारां हाथ में जी ॥२४॥
 सिद्धारथ राजा तो दान दिरायो तो,
 सोना री मेहरां ओ बकसीयाजी ॥२५॥
 सोई नर गावे सदा सुख पावे तो,
 गावन वालियां सदा सुख भोगवेजी ॥२६॥
 सुनने वालिया सदा सुख भोगवे ॥
 बेटारी माता सुख भोगवेजी ॥२७॥ इति ॥

॥ हथनी ॥

(तर्ज-थे मन मोह्यो महावीर जी)

हथनी चालाजी मलकती वनिता नगरी रे मांय
 जी । मैं थाने पूछूं आदिनाथजी, कठे थाने रेवन रो
 वासजी ॥१॥ वनिता नगरी में जनमिया, अष्टापद में
 निर्वाणजी । कुंकु भरणी जी वागकी, केसर भरणी जी
 बाटकी ॥२॥ हथनी चाली जी मलकती हस्तिनापुर रे
 मांयजी । मैं थाने पूछूं शान्तिनाथजी, कठे थाने रेवन
 रो वासजी ॥३॥ हस्तिनापुर में जनमिया, समेतशिखर
 में निर्वाणजी । कुंकु भरणीजी बाटकी, केसर भरणीजी
 बाटकी ॥४॥ हथनी चालीजी मलकती, सोरियापुर में
 मांयजी । मैं थाने पूछूं नेमीनाथजी, कठे थाने रेवन रो

वासजी ॥५॥ शोरियापुर में जनमिया, गिरनार में
निर्वाणजी । कुंकु भरणीजी बाटकी, केसर भरणीजी
बाटकी ॥६॥ हथनी चालीजी मलकती, बणारसी नगरी
रे मांयजी । मैं थाने पूछूं पार्श्वनाथजी, कठे थाने रेवन
रो वासजी ॥ ७ ॥ बणारस नगरी में जनमिया,
समेतशिखर में निर्वाणजी । कुंकु भरणीजी बाटकी,
केसर भरणी जी बाटकी ॥८॥ हथनी चालीजी मल-
कती, कुण्डलपुर रे मांय जी, मैं थाने पूछूं महावीरजी
कठे थाने रेवन रो वासजी ॥९॥ कुण्डलपुर में जन-
मिया, पावापुरी में निर्वाणजी । कुंकु भरणी जी
बाटकी, केसर भरणीजी बाटकी ॥१०॥

॥ तारो ॥

(तर्ज : प्रभातिया रो तारो आंगण मोर मोती चुगेजी)

प्रभातिया रो तारो आंगण हंस मोती चुगेजी ।
जठे आदिनाथ जनमिया नाभि राजा रे बधावना जी ॥
ये तो केवल पाया दुनिया में धर्म प्रकाशियाजी ।
अष्ठापद ऊपर आदिनाथजी मोक्ष सिधावियाजी ॥
प्रभातिया रो तारो आंगण हंस मोती चुगेजी ।
जठे शान्तिनाथजी जनमिया विश्वसेन राजा रे बधावनाजी
ये तो केवल पाया दुनियाँ में शान्ति वरतावियाजी ।

समेतशिखर पर शान्तिनाथजी मोक्ष सिधावियाजी ॥
 प्रभातिया रो तारो आंगण हंस मोती चुगेजी ।
 जठे नेमीनाथजी जनमिया समुद्रविजयजी राजा रे बधाव-
 नाजी ये तो केवल पाया करुणा से पशुव छुडावियाजी ।
 गिरनार पर नेमीनाथजी मोक्ष सिधावियाजी ॥
 प्रभातिया रो तारो आंगण हंस मोती चुगेजी ।
 जठे पार्श्वनाथ जनमिया, अश्वसेन राजा रे बधावनाजी
 ये तो केवल पाया अज्ञानी कमठ समझावियाजी ।
 समेतशिखर पर पार्श्वनाथजी मोक्ष सिधावियाजी ॥
 प्रभातिया रो तारो आंगण हंस मोती चुगेजी ।
 जठे महावीर स्वामी जनमिया सिद्धारथ राजा रे बधावना
 जी ये तो केवल पाया जिन शासन दिपावियाजी ।
 पावापुरी में महावीर स्वामी मोक्ष सिधावियाजी ॥

॥ सूरज ॥

(तर्ज : धोलो तो धोलो काँई करो सैयां)

धोलो तो धोलो काँई करो सैयां धोलो विणी रो
 कयास । धोला चन्दाप्रभु सोवता ए सैया धोलो सूरज
 रो प्रकाश पीलो तो पीलो काँई करो सैयां पीलो सोना
 रो रंग । पीलो रंग आदिनाथजी रो सैयां पीलो हलदी
 रो रंग ॥ हरियो तो हरियो काँई करो सैयां हरियो

श्रावण री घास हरियो वर्ण मल्लिनाथजी रो सैयां
हरियो सुवारी पांख । रातो तो रातो कांई करो सैयां
रातो कसुम्बा रो रंग, रातो वर्ण पद्मप्रभुजी रो सैयां
रातो किरमिजी रो रंग ॥ कालो तो कालो कांई करो
सैयां, कालो काजल रो रेख, कालो वर्ण अरिष्ठनेमी-
नाथजी रो सैयां कालो बादल रो रंग ॥

॥ दीपक ॥

(तज्ज—रंग भर दिवलो जिन रह्यो)

रंगभर दिवलो जल रह्यो, वह तो जल रह्यो
वनिता रे मांय ॥१॥ नाभि राजा मेहन्दी मोलवे, माता
मोरादेवी रे हाथ रंगाय ॥२॥ कुण मांड्या ओ मानेतन
थारा हाथ, माहरा मांड्या ओ देवांगणा हाथ ॥ रंग
भर दिवलो जल रह्यो ॥३॥ रंगभर दिवलो जल रह्यो,
वह तो जल रह्यो हस्तिनापुर रे मांय ॥४॥ विश्वसेन
राजा मेहन्दी मोलवे, माता अचलादेवी रे हाथ रंगाय
॥५॥ कुण मांड्या ओ मानेतन थारा हाथ, माहरा
मांड्या ओ देवांगणा हाथ ॥६॥ रंग भर दिवलो
जल रह्यो ॥ रंग भर दिवलो जल रह्यो, वह
तो जल रह्यो, शोरिटा पुर रे मांय ॥७॥
समुद्रविजय राजा मेहन्दी मोलवे, माता सेवा देवीजी

रे हाथ रंगाय ॥८॥ कुण मांड्या ओ मानेतन थारा
 हाथ, माहरा मांड्या ओ देवांगण हाथ ॥९॥ रंग भर
 दिवलो जल रह्यो, वह तो जल रह्यो बनारसी रे
 मांय ॥१०॥ अश्वसेन राजा मेहन्दी मोलवे, माता
 वामादेवीजी रे हाथ, रंगाय ॥११॥ कुण मांड्या ओ
 मानेतन थारा हाथ, माहरा मांड्या ओ देवांगणा
 हाथ ॥१२॥ रंग भर दिवलो जल रह्यो, वह तो जल
 रह्यो कुणलपुर रे मांय ॥१३॥ सिद्धारथ राजा मेहन्दी
 मोलवे, माता त्रिशला देवीजी रे हाथ रंगाय ॥१४॥
 कुण मांड्या ओ मानेतन थारा हाथ, माहरा मांड्या
 ओ देवांगणा हाथ ॥१५॥ इति ॥

॥ वीरा और चूंदडी ॥

(तर्ज : माथन मेमद लावजो रे वीरा)

माथन मेमद लावजो रे वीरा,
 रखडी रतन जडाय जामन जाया,
 चूंदड लावजो ॥१॥
 चुंदड-चूंदड काई करो ए बाई,
 मंगाय दूं दोयन चार जामन जायी,
 चूंदड मंगाय दूं ॥२॥

आजु तो बाजु साकिया ए वीरा,
 अध-बीच लिखियो चांद जामन जाया,
 चूंदड लावजो ॥३॥
 भरिया पंचां में ओढावजो रे वीरा,
 देखेला सगला ही लोक जामन जाया,
 चूंदड लावजो ॥
 कुण्डलपुर रे चौवटे ओढावजो रे वीरा,
 देखेला सगला ही लोक जामन जाया,
 चूंदड लावजो ॥
 इसडी तो चूंदडियां ओढावजो रे वीरा,
 देखेला देवर जेठ जामन जाया,
 चूंदड लावजो ॥

॥ बधावा व झालर ॥

(तर्ज : आज तो बधावो राजा नाभि रे दरबार)

घणण-धणण घंटा बाजे देव करे उच्छाव रे ।
 झणण-झणण झालर बाजे देवियां करे उच्छाव रे ।
 आज तो बधावो राजा नाभि रे दरबार रे ।
 मोरादेवीजी बेटो जायो ऋषभ कुमार रे ।
 आज तो बधावो राजा नाभि रे दरबार रे ।
 घणण-घणण घंटा बाजे देव करे उच्छाव रे ।

झणण-झणण झालर बाजे देवियां करे उच्छाव रे ।
 आज तो बधाओ राजा विश्वसेन रे दरबार रे ।
 अचलादेवीजी बेटो जायो शान्ति कुमार रे ।
 आज तो बधाओ राजा विश्वसेन रे दरबार रे ।
 घणण-घणण घंटा बाजे देव करे उच्छाव रे ।
 झणण-झणण झालर बाजे देवियां करे उच्छाव रे ।
 आज तो बधाओ राजा समुद्रविजयजी रे दरबार रे ।
 सेवादेवीजी बेटो जायो अरिष्ठनेमी कुमार रे ।
 आज तो बधाओ राजा समुद्रविजयजी रे दरबार रे ।
 घणण-घणण घंटा बाजे देव करे उच्छाव रे ।
 झणण-झणण झालर बाजे देवियां करे उच्छाव रे ।
 आज तो बधाओ राजा अश्वसेन रे दरबार रे ।
 वामादेवीजी बेटो जायो पार्श्व कुमार रे ।
 आज तो बधाओ राजा अश्वसेन रे दरबार रे ।
 घणण-घणण घंटा बाजे देव करे उच्छाव रे ।
 झणण-झणण झालर बाजे देवियां करे उच्छाव रे ।
 आज तो बधाओ राजा सिद्धारथ रे दरबार रे ।
 त्रिशलादेवीजी बेटो जायो महावीर कुमार रे ।
 आज तो बधाओ राजा सिद्धारथ रे दरबार रे ।
 घणण-घणण घंटा बाजे देव करे उच्छाव रे ।
 झणण-झणण झालर बाजे देवियां करे उच्छाव रे ।

आज तो बधावो वसुभूति के दरबार रे ।
 पृथ्वीदेवीजी बेटो जायो गौतम कुमार रे ।
 आज तो बधावो वसुभूति रे दरबार रे ॥

॥ चौवीसी ॥

(तर्ज—तपस्या री केसर गुल रह्यो)

जिनजी पहला ऋषभनाथ वंदस्यां,
 जिनजी दूजा अजितनाथ वन्दस्यां,
 जिनजी तीजा संभवनाथ वंदस्यां,
 जिनजी चौथा अभिनन्दन वंदस्यां,
 जिनजी पांचमा सुमितनाथ वंदस्यां,
 जिनजी छट्ठा पदमप्रभु देव के तपस्यारी केसर गुलरह्यो
 बास करूं ने बेला करूं, मारासा अठायारां चढता परिणाम
 अठाई देवो पद्मनाभ, तपस्या री केसर गुल रह्यो ॥

॥ दच्छ राजा की भायां ॥

॥ नवकार मद्य की शहिमा ॥

(तर्ज—नवकूल राजाजी री डीकरी)

नवकूल राजाजी री डीकरी, नवलादेवी वारी
 माताजी, पद्मकुमारी दीपती बाई, ताराचन्दजी है
 भाईजी ॥१॥ मथुरा नगरी का राजाजी, दच्छ राजा

वारो नामोजी । बाग-बगीचा सोभता, वारे बगीचारी
 सुनो अधिकारोजी ॥२॥ काच कवलरी बावडी, लींग
 डोडारो आ बाडो जी । सोना रूपारी घडलिया, रेशम
 केरी डोरो जी ॥३॥ मालीडो पानी सींचवे, मालन
 पावे हे पानी जी । पावे है मरवा ने मोगरो, पावे
 चम्पेली रा गोडो जी ॥४॥ नवकुल राजा भेजिया,
 बाई फुलडां चूठ लावोजी । ऊभा रेवो माहरा बाबोसा
 सजुं मै सोले सिनगारोजी ॥५॥ माथा में मेमंद सोवनो
 रखडी रो इदकारोजी, हिवडाने हासज सोवनो, गले
 ठिकावलरो हारोजी ॥६॥ कानां में कुण्डल सोवनो,
 जुठणारो इदकारोजी । बांसिया बाजुबंद बोरका,
 कंकण रो इदकारोजी ॥७॥ पगलयां ने पायर सोवना,
 गुगरा रो इदकारोजी । घुमे घुमालो घाघरो, ओढण
 दिक्णीरो चीरोजी ॥८॥ सात सहेलयां रे झूलडे,
 पद्मावती बागां संचरियाजी । सोनारी छबोलयो हाथ
 में, गई वच्छ राजारी वाडीजी ॥९॥ तोड्या है आंबा
 ने आंबलि, तोड्या है दाडम दाखोजी । तोड्या है
 मरवा ने मोगरा, तोड्या है चंपेलीरा फूलोजी ॥१०॥
 मालन आई कूकती, मालीडो गयो पुकारोजी । वच्छ
 राजाजी थारा बागां में, पद्मा कीनो बिगाडोजी ॥११॥
 घुडले असवार होयने, आया है बागां रे मायोजी

ढूँढत-ढूँढत सब ढूँढिया, लादा है पाना रे बीचोजी ॥१२॥
 वेणी काटने बल पूछियो, बाई कीनाजी री धीवजी ॥
 नवकुल राजा री डीकरी, नवला दे माहरी मायोजी
 वीरा ताराचन्दजी बेनोजी ॥१३॥ केस खापने बले
 पूछिया, थारा मारा सगपण होसीजी, रोवत जोवत
 घर गई, बाबोसा ले बुचकारियाजी ॥१४॥ काई थारा
 माताजी मारिया, के भोजाई घुरकायीजी । नहीं
 माहरा माताजी मारिया, नहीं भोजाई घुरकायीजी
 ॥१५॥ गई थी वच्छ राजा री वाडिया, वे मारा
 काप्या है केसोजी केस कापने बले पूछियो, बाई थे
 कीनांजी री धीवजी ॥१६॥ नवकुल राजा री दीकरी,
 नवला दे माहरी माता जी । केस कापीने बले कह्यो,
 थारे-मारे सगपण होसीजी ॥१७॥ रोवत जोवत घर
 गई, माताजी ले बुचकारियाजी । काई थारा काको सा
 मारिया, के वीराजी घुरकायाजी ॥१८॥ नहीं माहरा
 काकोसा मारिया, नहीं वीराजी घुरकायाजी, गई थी
 वच्छराजाजी री वाडिया, वे माहरा काप्या है केसोजी
 ॥१९॥ केस काटने बले पूछिया, बाई थे कीनासारी
 धीवो जी । नवकुल राजा री डीकरी, नवला दे माहरी
 मांयजी ॥२०॥ केस कापीने बले कह्यो, थारी-मारी
 सगपण होसीजी, वेलक नानो सा पूछियो, बाई किण

कारणतू विलकायजी ॥२१॥ काई थारो बाबोसा
मारियो, के वीराजी घुरकायाजी । नहीं माहरा बाबो
सा मारियो, नहीं वीराजी घुरकायाजी ॥२२॥ गई
थी वच्छराजा री वाडिया, वे माहरा काप्या है केसोजी,
केस कापी ने बले पूछियो, बाई थे कीना सारी धीवो
जी ॥२३॥ नवकुल राजा री डीकरी, नवला दे माहरी
मायजी । केस काप ने बले कह्यो, थारे-मारे सगपन
होसीजी ॥२४॥ ताराचन्द वीरो पूछियो, बाई किन
कारण थे विलकायजी काई थाने माताजी मारियो, के
भोजाई घुरकायाजी ॥२५॥ नहीं माहरा माताजी
मारिया, नहीं भोजाई घुरकायाजी, गई थी वच्छराजा
री वाडिया, वे मारा काप्या है केसोजी ॥२६॥ केस
कापी ने बले पूछियो, बाई थे कीनांसा री धीवोजी
नवकुल राजा री डीकरी, नवला दे गारी मायजी ॥२७॥
केस कापी बले कह्यो, थारे-मारे सगपन होसी जी ।
ताराचन्दजी वीरो सा रीस में आवने कीदो है नाग तणो
वेशो जी ॥२८॥ उठासुं नागज सांचरिया जावे वच्छ-
राजा ने डसदांजी । उठासुं नागज सांचरिया आया है
सीमा रे मांघो जी ॥२९॥ सीमा सिवारिया ने पूछियो
किणाजी री कहीजे ये सीवोजी मारे वच्छराजारो कहीजे
सीवोजी सीमा सुं फेर पधारिया द्वारोजी ॥३०॥ उठासुं

नागज सांचरिया आया बागां रे मांये जी । बागवान
माली ने पूछियो, कीणाजी रो कहीजे आ बागोजी ॥३१॥
मारे वच्छराजा रो कहीजे बागोजी बागासुं फेर पधारिया
द्वारोजी, उठासुं नागज सांचरिया आया है । पिणगटरे ऊपर
जी ॥३२॥ पिणगट पणियांरियांने पूछियो कीणाजी रो
कहीजे आ पिणगटजी, मारे वच्छ राजा रे कहीजे
पिणगटसु फेर पधारिया द्वारोजी ॥३३॥ उठासुं नागज
सांचरिया आया है डोढियारे मायो जी, डोढिया में
दरजी सी रह्या कीणाजी रे सीवीजे वस्त्रोजी ॥३४॥
मारे वच्छ राजा रे सिविजे अंगियाने पदमा रे नवलो
वेशोजी । उठासुं नाग सांचरिया आया है पोलीयारे
मांयो जी ॥३५॥ पोलीया में सोनी गड़ रह्यो, कीणाजी
रो गडीजे गहनोजी, गडीजे वच्छ राजा रे मूंदडी ने
पदमा रे नवसर हारोजी ॥३६॥ नागज नालिया में
चढ़ रह्या आवे फूलां केरी बासोजी । नागज फूलां में
लूटने आया है नेडिया रे मांयोजी ॥३७॥ दूधज
भरियो बाटको मांये भिश्ररी केरा रव्वा जी, दूध पीने
तिरपत हुआ बेठा दलीचो डालो जी ॥३८॥ आवज
जावज सब आया कीदी पदमा रो सगाई जी । हाथ
सोना रूपारा नारेल बगसाविया कीदी पदमारी सगाई
जी ॥३९॥ इति ॥

॥ वच्छ राजा की दूसरी ढाल ॥

(तजं—उठो माता नवलादेवीजी, सजो सिनंगार तो।)

उठो माता नवलादेवी जी सजो सिनंगारो तो पदमा ने दीनी मोटा रायने जी, बेनड ने दीनी मोटा राय ने जी ॥१॥ सुन-सुन रे जाया पूत सपूता तो विद्याधर री कँवरी क्युँ दीदी मानवी जी । धीवडली ओ क्युँ दीदी मोटा रावने जी ॥२॥ काढ़ कटारी ने माहूँ ली धीवतो पूतडली क्योँ जायी ओ माहरा कूखमें जी ॥३॥ सुनो-सुनो ए माहरी नगरी री नारियाँ थे तो कोई मत जीनजो ए धीवडजी ॥४॥ थे हो माजी सा माहरा हिरणी राजा रा जायी तो पाछे पो संभालो थारा बापरो जी ॥५॥ जितरे ओ नवलादेवीजी माथोजी धोयो तो मातीडा सुं मांग भरावियाजी ॥६॥ चोखा कुंकूरा रानी तिलक काढ़िया तो नेणां ओ काजल रेकरो जी ॥७॥ जितरे जो नवलादेवी जी सजिया सिनंगारो तो बड़बेरो बंधावण माजी सा सांचरियाजी ॥८॥ जितरे वच्छ-राजाजी बड़बेरोजी बांधीयो तो सरप पकडने गला में गालियो जी ॥९॥ जितरे ओ वच्छ राजाजी गुणिया नवकार तो सरप फूलारी माला होय गई जी ॥१०॥ जितरे ओ वच्छ राजाजी तोरण बांधियो तो सासुजी

ओ टीकण पधारियाजी ॥११॥ चोखा कुंकूरा रानी
तिलक कराया तो चावल रे वदले ओ बिचछू छेडियोजी
॥१२॥ जितरे वच्छ राजाजी गुणिया नवकार तो
बिचूडो मोतीडा रो तिलक होय गयो जी ॥१३॥
आला तो लीला बाबोसा बांस बढावो तो नव-खंडी वेश
मंगावजोजी ॥१४॥ चारों ही दिशा बाबोसा तणी ये
बंधावो तो ऊपर रालो बाला चून्दडीजी ॥१५॥ आला
तो लीला बाबोसा धोब मंगावो तो खेजड़ मंगावो जूनो
झाड़रोजी ॥१६॥ चारों ही दिशा बाबोसा खूंटियां
रोपावो तो तणी ए तणावो काचा सूतरी जी ॥१७॥
जऊ ने तिलारो बाबो सा होम करावो तो घिरत
मंगावो गोरी गायरो जी ॥१८॥ भणिया तो गुणियो
बाबोसा पण्डित बुलावो तो, हरख हथलेवो बाई रो
जुडावियोजी ॥१९॥ इति ॥

॥ वच्छ राजा की तीसरी ढाल ॥

(तर्ज—पेलोडो मंगल वरतियो, टूटा बाबो सा है ।)

पेलोडो मंगल वरतियो, टूटा बाबो सा है आपोजी,
बाबोसा टूटा ने कांई देसी, हाथी केरो आ जोडोजी
देसी गुडलारी आ जोडोजी ॥१॥ दूजोडो मंगल वरतियो,
टूटा काको सा है आपोजी काको सा टूटा कांई देसी,

देसी अन्न धन भण्डारोजी ॥२॥ तीजोडो मंगल
 वरतियो, टूटा मामोसा है आपो जी, मामो सा टूटा ने
 कांई देसी, देसी मायरो पेरायो जी ॥३॥ चौथोडो
 मंगल वरतियो, टूटा नवलादेवी मायोजी माताजी टूटाने
 कांई देसी, देसी हिवडा रो हारोजी ॥४॥ पांचमो
 मंगल वरतियो, टूटा ताराचंद वीरो सा । वीरो सा
 टूटाने कांई देसी, देसी पांच पचास रो दीवलो जी ॥५॥
 पांच पचास रो दीवलो पदमा रे आंगण जिगसीजी
 पदम सरीखी बेनड कद मारे आंगण फिरसीजी । कद
 मारे आंगण रमसीजी ॥६॥इति॥

॥ वच्छराजा की चौथी ढाल ॥

(तर्ज : गूथ लायी मारी मालन सेवरीजी)

आवोनी साला तू मत वाला देनी बेनड ने सीखडी, ले जा
 साँ ओ ले जासां थारी बेन गूथ लायी मारी
 मालन सेवरो जी ॥१॥ आवोनी साली तू चीर झाली
 देनी बेनड ने सीखडी ले जासां ओ ले जासां थारी बेन
 ओ गूथ लायी मारी मालन सेवरोजी ॥२॥ आवोनी
 लाडी बैठोनी गाडी, देनी पीजणिये पाव जी आज रो वासो
 आपरा सहर में जी थारो परायो है देश गूथ लायी माहरी
 मालन सेवरोजी ॥३॥ बाबोसा पहुँचाया आंगणिये जी

माताजी डोड्यारेमांय सहेलियां पहुँचाईघोखे ताईजी वीरा
 बाईरा ठेठो औ ठेठ गूथ लायी मारी मालन सेवरोजी ॥४॥
 धीवड़ पहुँचाई पाछा फिरिया, जी छूटी आंसूडा री धार
 गूथ लायी माहरी मालन सेवरोजी ॥५॥ ए दिवर
 जेठाणियां ने वीनवूं ए, कोई मत जीणजो धीव के ले गयो
 ए ले गयो कालजियो लूंय गूथ लायी मारी मालन
 सेवरोजी ॥६॥ नगरी लोकां ने वीनवूं ए, कोई मत
 जीणजो धीव के ले गयो ले गयो कालजियो लूंय गूथ
 लायी मारी मालन सेवरोजी ॥७॥इति॥

॥ ताग सूरज हथनी बधावा ॥

(तबं : ओ सुरगों रंगो केवडो रे लाल)

रातरा तारा ऊगियो रे लाल, ये तो दिन ऊगा
 सूरज रो उद्योत माहरालाल, हथनी चाली मलकती
 रे लाल, आ तो गई वनिता री पोल माहरा लाल,
 मोरादेवी नन्दन जनमिया रे लाल, आदेश्वर भगवान
 माहरा लाल, नाभि राजा रे बधावना रे लाल, ये तो
 अष्टापद मुगतियां गया माहरा लाल ॥१॥ रातरा
 तारा ऊगियो रे लाल, ये तो दिन ऊगा सूरजा रो
 उद्योत माहरा लाल, हथनी चाली मलकती रे लाल,
 आ तो गई हस्तिनापुर री पोल माहरा लाल, अचला-

देवी नन्दन जनमिया रे लाल, ये तो शांति
 भगवान माहरा लाल, विश्वसेनराजा रे बधावना रे लाल,
 ये तो समेतशिखरमुगतिया गया रे माहरा लाल ॥२॥
 रातरा तारा ऊगियो रे लाल, ये तो दिन ऊगा सूरज
 रो उद्योत माहरा लाल, हथनी चाली मलकती रे लाल,
 आ तो गई शोरियापुर री पोल माहरा लाल, सेवादेवी
 नन्दन जनमिया रे लाल, अरिष्टनेमी भगवान माहरा
 लाल, समुद्रविजयजी रे बधावना रे लाल, ये तो गिरनार
 मुगतिया गया माहरा लाल ॥३॥ रातरा तारा ऊगियो रे
 लाल, ये तो दिन ऊगा सूरज रो उद्योत माहरा लाल,
 हथनी चाली मलकती रे लाल, आ तो गई बाणारसी
 री पोल, माहरा लाल, वामदेवीजी नन्दन जनमिया,
 रे लाल, पार्श्वनाथ भगवान माहरा लाल, अश्वसेन
 राजा रे बधावना रे लाल, ये तो समेतशिखर मुगती
 गया माहरालाल ॥४॥ रातरा तारा ऊगियो रे लाल,
 ये तो दिन ऊगां सूरज रो उद्योत माहरा लाल, हथनी
 चाली मलकती रे लाल, आ तो गई कुण्डलपुर री पोल
 माहरा लाल, त्रिशालदेवी नन्दन जनमिया रे लाल,
 महावीर भगवान माहरा लाल, सिद्धारथ राजा रे
 बधावना रे लाल, ये तो पावापुरी मुगती गया माहरा
 लाल ॥५॥

॥ दीपक मेहन्दी चून्दडी पासे ॥

माता मोरादेवीजीबैठले जे मेरे लाल, ये तो दिवालो बले जगमग रे लाल थे तो ओढो चूंदड सुहावणी रे लाल ॥१॥ ये तो हाथां में मेहन्दी राचती रे लाल, ये तो ओढण चीर चून्दडी रे लाल ॥२॥ ये तो जल भर झारी हाथ में रे लाल, ये तो जावे आदेश्वर रे पास में रे लाल ॥३॥ थे उठो उठो ऋषभकुमार मेरे लाल, थे तो करोनी दान्तनियां वेग सुं रे लाल ॥४॥ आ तो फीणा रोटी दहि पास मे रे लाल, थे तो करोनी कलेवो प्यार सुं रे लाल ॥५॥ ये तो सीरा ने पूडी लापसी रे लाल, ये तो लाडू पेडा नुक्ती पास में रे लाल ॥६॥ ये तो करोनी जीमणियां आदेश्वर रे लाल, ये तो जीम छूटन ने च्लु करयो रे लाल ॥७॥ पचे त्याग्या है सारा संसार ने रे लाल, ये तो चैत्र वदी ने संयम आदरया रे लाल ॥८॥ ये तो धर्म घणा प्रकाशिया रे लाल, ये तो अष्टापद पर पहुँच्या निर्वाण रे लाल ॥९॥

॥ वीरा ॥

(तर्ज-रे जीवा विमल जिनैश्वर सेवीये)

ओ वीरा ऊंची सी मेढी ढलकती, ज्यांरा छे बजड़ किवाडजी मांहे, अंधारे बोलयो कूकडो ॥१॥ वे तो ननन्द भोजाई दोनूं पोढ़िया, वे तो सूता छे सुख भर

नीन्दजी मांहे, अंधारे बोल्यो कूकडो ॥२॥ भावज ओ
 कई पंछी बोलियो, ये तो बोल्यो छे ढलती रात ने मांहे
 अंधारे बोल्यो कूकडो ॥३॥ ये बाईसा ये थांका वर
 बोलिया, ये तो बोल्यो छे ढलती रात ने मांहे, अंधारे
 बोल्यो कूकडो ॥४॥ हे वीरा पौ फाठी दिन ऊगियो,
 बहन पहुँची वीरा रे पास ओ वीरा, दे दो जामण जाया
 आगन्या ॥५॥ हां हे वाई कुण थाने मोसो बोलियो,
 कुण थारी लोपी है कार हे बाई, मत ले जामण जायी
 अगन्या ॥६॥ हां रे वीरा भावज मोसा बोलिया,
 भावज लोपी छे कार हे वीरा, दे दो जामण जाया
 आगन्या ॥७॥ हां हे बाई भावज पग री मोजडी, है
 बाई दिन परणु पचास हे बाई, मत ले जामण जायी
 अगन्या ॥८॥ हां ओ वीरा लावोनी ओगा पातरा, ओ
 वीरा लावोनी सूत्र रो ज्ञान हे वीरा, दे दो ज मण जाया
 अगन्या ॥९॥ हाँ हे बाई छाती भरीजे हिवडो हूबके,
 माहरे नेणां में आंसू धार ये बाई, मत ले जामण जायी
 अगन्या ॥१०॥ हां ये बाई पांव उगाडा चालनो, ये
 बाई करनो उग्र विहार ये बाई, मत ले जामण जायी
 आगन्या ॥११॥ हां रे वीरा छाती ने डट कर राखजो,
 ओ वीरा हिवडे में धरजो धीर ओ वीरा, दे दो जामण
 जाया आगन्या ॥ हां ये बाई पांव उगाडा चालनो, ये

करनो उग्र विहार ये बाई, मत ले जामण जायी
 आगन्या ॥१२॥ हां ये बाई घर-घर फिरनो थाने
 गोचरी, ये बाई करनो माथा रो लोच ये बाई, मत ले
 जामण जायी आगन्या ॥१३॥ हां रे वीरा घर-घर
 फिरस्यां गोचरी, ओ वीरा करस्यां उग्र विहार हे वीरा
 दे दो जामण जाया आगन्या ॥१४॥ हां ये बाई दोष
 बयालीस टालनो, लेनो है सूझतो आहार ये बाई, मती
 ले जामण जायी अगन्या ॥१५॥ हां रे वीरा दोष बया-
 लीयस टालस्यां, ये वीरा लेस्यां, सूझतो आहार रे वीरा,
 दे दो जामण जाया अगन्या ॥१६॥ हां ये बाई माहरी
 तो आज्ञा नहीं लगे, देवेला ससुरा जाया जेठ ये बाई,
 मती ले जामण जायी अगन्या ॥१७॥ हां रे वीरा ससुरा
 जाया जग में है नहीं, माहरे थे छो जामण जाया
 वीर रे भाई दे दो जामण जाया अगन्या ॥१८॥ हां ये
 बाई माता रे आपां दोय लाड़ला, एक वीरो दूजी बहिन
 रे बाई, मती ले जामण जायी अगन्या ॥१९॥ हां ओ
 मारासा कोई ये बेरावे ओगा पातरा, कोई बेरावे सूत्र
 ज्ञान ओ मारासा, मैं बहिराऊं मारी बहिन ने ॥२०॥
 हां ओ मारासा कोई बेरावे लाडू डोवटा, कोई घेवर
 बहिराय ओ मारासा, मैं बहिराऊं मारी बहिन ने
 ॥२१॥ हां ओ मारासा तपस्या थोड़ी करावजो, भूखी

री लीजो संभाल ओ मारासा, मैं महिराऊं मारी बहिन
 ने ॥२२॥ हां ओ मारासा बहन बहिराई पाछा फिरा,
 माहरे छूटी आंसू धार ओ मारासा, मैं बहिराऊं माहरी
 बहिन ने ॥२३॥ हां ओ माहरा सा दान, शील, तप,
 भावना, ओ मारासा कर्म खपाय मुक्ति गया, वरत्या छे
 मंगलाचार ओ मारासा, मैं बहिराऊं माहरी बहिन
 ने ॥२४॥

॥ चौवीसी ॥

(तर्ज—जीओ तपसनजी थारी तपस्या री लेर)

पहला ऋषभनाथ वंदस्या, दूजा अजितनाथ देव,
 जीओ तपसनजी थारी तपस्या री लेर, सुहावनी ।
 गुरणी के वन्ता में सुन्यो ए चेलयां सुं तपस्या न
 होय, वारी तपस्या री चढी रे निर्वाण ।

नोट—इसी प्रकार चौवीस तीर्थकारों का नाम लेना चाहिए ।

॥ चौदह सपना ॥

(तर्ज—माता त्रिशलादेवीजी देख्या भला)

रानी त्रिशलादेवीजी देख्या भलाचौदह सपना,माता
 त्रिशलादेवीजी देख्या भला चौदह सपना ॥टेर॥ राय
 सिद्धारथ त्रिशलादेवी रानी रंग महलमा में पोढ़या सजना

आधी रात पहर को तड़को निद्रा में देख्या भला चौदह
 सपना ॥१॥ सपना देखी ने ततक्षण जागिया, धर्म
 जागरण कीधी सजना । ये सपना सुखदाई आया, अर्थ
 पूछने जाऊं सजना ॥२॥ गजगमणी चाल सुं महलां सु
 उतरया, पिउजी के महलां आया सजना । पोढ़या जानी
 ने कंथ जगावां, मधुरी वाणी बोलया सजना ॥३॥
 वाणी सुनी सिद्धारथ जाग्या, किस कारण तुम आया
 सजनी । भद्रासन बैठन को दीनो तो, सुखसाता तब
 पूछी सजना ॥४॥ राजा रानी सन्मुख बैठ्या, बात करे
 वे तन मन अपना । आधी रात पहर को तड़को, निद्रा
 में देख्या भला चौदह सपना ॥५॥ ये सपना शुभकारी
 आया, अर्थ पूछने आई सजना । सन्मुख बैठी शंका मती
 राखो, बात करो तन मन अपना ॥६॥ पहला सपना
 में गयवर देख्या, दूजे में ऋषभ सुहावना । तीजे सपना
 में सिंहज देख्या, तो चौथे में लक्ष्मी देवता ॥७॥
 पांचवे सपना में पंचवर्णी माला, छठे में चन्द्र अमी
 जरे । सातवें सूरज, आठवें ध्वजा, नवमें कलश रत्ना
 जड़ियो ॥८॥ पदम सरोवर दसमां देख्या, क्षीर समुद्र
 स्वामी ग्यारहमां । देव विमानज बारहमां देख्या, हण-
 झुण घन्टा बाजन्ता ॥९॥ रत्नां री राशि तेरहवीं
 देखी, धूप शिखा स्वामी चौदहवां । सपना सुनी

सिद्धारथ बोलया, पुत्र तीर्थकर होसी सजनी ॥१०॥
हम कुल नन्दन तुम तिलक ललाटो, त्रिभुवन स्वामी
होसी सजनी । ये सपना राजा सुन हर्षा तो, धर्म
जागरण कीधी सजना ॥११॥ ये सपना मरुदेवी ने
देख्या. तो नाभि राजा घर बधावना । ये सपना अचला
देवी देख्या, विश्वसेन घर बधावना ॥१२॥ ये सपना
सेवादेवी देख्या, समुद्रविजय राजा घर बधावना । ये
सपना वामादेवी देख्या, अश्वसेन राजा घर बधावना ।
ये सपना त्रिशलादेवी देख्या, सिद्धारथ राजा घर
बधावना ॥१३॥

॥ झालर, हथनी, तारा, दीपक, सूरज, बधावना ॥

(तर्ज—बागों में बाजा जंगी ढोल)

तारा तो चमके है रात, महलां में दिवलो जल
रह्योजी, मोरादेवीजी जायो है पूत, देवांगणा उच्छव
करेजी, सूरज ऊगियो तिणवार, नाभि राजा रे घर
बधावनाजी, मोच्छव मण्ड्यो तिणवार, हथनी सिनंगा-
रिया जी, बैठा आदेश्वर भगवान, मंगल बाजा बाज-
ताजी, झालर रे झणकार, दुनिया सगली जागतीजी,
संयम लिया भगवान, तीरथ चार स्थापियाजी, प्रभुजी
तो दियो उपदेश, जुगलिया धर्म निवारियाजी, अष्टापद
ऊपर भगवंत मोक्ष सिधारियाजी ॥१॥

तारा तो चमके है रात, महलां में दिवलो जल रह्योजी, अचलादेवीजी जायो है पूत, देवियां उत्सव करेजी, सूरज ऊगियो तिनवार, विश्वसेन राजा रे घर बधावना जी, मोच्छव मण्ड्यो तिनवार, हथनी सिनंगारियाजी बैठा शान्तिनाथ भगवान, मंगल बाजा बाजताजी, झालर रे झणकार दुनियां सगली जागतीजी संयम लिया भगवान, तीरथ चार स्थापियाजी। प्रभुजी तो दियो उपदेश, शांति वरतावियाजी। समेत शिखर पर्वत पर, मोक्ष सिधारियाजी ॥२॥

तारा तो चमके है रात, महलां में दिवलो जल रह्योजी। सेवादेवीजी जायो है पूत, देवांगणा उत्सव करेजी। सूरज ऊगियो तिणवार, समुद्रविजयजी राजा रे घर बधावनाजी। मोच्छव मंड्यो रिणवार हथनी सिनंगारियाजी। बैठा अरिष्टनेमी भगवान मंगल बाजा बाजताजी। झालर रे झणकार दुनियां सगली जागतीजी, प्रभुजी तो संयम आदरिया, तीरथ चार स्थापियाजी। प्रभुजी तो दियो उपदेश, पशुव छुडावियाजी। गिरनार पर्वत पर, भगवंत मोक्ष सिधारियाजी ॥३॥

तारा तो चमके है रात, महलां में दिवलो जल रह्योजी, वामादेवी जायो है पूत, देवांगणा उत्सव करे जी सूरज ऊगयो तिणवार, अश्वसेन राजा रे घर बधा-

वनाजी । मोच्छव मंड्यो तिणवार, हथनी सिनगारिया जी । बैठा पाश्वर्नाथ भगवान, मंगल बाजा बाजताजी । झालर रे झणकार दुनियां सगली जागतीजी, प्रभुजी तो संयम आदरया, तीरथ चार स्थापियाजी । प्रभुजी तो दियो उपदेश, कमठ हटावियाजी, समेतशिखर पर्वत पर, मोक्ष सिनारियाजी ॥४॥

तारा तो चमके है रात, महलां में दिवलो जल रह्योजी । त्रिशलादेवीजी जायो है पूत देवांगणा उत्सव करेजी । सूरज ऊगियो तिणवार, सिद्धारथ राजा रे घर बधावनाजी । मोच्छव मंड्यो तिणवार, हथनी सिनगारियोजी । बैठा महावीर भगवान, मंगल बाजा बाजताजी । झालर रे झणकार दुनियां सगली जागतीजी । प्रभुजी तो संयम आदरया, तीरथ चार स्थापियाजी । प्रभुजी तो दियो उपदेश मेरु कंपावियाजी । पावापुरी में भगवंत, मोक्ष सिधारियाजी ॥५॥इति॥

॥ चून्दडी ॥

(तर्ज—रंगाओ नेमीश्वर चून्दडीजी)

कीना जी तो बंधारो बुलावियोजी, कीना जी ये रंगरेजो बुलाय, रंगाओ नेमीश्वर चून्दडीजी ॥टेर॥ समुद्रविजयजी बंधारो बुलाविजयाजी, उग्रसेनजी

रंगरेजो बुलाय । रंगाओ नेमीश्वर चून्दडीजी ॥१॥

पांच रुपया रो पोत मंगावजो जी,
हाडोती हल्दी मंगाय । रंगाओ ॥२॥

शोरिया पुर सुं बंधारो बुलावजो जी
तो नानी-नानी बंदना बंधाय ॥३॥

कुण सा चून्दड मोलवे जी,
वे तो कुण सा खर्चैला दाम ॥४॥

उग्रसेन जी चून्दड मोलवेजी,
समुद्रविजयजी खर्चैला दाम ॥५॥

नेमीश्वर ले घर आवियाजी,
ओढ़ सती राजुल नार । रंगाओ ॥६॥

ओढ़ पहरने राजुल नीसर्याजी,
आया है मथुरा रे बाग । रंगाओं ॥७॥

संजम राजुल आदर्योजी,
पाया है केवल ज्ञान ॥८॥

चौपन, दीनो का आंतरा जी
पिऊ पहले पहुँच्या निर्वाण,
रंगाओ नेमीश्वर चून्दडीजी ॥९॥

॥ मेहन्दी ॥

(तर्ज—सेवरियो तो पेरे मारा बनडा हठ लियोजी)

बनिता रे रावल गढ रे चौक,
मरुदेवी हाथ मंडावियाजी ।
विनजो-विनजो केसर ने कपूर,
मेहन्दी रा दोय डाबलाजी ॥१॥

हस्तिनापुर रे रावलगढ रे चौक,
अचलादेवीजी हाथ मंडावियाजी ।
विनजो-विनजो केसर ने कपूर,
मेहन्दी रा दोय डाबलाजी ॥२॥

शोरियापुर रे रावलगढ रे चौक,
सेवादेवीजी हाथ मंडावियाजी ।
विनजो-विनजो केसर ने कपूर,
मेहन्दी रा दोय डाबलाजी ॥३॥

बणारस पुर रे रावलगढ रे चौक,
वामादेवीजी हाथ मंडावियाजी ।
विनजो-विनजो केसर ने कपूर,
मेहन्दी रा दोय डाबलाजी ॥४॥

कुण्डलपुर रे रावलगढ रे चौक,
त्रिशलादेवीजी हाथ मंडावियाजी ।

विनजो-विनजो केसर ने कपूर,
मेहन्दी रा दोय डावलाजी ॥५॥

॥ कलेवां ॥

(सर्ज : गुणभर ओरी ने पोढ़िया है गौरी तो)

माता त्रिशलादेवीजी बोले वर्द्धमान तो, बोले
वर्द्धमान तो, कलेवो करो दिन ऊगियोजी ॥१॥ जल
भर झारी हाथ रे मांय तो, दान्तण करौनी जाया वेग
सुंजी ॥२॥ माखण रोटी लावो माहरी मांय तो,
जलेबी ने दूध भर लावो माहरी माय तो,
बाटकोजी ॥३॥ कलेवो तो कीनो माताजी रे हाथ तो,
माताजी रे हाथ तो, भावजीरा हाथ सु जीमणोजी ॥४॥
लाडू ने पेडा तो सरस जलेबी तो, सरस जलेबी तो,
घेवरिया तो लावो चिनी खांडरोजी ॥५॥ दोपारी तो
करावो माहरी सुदर्शना बहन तो, सुदर्शना बहन तो,
गिरी ये गिदोला गूंद पाकरोजी ॥६॥ व्यालु कराओ
महारा नाना ओ चेटक राजा, नाना ओ चेटक राजां,
दाल चावल ने खिचडीजी ॥७॥ व्यालु तो करने बैठा
महल मांय तो बैठा महल मांय तो, दिन ऊगा परण घर आ-
वियाजी ॥८॥ नंदिवर्धन से करे अरदास तो, करे अरदास
तो आज्ञा देवो संजम आदरस्यांजी ॥९॥ नंदिवर्धन

वीरा तो दीक्षा उच्छव मंडाया तो, दीक्षा उच्छव मण्डाया
तो, चौंसठ इन्द्र मिल आवियाजी ॥१०॥ संजम पालयो
प्रभु कठिन आचार तो, कठिन आचार तो, कर्म खपाय
हुआ केवलीजी ॥११॥ चार तो तीरथ स्थाप्या महावीर
तो, पावापुरी में मुगते गयाजी ॥१२॥

॥ चौवीसी ॥

(तर्ज : झंडा ऊंचा रहे हमारा)

धर्म सूर्य युग-युग के सारे,
जय-जय-जय-तीर्थकर प्यारे ॥टेरे॥
ऋषभ-अजित-संभव-अभिनन्दन,
सुमति पदमप्रभु सुपाइवं चन्दा,
सुविधि शीतल शुभ सत्य सहारे ॥१॥
प्रभु श्रेयांस वासपूज्य घ्याये,
विमल अनन्त धर्म गुण गाये ।
शान्ति अखण्ड शान्ति विस्तारे ॥२॥
कुन्थु, अर, मल्लि ब्रह्मचारी,
मुनि सुव्रत नमि प्रभु अवतारी ।
अरिष्टनेमी है नाथ दुलारे ॥३॥
पारस प्रभु वर्द्धमान सुहाये,
महावीर विख्यात कहाये ।
शासनपति श्रद्धेय हमारे ॥४॥

॥ चौवीसी ॥

(तर्ज : जय बोलो महावीर स्वामी की)

जय बोलो प्यारे जिनवर की
उन विश्व पूज्य तीर्थकर की ॥टेर॥
श्री ऋषभ अजित संभव स्वामी,
अभिनन्दन जी अन्तरयामी,
उस सुमति पदम परमेश्वर की ॥१॥
सुपाश्व चन्दाप्रभु ध्याना है,
श्री सुविधि शीतल को मनाना है,
श्रेयांस वासपूज्य प्रभुवर की ॥२॥
विमल अनन्त श्री धर्म प्रभु,
श्री शान्ति कुन्थु अरहनाथ विभु,
मल्लि मुनिसुव्रत व्रतकर की ॥३॥
नमि नेम पाश्व जिनराया,
महावीर का शासन सवाया है,
कौशल्या कुमारी के हितकरकी ॥४॥

॥ चौवीसी ॥

(तर्ज : देख तेरे संसार की हालत)

सुबह शाम तुम आवो गावो, प्रभुजी के गुण गान
जिनेश्वर चौवीसी भगवान ॥टेर॥ पाप ताप संताप

मिटायै, पाये पद निर्वाण ॥जि०॥ ऋषभ
 अजित संभव सुखकारी, अभिनन्दन सुमति दिलधारी ॥
 पदम, सुपारस, ममता मारी, चंदाप्रभु सब मोक्ष
 विहारी । जन्म मरण सब मेटे इनने, बन गये सिद्ध
 महान ॥१॥ सुविधि शीतल जैसे चन्दा, श्रेयांस वास-
 पूज्य जिनन्दा ॥ विमल अनन्त धर्म मुनिन्दा, शान्ति
 प्रभु है अचलानन्दा ॥ भव भ्रमण का दुःख मिटाया,
 पा कर केवल ज्ञान ॥२॥ कुन्थु अर मल्लि जिन प्यारा,
 मुनि सुव्रत मनमोहनगारा ॥ नमि नेम पार्श्व
 सितारा, महावीर शासन सिरदारा । मोक्ष नगर में
 जाय विराजे, कर आत्म कल्याण ॥३॥ गणधर ग्यारह
 जगहित कारा, विहरमान है बीस प्यारा अनंत चौबीसी
 सुख में सारा, गुरुदेव शासन सिरदारा मालेगांव में
 हरिऋषि कहे, धरो प्रभु का ध्यान ॥४॥

॥ सपना ॥

राय सिद्धारथ घर पटराणी, नाम त्रिशला
 सुलक्षणीजी, राजभवन मांहे पलंग पोढ़ता, चवदह
 सपना रानी देखियाजी ॥१॥ पहले ओ सपने में गयवर
 देख्यो, दूजो ऋषभ सुहावनो, तीजे सिंह सुलक्षणो
 देख्यो, चौथे लक्ष्मी देवताजी ॥२॥ पांचवें पंच वर्णो

फूलनी माला, छठे चन्द्र अमी झरेजी, सातवें सूरज,
 आठवीं ध्वजा, नव में कलश अमी भरयोजी ॥३॥ पद्म
 सरोवर दसवें देख्यो, क्षीर समुद्र देख्यो ग्यारहवांजी,
 देव विमान बारहवां देख्या, रुणझुण घन्टा बाजंताजी
 ॥४॥ रत्नांरी राशि तेरहवां देखी, अग्निशिखा देखी
 चौदहवींजी, चवदह सपना देखी रानीजी जागिया, राय
 समीपे पहुँचियाजी ॥५॥ सुनो ओ स्वामी मैं तो सपना
 जी देख्या, पाछली रात रलियावणीजी, राय सिद्धारथ
 पंडित तेड्या, कहो रे पंडित एहनोजी ॥६॥ हम कुल
 मण्डन तुम कुल दीवो, जयवंता तीर्थकर जन्मसीजी,
 जे नर गावे ते सुख पावे, आनंद रंग बधावनाजी ॥७॥

॥ सपना ॥

(तर्ज—माहरी रस सहेलडी आज आदेश्वर क्येनो)

माने सपना दीठा, अरज सुन लीजो माहरा बालमां ॥टेरे॥
 पहले गयवर देखियासरे, दूजे ऋषभ सुलक्षण,
 तीजे सिंह सुलक्षणोसरे, चौथे लक्ष्मी देवजी ॥१॥
 युगल माल फूल की सरे, छट्ठे देखी चन्द ।
 सातवें सूरज देखियासरे, आठवें ध्वजा पतंग ॥२॥
 नवमें कलश रत्नां जडियोसरे, दसमें पद्म सरोवर ।
 क्षीर समुद्र ग्यारहवांसरे, बारहवें देवविमानजी ॥३॥

रत्नारी राशि तेरहवांसरे, अग्नि शिखा बहु तेज ।
सिद्धारथ राजा ने पूछतासरे, अर्थ दियो फरमायजी ॥४॥

॥ बड़ा सपना ॥

(तर्ज : सोमा रूपा रा दोव ओवरा चन्दन जडिया किवाड, उठे पोढ़या
है बनी रा दादासा)

अगर चन्दन का जी ओवरा ओ जी पाना
फूलारी पटसाल सपना लाद्याजी ढलती रात का ॥टेरा॥
ऊंची सी मेडी ढल रहीजी, तो दिवलो बले मझार,
सपना लाद्याजी ढलती रात का ॥१॥ जठे नाभि राजा
पोढियाजी, ओ रानी जाय जगाय, सपना लाद्याजी
ढलती रात का ॥२॥ पोढया जागो ओ नाभि राजाजी,
ओ जी सपना रो अर्थ बताय, सपना लाद्याजी ढलती
रात का ॥३॥ पहले सपने जी गयवर देखियाजी, ओ
जी राज दरबार रे मांय, सपना लाद्याजी ढलती रात
का ॥४॥ दूजे सपनेजी वृषभ देखियाजी, ओ जी गाय
गवाडिया रे मांय, सपना लाद्याजी ढलती रात का ॥५॥
तीजे सपना में सिंहज देखियाजी ओ जी देख्या है
साधु मुनिराज, सपना लाद्याजी ढलती रात का ॥६॥
चौथे सपने में लक्ष्मी देवताजी, ओ जी अन्न-धन्न भरया
है भण्डार, सपना लाद्या जी ढलती रात का ॥७॥ पांचवें

सपने में माला देखियाजी, ओ जी पांच वर्ण का फूल,
 सपना लाद्या जी ढलती रात का ॥८॥ छठ्ठे सपने ओ
 चांद पंचासियांजी, ओ जी असंख्य तारा रे मांय, सपना
 लाद्या जी ढलती रात का ॥९॥ सातवें सपने में सूरज
 देखियाजी, ओ जी सहस्र किरण रा राय, सपना लाद्या
 है ढलती रात का ॥१०॥ आठवें सपने में ध्वजा
 देखियाजी ओ जी चारों ही दिशा लहरया लेय, सपना
 लाद्या है ढलती रात का ॥११॥ नवमें सपने में कलश
 देखियाजी, ओ जी भरियाजी पूरापूर, सपना लाद्या है
 ढलती रात का ॥१२॥ दसमें सपने में पद्म सरोवर
 देखियाजी, ओ जी श्वेत कमल तंतसार, सपना लाद्या
 है ढलती रात का ॥१३॥ ग्यारहवें सपने क्षीर समुद्र
 देखियाजी, ओ जी, क्षीर को जैसो नीर, सपना लाद्या
 है ढलती रात का ॥१४॥ बारहवें सपने में देवविमान
 देखियाजी, रुण-झुण घंटा बाजे, सपना लाद्या है ढलती
 रात का ॥१५॥ तेरहवें सपने में रत्नारी राशि देखिया
 जी, ओ जी रत्ना सुं भरया भण्डार, सपना लाद्या है ढलती
 रात का ॥१६॥ चौदह सपने में अग्निशिखा देखियाजी
 ओ जी दीपती है निर्धूम, सपना लाद्या है ढलती रात
 का ॥१७॥ पूत तीर्थकर जन्मसीजी, ओ जी हम कुल
 तुम आधार, सपना लाद्या जी ढलती रात का ॥१८॥

नव दस मास पूरा थयाजी, ओ जी जन्मा छे पुन्यवंत
 पूत, सपना लाद्या है ढलती रात का ॥१९॥ चौसठ
 इन्द्र चली आवियाजी, ओ जी छप्पन दिशा कुमारी,
 सपना लाद्याजी ढलती रात का ॥२०॥ अशूचि कर्म
 निवारनेजी, ओ जी गावे है मंगलाचार, सपना दीठा है
 ढलती रात का ॥२१॥ इसडा सपना अचलादेवी
 देखियाजी, ओ जी शान्तिनाथ री माय, सपना लाद्या
 जी ढलती रात का ॥२२॥ इसडा सपना सेवादेवीजी
 देखियाजी, ओ जी नेमीनाथ री माय, सपना लाद्या जी
 ढलती रात का ॥२३॥ इसडा सपना वामादेवी देखिया
 जी, ओ जी पार्श्वनाथ री माय, सपना लाद्याजी ढलती
 रात का ॥२४॥ इसडा सपना त्रिशलादेवीजी देखियाजी
 ओ जी महावीर री माय, सपना लाद्याजी ढलती रात
 का ॥२५॥

॥ मेहन्दी और चून्दी ॥

(तजं : थारी थारी ओ बेइजी नार बही बूध)

थारी २ मोरादेवी कूख, रतन जडाव सुं जडी ।
 थारी २ अचला देवी कूख, हीरा जडाव सुं जडी ।
 जठे जनमिया है आदिनाथ देव, छप्पन करोड का धणी
 जठे जनमिया है शान्तिनाथ देव, छप्पन करोड का धणी,

मांरी बिंदली लाल गुलाल, मोतीडा सु मांग भरी
 आपरी अंगिया है कसुमल रंग, गोटा जडाव सु जडी
 आपरी चून्दडी है लाल सजीठ तो नखामेहंप राच रही
 मां रे ओढन दिखनी चीर, तो नेणा सुरमा सार रही ।
 माता बैठा है गलीचा डाल, बहुबेटियां हाजर खड़ी ।
 वे तो लुल लुल लागेली पाय, अमर आशीश घणी ।
 नोट : इसी तरह अन्य माताओं और तीर्थकरों का नाम लेना चाहिए ।

॥ बधाओ और चून्दडी ॥

(तर्ज—बधाओ जी मारो आवियो)

मोतियां रा लूमक झूमका, कस्तूरी ओ राजा
 बंदरवाल बधावो जी माहरे आवियो ॥१॥ बांधु नाभि
 राजा रे ओवरे, बांधु विश्वसेन राजा रे ओवरे । ज्यां
 जाया ओ आदिनाथ देव, बधावोजी माहरे आवियो ॥
 ज्यां जाया ओ शान्तिनाथ देव बधावो जी माहरे आवियो
 ॥१॥ जाया रा हरष बधावना, संजम रे ओ प्रभु लाड
 ने कोढ़, बधावो जी माहरे आवियो ॥२॥ चार रंगाओ
 चोखी चून्दडी, परदेशन ओ आयी सुभद्रा ओढाय,
 बधावो जी माहरे आवियो ॥३॥ चार मंगाओ चोखा
 चूडला, परदेशन ओ आई बहिन पहराय, बधावो जी
 माहरे आवियो ॥४॥

॥ चून्दडी ॥

(तर्ज—माया सीता की गोदी में डाली मूंदडी)

ओढ़ो-ओढ़ोजी सुहागिन, पतिव्रता धर्म की चून्दडी
जी ॥टेरे॥ मल-मल विद्या की बनवाओ, रंगत बुद्धि
की चढवाओ, गोखरु गोटा ज्ञान का लाओ, बून्टा सत्य
शास्त्र अनुसार जगत में चमके चून्दडीजी ॥१॥ सुरमा
शीलव्रत का धारो, मिस्सी मीठा वचन उच्चारो, टीकी
पर उपकार की धारो, पति की सेवा करो हरबार,
सुहाग की ओढ़ो चून्दडीजी ॥२॥ थे तो ओढ़ोनी चूपा
चतुर्शई की पहनो, बाजुबंद दया को परो; लाज रूपी
नथ से सोहे चेहरो, झेलो झूठ कभी मत बोलो, जीव
से प्यारी चून्दडीजी ॥३॥ खांच समता मन में लेवो,
ससुरा का हुक्म उठावो, सच्चा दिल सुं पति ने चावो,
दूसरी प्रेम और प्रीति की, एक घडवालो मून्दडीजी
॥४॥ हृदय हार ज्ञान का पहनो, माला धीरजता को
गहनो, ठुस्सी मान बड़ा को कहनो, तिमणियो सास
ससुर सेवा जान, प्रीत की ओढ़ो चून्दडीजी ॥५॥

• • •

॥ चून्दडी ॥

(तर्ज—नगरी-नगरी द्वारे-द्वारे)

छोटी-मोती बहिनों पहनो, शील की चून्दडियां
प्यारी-ग्यारी चून्दडियां पर, रीझेंगे सावरिया ॥१॥
शीश फूल टीका या किलीफ, होबडो के मान का,
शास्त्र श्रवण साहित्य गीत का, एरिंग होवे कान का,
समता रखना दुःख में भी, नहीं बरसाना बादरिया ॥२॥
पतिव्रता धर्म की बिंदिया सोहे, लज्जा का जल आँख
में, घर समाज ओ नीति रीति का, सुन्दर लोंग हो कान
में, पान की लाली मीठी बोली, बोलो बन कोयलिया,
॥३॥ चतुराई का चोली पोलका, नेकलिस होवे ज्ञान
का अच्छे स्वास्थ्य का भुजबन्द पहनो, घडी चुडियां
दान की, बुरी नजर से कभी न देखो, नीची रखो
नजरिया ॥४॥ सत्य धर्म का लहंगा पहनो, कर
देना शुभ कर्म का, भक्ति रंग की महावर मेहन्दी,
बिछिया अहिंसा धर्म का, अच्छी चाल की पहनो पग
में, झुनक-झुनक पायलिया ॥५॥ यह चून्दडी सुभद्रा
ओढी, राजमती सीता सती, ओढी चन्दना, ओढी
अंजना, कलावती-मैनावती, 'केवलमुनि' यश चम चम
बमके, ओढो रे सुन्दरियां ॥६॥

॥ चून्दडी ॥

(तर्ज—मारो बालो भूखो छे प्रेम नो ए)

बहनों ओढ़ो शियलनी चून्दडीजी, ओढ़्या लागे
सुहावनी नार ॥ बहनो ॥टेरा॥ प्रेम भक्ति नो कापडो
मंगावजो रे, पछे धर्म को रंग लगाय ॥१॥ गुरु भक्ति
नो गोटो लगावजो रे, पछे ज्ञान को गोकुल लगाय
॥२॥ पछे तपस्या रो फीता लगाव जो रे, दया दान
का फूल जडाय ॥३॥ जम्बु स्वामीजी री आठों ही
कामनिया रे, चून्दड़ ओढ़ी है मन हुलसाय ॥४॥ वलि
राम की प्यारी जानकी रे, दियो सुभद्राजी कलंक उतार
॥५॥ आदेश्वर जी रे दोनों डीकरिया रे, चून्दड़ ओढ़ी
है कर्म खपाय ॥६॥ वलि चन्दन बाला आदि सतियां
हुई है, चून्दड़ ओढ़ी है मन हुलसाय ॥७॥ शान्तिदेवी
ने हृदय में धार लो रे, मत करजो झगडा क्लेश ॥८॥
पूज्य अमोलक ऋषिजी फरमावियो रे, छोड दियो विषय
कषाय ॥९॥ इति ॥

॥ साद का गीत ॥

(तर्ज—डूंगर ऊपर डूंगर रायनेम, जिन पर नींबु)

समोसरण में विराजिया भगवंत, ओ जी गौतम-
स्वामी है पास, प्रश्न इम पूछिया भगवंत ॥१॥ गर्भ में

जीव, किम रेवे भगवंत । ओ जी उत्तर सुन भविक
 अचरज पाया है भगवंत ॥२॥ नीचो सिर ऊंचो, पग
 रेवे गौतम । ओ जी रक्त वीर्य को आहार लेवे, असुचि
 में रेवनो गौतम । ३॥ पुन्यवंत गर्भ में आवे तब, शुभ
 सपनो लेवे गौतम, ओ जी चवदे सपना देखे, तीर्थकर
 मायडी गौतम ॥४॥ चक्रवर्ती री माता, चवदे सपनो
 देखे है गौतम । पण वह अस्पष्ट देखती, इम जानजो
 गौतम ॥५॥ वासुदेव री माता, सात सपनो देखे हे
 गौतम । ओ जी बलदेव री माता, चार सपनो देखे हे
 गौतम ॥६॥ माण्डलीक राजा री माता, एक सपनो
 देखे हे गौतम । ओ जी साधु री माता, एक सपनो देखे
 है गौतम ॥७॥ तीजे मास डोहलो, उपजे गौतम । ओ
 जी डोहला ऊपर फरकजे, पुन्य-अपुन्यवंत गौतम ॥८॥
 गर्भ तणी करे प्रति, पालन गौतम । ओ जी अनुकंपा
 दिल लाय ने, सुनो आगे है गौतम ॥९॥ खाटो, मीठो,
 चरको, परपरो गौतम । ओ जी खानो थोड़ो प्रमाण,
 बहुत नहीं खावनो गौतम ॥१०॥ ठंडो, ऊणो, लूखो,
 बासी, चोपड्यो गौतम, ओ जी लेनो अल्पज आहार,
 जिम गर्भ सुख पावे गौतम ॥११॥ मीठी, मेठ, नहीं
 खावनो गौतम, ओ जी नहीं खावनो कोयलो राख, गर्भ-
 पात होवे गौतम ॥१२॥ जतना सुं उठ, बैठनो गौतम ।

ओ जी जतना सुं चलनो धीमी चाल, जिम गर्भ सुख
पावे गौतम ॥१३॥ नीची होई मेंदो नहीं काढ़नो
गौतम । ओ जी चूला-चक्की को काम नहीं लेवनो,
करनो धर्म क्रिया गौतम ॥१४॥ क्रोध, भय नहीं लावनो
गौतम, ओ जी नहीं करनो झगडो टंटो, गर्भ क्रोधी
होवे गौतम ॥१५॥ ब्रह्मचर्य नित, पालनो गौतम । ओ
जी खिम्पा करनो मन मांय, पुन्यवंत जन्मसी गौतम
॥१६॥ गर्भ का नियम बताविया गौतम, ओ जी दोष
टालने चालसी, पुन्यवंत माता गौतम ॥१७॥

॥ साद का गीत ॥

(तर्ज—पहलो मास उल्लियो राज भंवरणी)

पहलो मास जो लाग्यो ओ प्रीतमजी, मारे दूध
शक्कर मन लाग्यो माराराज । आ तो साद भलेरी हे
महारानी, थे नित को दूध पीवो माराराज ॥१॥ दूजो
मास जो लाग्यो ओ प्रीतमजी, मारे दारे दान देवन मन
लाग्यो माराराज । आ तो साद भलेरी हे महारानी थे
नित को दान जो देवो माराराज ॥२॥ तीजो मास जो
लाग्यो ओ प्रीतमजी, मारो शील पालन मन लाग्यो
माराराज । आ तो साद भलेरी हे महारानी, थे नित
को शील जो पालो माराराज ॥३॥ चौथो मास जो

लाग्यो ओ प्रीतमजी, मारो तपस्या करन मन लाग्यो
 माराराज । आ तो साद भलेरी हे महारानी, थे नित
 की नौकारसी करजो माराराज ॥४॥ पांचमो मास जो
 लाग्यो ओ सुसराजी, मारे सामायिक करन मन लाग्यो
 माराराज । आ तो साद भलेरी हे कुलबहु, थे नित
 करजो सामायिक माराराज ॥५॥ छट्ठो मास जो
 लाग्यो ओ सासुजी, मारो सूत्र सुनवां मन लाग्यो मारा-
 राज । आ तो साद भलेरी हे कुलबहु, थे नित का सूत्र
 सुनजो माराराज ॥६॥ सातमो मास जो लाग्यो ओ
 पिताजी, मारो घेवरिया मन लाग्यो माराराज । आ
 तो साद भलेरी हे दीवडली में घेवरिया जिमाऊं मारा-
 राज ॥७॥ आठमो मास जो लाग्यो ओ वीराजी. मारो
 सीरा पूड़ी रा मन माय माराराज । आ तो साद भलेरी
 हे मारी बेनडी, मैं सीरा लापसी जिमाऊं माराराज
 ॥८॥ नवमो मास जो लाग्यो ओ माताजी, मारे अजमो
 सूठ मन लाग्यो माराराज, आ तो साद भलेरी मारी
 दीवडली, थाने लाडू मैं जिमाऊं माराराज ॥९॥ अबे
 तो बालक जनमियो हे मारी मावडीं, नवकार मंत्र
 सुनावो मारी माय । गुटकी ऐसी दीजे हे मारी
 मायडी, दुनियां में नाम कमावसी मारी माय ॥१०॥
 इति॥

घुटकी का गीत

(तज—अभी भूख से रोते-रोते लाल हमारा)

पांखों बाहर बालो आयो, माता बेन सुनावे यूँ ।
 मारी कूख दिपाइजे रे बाला, मैं थने सखरी घूटी दूँ ।
 तेज कटारी नालो मोड्यो, नालो मोडत बोली यूँ ।
 दुष्मन की फौजों में जायजे, जय विजय कर आयजे
 तूँ ॥१॥ पांखों बाहर बालो आयो, माता बेन सुनावे यूँ ।
 महलां चढ़ने थाल बजावे, थाल बजावत बोली यूँ ।
 चार खूंट चौताला बीच में, नौपतडी बजवायजे तूँ ॥२॥
 पांखों बाहर बालो आयो, माता बेन सुनावे यूँ ।
 कुआ पूजन घर से निकली, कलशां भरती बोली यूँ ।
 चार खूंट चौताला बीचमें, आरतडी करवायजे तूँ ॥३॥
 पांखों बाहर बालो आयो, माता बेन सुनावे यूँ ।
 गोदियां सूतो बालो चूंगे माता वचन सुनावे यूँ । धोला
 दूध में कायरता को, कालो दाग न लगायजे तूँ ॥४॥
 पांखों बाहर बालो आयो, माता बेन सुनावे यूँ ।
 सोने पालन बालो जूले, जूले जुलावत बोली यूँ । सारी
 पृथ्वी हिलायजे रे बाला, मैं थने जितरे जोला दूँ ॥५॥
 पांखों बाहर बालो आयो, माता वचन सुनावे यूँ ।
 शहर जोधाणा मायें आवे, दौलत राम सुनावे यूँ ।
 माता शिक्षा ऐसी देवे, फिर वो बालक बिगडे क्यूँ ॥६॥

बच्चे के जन्म होने के बाद बोलने का गीत

(तर्ज—तालो तो कुण खटकावियाजी कांई रेण पाछलड़ी रात ।)

बाई तो सूता नींद में जी कांई, प्रसूती वेदना प्रगटाय ।
उठो प्रीतमजी वेग सुं जी मारी, दाय माता ने बुलाय ।
दाय माता तो आवियाजी कांई जनम्या है पुत्र-पुत्री जान
तीक्षण छुरियां मंगायने जी कांई, चार अंगुल प्रमाण ।
नालो तो काटयो विवेक सुं जी कांई, बालक दुःख नहीं पाय
सासुजी ने वेगा बुलावजो जी कांई, थाल बजायो तिणवार
सुसराजी ने वेगा बुलावजो जी कांई, नवकार मंत्र सुनाय ।
घुटकी दिरावो गुड़ की जी कांई, शुभ वेलारे मांय ।
गंगा जल सुं नवावियाजी कांई, पीलोजी पाट पलेट ।
पिताजीने वेगा बुलावजो जी कांई, चन्द्र सूर्य दर्शन कराय ।
छट्टे दिन धर्म जाग्रना जागनाजी कांई, नारियां मंगलगाय ।
ग्यारहवें दिन अशुचि निवारनेजी कांई, नावण धोवण कराय
नाई रो बेटो बुलावजोजी कांई, आंगण साफ कराय ।
मोतियांरा चौक पुरावजोजी कांई, पगलियां देवो मंडाय ।
कुंभार ने वेगा बुलावजोजी कांई, कुंभ कलश लेने आय ।
खाती ने वेगा बुलावजोजी कांई, बैठन पाट जो लाय ।
पंडित ने वेगा बुलावजोजी कांई, कंवरा रा नाम दिराय ।
पीलो तो ओढ़ पाट विराजियाजी कांई, बालक लीनो गेद

मांय, बायां तो मंगल गावतीजी कांई, बाजा तो शुभ बजाय
 पिताजी ने वेगा बुलावजो जी कांई, दशोटन देश कराय।
 लाडु पेडाने घेवर बर्फियांजी कांई, नाना विधि रा पकवान
 भोजन सगला जीमियाजी कांई, वस्त्र भूषण दिराय।
 बधाइयां बटो सारा शहर में जी कांई, बरतिया है
 जय-जयकार चिरंजीवो बालक-बालिका कांई, दिनो है
 शुभ आशिवाद ॥

॥ पीपरा मूल का गीत ॥

(तर्ज—समुदां रे पेले अजमोजी बायो)

महलां रे मांय तो पिलंग बिछायो, नरम बिछानो
 बिछावजो जी ॥ ऊठनो, बैठनो, चलनो, ने फिरनो,
 सात दिन तक न करोजी ॥ सेवा रे मांयने पास में
 रेवणो, बालक ने माता सुख पावसीजी ॥ सुसराजी जाय
 बाजार के मांय, पीपरा मूल लायो उतावलीजी ॥ पीपरा
 मूल पियां थी सरदी मिट जावसी, अजमां थी वादी
 मिट जावसीजी ॥ सूठ खायां सुं तन पित नहीं होवे,
 लोद ने गूद ठंडी करेजी ॥ गाय ने भेंसरो धिरत जिमाय
 जो, ठंडा ने लूखा, बासी मत खावजोजी ॥ खाटा
 खटाई ने चरका आचार, कुपथ्य खायां रोग उपजेजी ॥
 इसडी तो चीजां ए खायां सु ए बायां, तन में तो शक्ति

घणी रेवेजी ॥ बालक ने दूध निर्मल जो आवे, पीयने ओ बालक सुखी होवेजी ॥ वीर तो निकलने धर्म दिपावे, कुल दिपावे, वस्त्र नरम पेरावजोजी ॥ गहनो तन पर नानाजी मत पेरायजो, मामाजी मत पेरायजो, बालक री हत्या हो जावसीजी ॥ दाय माता सुं तो पालन करावो, सुखे-सुखे बालक मोटो होवसीजी

॥ जलवां पूजने के समय बोलने का गीत ॥

(तर्ज — बाडाजी बिचलीजी पीपली)

मात पिताजी ए पीलो भेजियो, माथो गुंथावन शुभ दिन मारी बाई, पीलो तो ओढन, कलश्यो है हाथ में, मंगल गायन गावे मारी बाई, बाजा तो बाजे, बहुत सुहावना ॥ आया है बागां रे मांय मारी बाई ॥ बागां में बावडी जो जल भरयो ॥ जिनरो है निर्मल नीर मारी बाई ॥ कुवा पूजन जच्चारानी चालीया ॥ नीर की सीर ज्यूं दूध मारे आवजो ॥ बालूडो तो पीविला पेट भर बाई ॥ तन में तो साताजी बालक रे होवसी ॥ झगल्या तो टोपी मामासा लावीया, पालनिया में बालक ने पोढाओ मारी बाई ॥ झूला तो देयजो जिम धरती धुजावसी ॥ शुभ दिन मांये तो झडुलो निकालजो ॥ कान बिन्दायजो शुभ दिन मारी बाई ॥ भोजन शुभ

दिन बालक जिमावजो ॥ शुभ दिन वाने चलालो मारी
 बाई ॥ देश में चालने धर्म दिपावसी ॥ आछा-आछा
 हालरिया बालक ने सुनावजो ॥ ऊंची-ऊंची बोली
 बालक ने सीखावजो ॥ गाल ने झगडा मत सिखावजो
 मारी बाई ॥ बालक सुधरे तो जमारो थारो सुधरसी ॥
 बालक बिगडे तो हाण मारी बाई ॥ पांच वर्ष में भण-
 वाने भेजजो ॥ दस वर्ष रा बालक ने बौडिंग मांये
 राखजो ॥ बहत्तर कला तो पढाओ मारी बाई ॥
 अठारह लियो रो ज्ञान जो सीखावसी ॥ सामायिक-
 पडिक्कमणो भणावो मारी बाई ॥ अठारह वर्ष रो जी
 बालक घर आवनो ॥ रेवेला बह्णचारी मांय मारी
 बाई ॥ धर्म जो दीपे ने कुल थारो दीपसी ॥ दीपेला
 सब परिवार मारी बाई ॥ पंडितजी ने धन जो बहुलो
 देवजो ॥ देवो घणो सन्मान मारी बाई ॥

॥ हालरियो ॥

(तर्ज-जो आनख मंगल चावो तो मनाओ)

पुत्र ने राग सुनावे हो माताजी हुलरावे, बालक
 ने राग सुनावे हो माताजी हुलरावे ॥टेर॥ रतन जडत
 को पालनो, रेशम सेती बनियो, धन जननी थाने
 जनियो हो माता हुलरावे ॥१॥ सोना की सांकल बांधी

वा रेशम सेती सांधी, फिर अध बिच झुंमर बांध्यो हो
 माताजी हुलरावे ॥२॥ कोई चक्री भँवरा लावे, कोई
 नृत्य करी रिझावे, कोई घूघरिया घमकावे हो माताजी
 हुलरावे ॥३॥ कोई गोदी ले बैठावे, कोई अंगुली पकड़
 चलावे, कोई गुदगुल पाड़ हंसावे हो माताजी हुलरावे
 ॥४॥ कोई सिर पर टोपी मेले, कोई अधर हाथ सुं
 झेले, जिऊं-जिऊं बालक खेले हो माताजी हुलरावे ॥५॥
 कोई साडू-पेडा लावे, कोई सरस जलेबी लावे, कोई
 घेवरिया जिभावे हो माताजी हुलरावे ॥५॥ कोई चमक
 नींद से जागे, ने रिम-झिम करता भागें, वारी सुरत
 मुहावनी लागे हो माताजी हुलारावे ॥७॥ हे सिद्धारथ
 कुल का चन्दा, माता त्रिशला देवी का नन्दा, ज्याने
 सेवे सुर-नर वृन्दा हो माताजी हुलरावे ॥८॥ खूबचन्द-
 जी कहे जोड़जो, यह रिद्धि को संजोगो, यह करणी का
 फल भोगों हो ॥९॥ इति ॥

॥ सगाई के समय बोलने का गीत—घोड़ी ॥

॥ तर्ज : थे तो मालाओ परो जडाव री रे लाल ॥

धोलो तो घोडो कमल ज्यूं रे लाल, वारे तिलक
 चमके लीलाड ओ लाल, थे तो माला ओ फेरो नवकार
 की रे लाल ॥१॥ ए तो ए कुणजी घोडी मोलवे रे

लाल, ए कुण जी खर्चला दाम ओ लाल, थे माला ओ
 फेरो नवकार की रे लाल ॥२॥ ए तो पिताजी घोड़ी
 मोलवे रे लाल, ए तो काका जी खर्चला दाम ओ
 लाल, थे तो माला ओ फेरो नवकार की रे लाल ॥३॥
 ए कुण जी घोड़ी सजावसी रे लाल, ए तो ए कुण जी
 बनडो सजावसी रे लाल, थे तो माला ओ फेरो नव-
 कार की रे लाल ॥४॥ ए तो वीराजी घोड़ी सजावसी
 रे लाल, ए तो मामाजी बनडो सजाय ओ लाल, थे तो
 माला ओ फेरो नवकार की रे लाल ॥५॥ ए तो कसुं-
 बल पेचो खादी तणो रे लाल, ए तो केसरिया जामो
 पेराय ओ लाल, थे तो मालाओ फेरो नवकार की रे
 लाल ॥६॥ ए तो बेनड़ करे आरती रे लाल, ए तो
 माताजी दूध पिलाय ओ लाल, थे तो मालाओ फेरो
 नवकार की रे लाल ॥७॥ ए तो काकीजी मंगल गावसी
 रे लाल, ए तो भावज बधावा गाय ओ लाल, थे तो
 माला ओ फेरो गवकार की रे लाल ॥८॥ ए तो
 बाजा तो बाजे सुहावनो रे लाल, ए तो गया सज्जन
 के द्वार ओ लाल, थे तो माला ओ फेरो नवकार की
 रे लाल ॥९॥ ए तो बेइजी बधावन आवीया रे लाल, ए
 तो ब्यानजी आरती लाविया ओ लाल, थे तो माला
 ओ फेरो नवकार की रे लाल ॥१०॥ बेइजी रे पंचरंग

मोलियो रे लाल, ए तो ब्यानजी रे कसुम्बल चीर ओ
 लाल, थे तो माला ओ फेरो नवकार की रे लाल
 ॥११॥ रत्न सरीखी कन्या देवसां रे लाल, थाने देसां
 घणा धन माल ओ लाल, थे तो माला ओ फेरो नव-
 कार की रे लाल ॥१२॥ मारी कन्या ने सोरी राखजो
 रे लाल, थे तो मती करजो झगडो कलेश ओ लाल, थे
 तो माला ओ फेरो नवकार की रे लाल ॥१३॥ थाने
 खादी रो वेश देवशां रे लाल, थाने देसां गायां रा
 गोकुल ओ लाल, थे तो माला ओ फेरो नवकार की रे
 लाल ॥१४॥ ए तो परणन कँवर घर आवीया रे लाल,
 आ तो कुलवती बहु सुजान ओ लाल, थे तो माला ओ
 फेरो नवकार की रे लाल ॥१५॥ ए तो कुल रो वंश
 बढ़ावसी रे लाल, ए तो शील वंती सुखमाल ओ लाल
 थे तो माला ओ फेरो नवकार की रे लाल ॥१६॥ आ
 तो विनय करीने मीठा बोलसी रे लाल, आ तो सेवा
 करसी सब जान ओ लाल, थे तो माला ओ फेरो
 नवकार की रे लाल ॥१७॥ आ तो सामायिक
 पडिक्कमणो नित करसी रे लाल, वाने कभी मत दीजो
 अन्तराय ओ लाल, थे तो माला ओ फेरो नवकार की
 रे लाल ॥१८॥ वे तो दान देसी नित्य हाथ रे लाल,
 जठे होवेला जय-जयकार ओ लाल, थे तो माला ओ फेरो
 नवकार की रे लाल ॥१९॥

॥ दूसरी घोडी ॥

(तर्ज—धूमे घोडी ने अजब बछेडी)

घोडी पर बैठो बनडोजी सोवे, पिता-काकाजी इम बोले ओ ब्याई । घोडी पर बैठो बनडोजी बोले ॥१॥ घोडी पर बैठो बनडो घणो रे सुहावे, मारा तो कँवर डोरो बीटी मांगे ओ ब्याई । घोडी पर बैठो बनडोजी सोवे । २॥ डोरा ने बीटी सांसु बन नहीं आवे, कुंकु ने कन्धा हाजर करसां ओ ब्याई । घोडी पर बैठो बनडोजी सोवे ॥३॥ डोरा बीटी नहीं तो मैं नहीं परणां, मारे तो धन री आश ओ ब्याई । घोडी पर बैठो बनडोजी सोवे ॥४॥ मांगन री आदत थाने कुण सिखाई, मक्तापन किम धारयो ओ ब्याई । घोडी पर बैठो बनडो जी सोवे । ५॥ सूत्र ग्रंथ मांये बीटी नहीं चाली, नहीं देवे गुरु उपदेश ओ ब्याई । घोडी पर बैठो बनडोजी सोवे ॥६॥ लोभ दशा थाने अधिक जो लागी, किअ थे धर्म गमावो ओ ब्याई । घोडी पर बैठो बनडोजी सोवे ॥७॥ साता तो बीटी साथे मंगावो, विश्वास नहीं मन मांही ओ ब्याई । घोडी पर बैठो बनडोजी सोवे ॥८॥ सातो तो सात रुपया रो होवे, बीटी तो अंगुली में पेरावे ओ ब्याई । घोडी पर

बैठो बनडोजी सोवे ॥१॥ वो तो रिवाज ठेठ सुं आयी,
 अब किम् ऊंधी चाल चलाई ओ ब्याई । घोडी पर
 बैठो बनडोजी सोवे ॥१०॥ बीस, पचवीस, चालीस,
 एकावन, क्यों थे बेटा ने बेचो ओ ब्याई । घोडी पर
 बैठो बनडोजी सोवे ॥११॥ धर्म, समाज ने आप
 डुबावो, इन कुरीतां सुं हानि घणो होवे ओ ब्याई ।
 घोडी पर बैठो बनडोजी सोवे ॥१२॥ कितनी तो कन्या
 विष खा जावे, कितनी तो पडे कुवा मांय ओ ब्याही ।
 घोडी पर बैठो बनडोजी सोवे ॥१३॥ कन्या हत्या रे
 पाप सुं डरने, मति थे समाज बिगाडो ओ ब्याई ।
 घोडी पर बैठो बनडोजी सोवे ॥१४॥ दो दिन के वाह-
 वाह रे कारण, खोटी गति में जावो ओ ब्याई । घोडी
 पर बैठो बनडोजी सोवे ॥१५॥ सूत्र में बात जो प्रभु
 जी भाखी, पुत्ररी बीटी नहीं चाली ओ ब्याई । घोडी
 पर बैठो बनडोजी सोवे ॥१६॥ पुत्री का पिता ने धन
 जो देनो, ए चालयो सूत्र माय ओ ब्याई । घोडी पर
 बैठो बनडोजी सोवे ॥१७॥ तेतलि प्रधान पोटिला ने
 परण्या, सूत्र ज्ञाता में देखो ओ ब्याई । घोडी पर बैठो
 बनडोजी सोवे ॥१८॥ बीटी लेनी सब छोड़ देवो, भलो
 होसी जग मांही ओ ब्याही । घोडी पर बैठो बनडोजी
 सोवे ॥१९॥ रतन सरीखी कन्या, थाने जो देसां, देसां

घणो सन्मान ओ ब्याई । घोडी पर बैठो बनडोजी सोवे ॥२०॥ गायारा गोकुल थाने जो देसां, हाथ जोडी ने कन्यादान करसां ओ ब्याई । घोडी पर बैठो बनडोजी सोवे ॥२१॥ बीटी री चाल थे छोडो ब्याई, पुण्य तो थे ही कमावो ओ ब्याई । घोडी पर बैठो बनडोजी सोवे ॥२२॥

✽ बना ✽

(तर्ज—सुनो श्रोताजी घर ध्यान कलियुग नाच करे ।)

हाँ जी बना सात व्यसन का करो त्याग, छोटी सी उमर में ॥ हाँ जी बनी कौन देवेला माने ज्ञान, छोटी सी उमर में ॥ हाँ जी बना सतगुरु देवेला थाने ज्ञान, छोटी सी उमर में ॥ हाँ जी बना सट्ठा जुआरा करदो त्याग, पाण्डव दुःख पाया ॥ हाँ जी बना भांग गांजारी री कर दो त्याग, दारु मत पीवो ॥ हाँ जी बना परनारी का कर दो त्याग, रावण दुःख पाया ॥ हाँ जी बना चोरी का कर दो त्याग, कलंक लागे कुल में ॥ हाँ जी बना वेश्यागमन का करो त्याग, इज्जत रहजासी ॥ हाँ जी बना अभक्ष्य का करो त्याग, छोटी सी उमर में ॥ हाँ जी बना रात्रि भोजन का करो त्याग, छोटी सी उमर में ॥ हाँ ए बनी आछो बतायो माने ज्ञान, हिरदां में

धरणे ॥ हाँ ए बनी पतिव्रता धर्म पाल, शील सुखदायी ॥
 हाँ ए बनी रेशम का करदो त्याग, हिंसा घणी इनमें ॥
 हाँ ए बनी फैशन का कर देवो त्याग, धर्म पालन ने ॥
 हाँ जी बना करो जिनजी रो ध्यान, सुख पानो
 भव-भव में ॥

❀ बना ❀

(तर्ज—छल्ला बांत केरी पिंडे, आ रेशम बान बनी ।)

सिंहासन पर पिताजी बैठा, कन्या आई अरज करे ।
 पिताजी उन घरे देयजो, मैं सुख गांहे नित ही रहूँ ॥
 बाई स्वयंवर रचाओ, मन चाहे वर चुन लीजो ॥
 सीता, द्रौपदी आदि सतियाँ, स्वयंवर में वर चुनती ॥
 दास्यां का परिवार सुं जाती, अरिसा में मुखडो जोती ॥
 दास्यां गुणग्राम करती, वरमाला वर ने पेराती ॥
 अबे पिताजी आछो घर देयजो, जिन घर में शान्ति रेवे ॥
 मारो धर्म निभाऊँ, समकित में सेंठी रेवूँ ॥
 अज्ञानी रे घर मत दीजो, मैं नित की तो दुःख पास्यूँ ॥
 क्रोधी, मानी ने, लोभी, इनने मने मत देयजो ॥
 परस्त्री, वेश्यागामी, जुआरी ने मत देयजो ॥
 कायर, हीन, कुलारां, अनभणिया ने मत देयजो ॥
 वाने कदि नहीं देवाँ शीलवंत वर जोस्याँ ॥

दानी और बुद्धिवंत, ऐसा तो वर जोस्यां ॥
 पिताजी सुखे रहसुं, सामायिक पडिक्कमणो करस्युं ॥
 सेवा घणी करसुं, संघ में सुयश लेसुं ॥
 बहुत दायजो पहुँचा देशां, धन की कमी नहीं राखां ॥
 सूत्र मांहे चाल्यो, एक सौ चौरानव्वे बोल को दायजो ॥
 इन वक्त में लोभी, थोड़े के लिए दुःख देवे ॥
 ऐसी कुरीतां ने त्यागो, जो देवे सो प्रेम से लीजो ॥

विवाह प्रारम्भ होने के बाद बोलने का गीत

॥ विनायक ॥

(तर्ज—गढ़ रण के भवर सुं आवो विनायक ।)

ये तो विचरत-विचरत शहर पधारया, अतारया
 ओ हरिया बाग में जी ॥ ऊँचे तो पाट गौतम विराजिया,
 वर्धमान का शिष्य ओ जी ॥ भवि जीवाँ रे सुख
 कारणे जी, धर्मोपदेश फुरमावि-याजी ॥ पहलो तो वासो
 वसियो विनायक, ऋद्धि-सिद्धि रा भण्डार ओ जी ॥
 दूजो तो वासो वसियो विनायक, लब्धि तणा भण्डार
 ओ जी ॥ तीजो तो वासो वसियो विनायक, अन्न-धन
 रा भण्डार ओ जी ॥ चौथो वासो वसियो विनायक,
 बुद्धि तणा दातार ओ जी ॥ पाँचमो वासो वसियो
 विनायक, ज्ञान तणा दातार ओ जी ॥ बाँसडलिया

बल देवो विनायक, लाड़लडारा बाप ने जी ॥ ये तो जीबड़लिया जस देवो विनायक, लाड़लडीरी माय ने जी ॥ ये तो गाय बजाय यश देवो विनायक, लाड़लडीरी बेनने जी ॥ ये तो देव विनायक हिंसा नहीं करे, दया पाले सब जीवरीजी ॥ ये तो देव विनायक झूठ नहीं बोले, बोले ओ शब्द सुहावना जी ॥ ये तो देव विनायक चोरी नहीं करे, दान तो देवे ऊँचा भावसुंजी ॥ ये तो देव विनायक शील जो पाले, पाले ओ खांडा री धार ज्यूँ जी ॥ ये तो देव विनायक परिग्रह त्यागी, त्याग्या है सब संसार ने जी ॥ ये तो देव विनायक रेशम नहीं पेरे, पेरे ओ खादी रा वस्त्र जी ॥ ये तो देव विनायक षट् रस नहीं जीमे, जीमे ओ निरस आहार ने जी ॥ ये तो देवविनायक एकान्त नहीं बैठे, बैठे ओ परिषदा मांय ने जी ॥ ये तो बाजःजी बाजे ने मंगल गावे, नगरी री नारियाँ मिल आवती जी ॥ ये तो लाड़ लडारा कोड जो करसी, ज्यां वर्धमानजी रो गुण गावसीजी, गौतम रा गुण गावसीजी ॥ इति ॥

॥ हलदी ॥

(तर्ज—मारी हलदी रो रंग सुरंग, निपजे मालवा

मारो हलदी रो रंग सुरंग, निपजे देश में ॥ मारी केशर रो रंग सुरंग, निपजे काशमीर में है ॥ आ तो

आयी बाजारां रे मांय, दुकाना में बेचता ॥ वारे पिता
 रे मन कोड़ केसर मोलवे, वारे काका रे मन कोड़
 हलदी मोलवे ॥ वारी माताजी चतुर सुजान, केसर
 अंग चढ़े ॥ वारी काकीजी चतुर सुजान, हलदी अंग
 चढ़े ॥ पाउडर, स्नो, मत लगाइजो बेन, आरोग्यता
 नहीं रेवे ॥ चालो पुरानी चाल, आरोग्यता तन रेवे ॥
 फैशन है सदा दुःखदाय सादगी से सुख पावो ॥ इति ॥

॥ तेल लगाने का गीत ॥

(तर्ज—आवो आवो जोषाणा रा तेली जी)

आवो-आवो भरत-क्षेत्र रा तेलीजी, लावो तिलरा
 सरसों रो तेलजी ॥ मायें घालो मरवो ने मगतुली
 जी ॥ मायें घालो केसर ने कस्तूरी जी ॥ वो ही तेल
 बनडा रे अंग चढ़सीजी, वो ही तेल बनडी रे अंग
 चढ़सीजी ॥ रुपया वारे बाबोसा भरदेशीजी, लेखो
 वारा वीरोसा करलेसीजी ॥ पहली तो व्यायाम
 करनोजी, बायां रे व्यायाम चक्की दूध मथनोजी ॥
 जिससे तन्दुहस्ती बनी रहसीजी, मीलां रो तो तेल मत
 लेवोजी, घाणी रो तेल है सुखदायजी, शरीर में साता
 रहसीजी ॥ सहस्रपाक शतपाक तेल लगावजोजी,
 सुवागन नारी मिल मंगल गावसीजी ॥ इति ॥

॥ उगटणों के समय बोलने का गीत ॥

(तर्ज—तू तो कर रायजादी उगटणो)

तू तो कर रायजादा उगटणो, तू तो कर बनडी-
बाई उगटणो ॥ ये तो गेहूँ ने गुज्जी रो ऊगटणो, मांये
केसर कस्तूरी री बाल घणी ॥ मांये चंपेलीरी कलियां
री सुगंध घणी, हलदी रो रंग सुरंग घणो, ये तो पवन-
चक्की में पिस्तूयजो सती, उनरी शक्ति सब जल जावे
करी ॥ चक्की रो उपयोग राखो करी, उनमें शक्ति
ज्यादा रेवे करी ॥ चर्म रोग ने बिमारी नहीं आवे
करी, बनडा-बनडी रे साता रेवे करी ॥ इति ॥

॥ स्नान के समय बोलने का गीत ॥

(तर्ज—जठ मारी अन्तर लाडो नावसीजी)

बनडी तो बैठी बाजोट पेजी जठे माता ने पिता
पधारिया जी ॥ माताजी रे हाथ में कलश है ओ, ये तो
अनछान्या पानी नहीं लाविया ॥ जेनडरा हाथ में कलश
है ओ, ये ठंडा-ऊणा भेला करने नहीं लाविया ॥ बनडी
ने णावन करावता ओ, जठे बीरा जी ने भावज
पधारिया ॥ स्नान करावे ये प्रेमसु ओ, भावज पगल्याँये
धोवता ॥ जठे मारी बहु परिवारी नावसी ओ, जठे

भावज तो आरतड़ी करे ॥ कोमल वस्त्र लायने ओ, ये
तो बनडी रो अंग जो पूछता ॥ कुंकुरा तिलक काकाजी
करे ओ, मामा जी चावल चेडता ॥ सखियाँ तो मिल
कर गावती ओ, ये तो कुंकुरा पगल्यां बाई चालिया
॥इति॥

॥ कांगसी-बाल सवांगने के वक्त बोलने का गीत ॥

(तर्ज—मारी हलदी रो रंग सुरग निपजे मालबा)

बालक बनडी रा गज-गज केश, कुण सुलजावसी,
बालक बनडी रा लम्बा-लम्बा केश, कुण सुलजावसी,
रायजादी रा लम्बा-लम्बा केश, कुण सुलजावसी ॥
रायजादीरा गज-गज केश, कुण सुलजावसी ॥
बाटकडियां में तेल फुलेल, मरवारी कांगसी ॥
बनडी री माता चतुर सुजान, वे सुलजावसी ॥
बनडी री भावज चतुर सुजान, वे सुलजावसी ॥
वे जुआँ-लिखां रा जतन कराय, हिंसा नहीं होवसी ॥
मोतीडारी मांग भराय, कुंकुरो तिलक है ॥
मेहन्दी हाथ पगां रे देय, रंग जो राचनी ॥

॥ सेवरा ॥

(सर्ज—पनवाडी रा लम्बा तीखा बानडा)

वनवाडी में खुल रह्या फूल, गूथ लाय मारी
मालन सेवरो ॥ बाजारां में बैठा बालक बनडा तो,
सेवरया में चित्त गयो जी ॥ मेलां माये बेठी बालक बनडी
तो, सेवरिया में चित्त गयो जी ॥ परणिजूं सा
शीलवंती नार, के नहीं तर अखंड कँवारो रहसुं जी ॥
परणिजूं सा शीलवंता कुमार, के नहीं तर अखण्ड
कुमारी रहसुं जी ॥ काँई थाने बनडा सूतो सपनो आयो
के, काँई थाने नेणा नौंद आयी जी ॥ नहीं माने पिताजी
सूता सपना आया के, नहीं माने नेणां नौंद आयी जी ॥
परणावो माने शुभ सुहूर्त मायें के, शुभ दिन आज को
जी ॥ परणाई है बुद्धिवंती नार के, कुल मायें कलश-
चढावसीजी ॥ इति ॥

॥ चून्दडी का गीत ॥

(सर्ज—सवागण बालक बनडी बारे जी आवो ।)

सवागण बालक बनडी मेला में बैठी, माताजी
रचन सुनावे यूँ ॥ सवागण बालक बनडी सभा में आवो,
श्रीहो केसर कसुम्बल चून्दडी ॥ मारे बाबोसा देखे

मारा काकोसा देखे, किसविध ओढूँ माता चून्दडी ॥
 थारा बाबोसा ए बाई लगन लिखावे, काकोसा चुडले
 मोलावसी, वीरोसा ए बाई चूँदडियां मोलवे, मामोसा
 मायरो पेरावसी ॥ बहनोई ए बाई बन्दोली कडावे,
 बेनड आरतडी करावसी ॥ आज्ञा तो पालूँ माता
 चून्दड ओढूँ, अमर सवागण दिरावजो ॥

❀ वीरा ❀

(तर्ज—वीरा रिम-झिमसुं वेगा आयजो ।)

स्वारथ का बहन ने भाई, बिन स्वारथ तही कोई
 जी । वीरा रिम-झिमसुं वेगा आयजो ॥१॥ कर्म योग से
 बहन निर्धन थाव, धनवंतो वीरो नहीं आवेजी ॥ वीरा
 रिम-झिमसुं वेगा आयजो ॥२॥ में बहन कदी नहीं
 जानूँ, इन विध दचन सुनावे जी ॥ वीरा०॥३॥ वाने
 चून्दड नहीं ओढावे, नहीं तिलक जाय करावे जी
 ॥ वीरा०॥४॥ भाई निर्धन कभी हो जावे, तब बहन
 द्वारा नहीं जावेजी ॥ वीरा०॥५॥ नहीं वीरा घर दुलावे,
 नहीं तिलक भाई रे करती जी ॥ वीरा०॥६॥ धर्म का
 भाई बनावे, और धन-माल सब लेती जी ॥ वीरा०॥७॥
 एक माता उदर थी जाया, किम प्रेम भाव मिटायाजी
 ॥ वीरा०॥८॥ दाम की प्रीति करती पन आत्मा की

प्रीति त्यागीजी ॥वीरा०॥९॥ भाई थे आयजो भावज ने
 लायजो, सिरदार भतीजा साथे लाइजोजी ॥वीरा०॥१०॥
 वीरा पंचा में तिलक-कडायजो. बेनड ने चून्दड
 ओढायजोजी ॥११॥ दुनियाँ में सुजस लेइजो, माता-
 पिता रे नाम कमायजोजी ॥१२॥ वीरा पाँच पच्चीस
 साथे लाइजो, रोकडरी गरज घणोरीजी ॥१३॥इति॥

❀ बधावो ❀

(तर्ज—ये मोती समुद्रा में निपजे ।)

ये मोती समुद्रा में निपजे, ये मोती बाबोसा रे
 काने, बधावो मारे आवियो । भाग्य भलाजी मारा
 माता जी रा, अठे हुआ विवाह केरा ठाठ ॥ बधावो
 मारे आवियो ॥१॥ ये मोती समुद्रा में निपजे, ये
 मोती काकोसा रे काने, बधावो मारे आवियो । भाग्य
 भलाजी मारी काकीजी रा, देवेला पेरावनी पेराय,
 बधावो मारे आवियो ॥२॥ ये मोती समुद्रां में निपजे,
 ये मोती माताजी रे काने, बधावो मारे आवियो,
 भाग्य भलाजी मारी मामी सा रा, देशी है मायरो
 पेराय, बधावो मारे आवियो ॥३॥ ये मोती समुद्रां में
 निपजे, ये मोती वीराजी काने, बधावो मारे आवियो,
 भाग्य भलाजी मारी भावज सा रा, देशी है सेवरो

पेराय, बधावो मारे आवियो ॥४॥ ये मोती समुद्रां में
निपजे, ये मोती भूराजी रे काने, बधावो मारे आवियो,
भाग्य भलाजी मारी भुआ सा रा, देशी है आरतडी
कराय, बधावो मारी आवियो ॥५॥ ये मोती समुद्रां में
निपजे, ये मोती बींद राजा रे काने, परण पधारया
मारे आंगणे, होसी है मंगलाचार, बधावो मारे
आवियो ॥६॥

॥ बना ॥

(तर्ज—घंटाघर बणियो गिरदी कोट में ।)

सरदार बनासा, खादी मंगवादो मारे वासते ।
उमराव बनासा, रे जी रंगवादो मारे वासते ॥१॥
खीनखाप ने वायल मलमल, रेशम दाय न आवे ।
परमट्टो डक जाली माने, बिलकुल नहीं सुहावे हो ।
शीणां पहरां लाज गमावां, हासल कांई पावां ।
जल्दी-जल्दी कपड़ा फाटे, घाटो घणो उठावां हो ॥२॥
अंगरेजी फैशन ने छोडी, ली अंगरेजी धार ।
टुकड़ी माने आप रंगादो, है लूंगी सूं प्यारजी ॥३॥
देशी पहरां खरचो कमती, है आ सादी चाल ।
बदनकांत भारत रा इनसुं, हो जावे खुशहात हो ॥४॥

॥ बनी ने सिखामन ॥

(तंत्र — लहरियो पंचरंगो बणियो-लहरियो राजशाही ।)

बनी थूं सीख मान लीजे, सासरिया में जाय
सबांरो मन तू हरलीजे ॥टेर॥

जद तूं जावे सासरिया में, करजे सद् व्यवहार ।
परमेश्वर जूं जाण पति ने, करजे पुरो प्यार ॥१॥

सासु सुसरा ने मायत गिनजे, लीजे सेवा धार ।
मीठा बोल बोलजे बाई, मत करजे तकरार ॥२॥

देवराणी, जेठानीजी री, लीजे बातां मान ।
आलस तनसुं दूर राखजे, होवेला सन्मान ॥३॥

पति जिमाया पछे जीमणो, लीजे ओ व्रत धार ।
वेगी उठे रोज सबेरे, वही सुलक्षणी नार ॥४॥

बगर काम पर सेरी पर घर, अठी-उठी मत जाय ।
एड़ो नेम धारजे बाई, हरख उमंग मन लाय ॥५॥

कजियो, चुगली, पर निन्दा ने, चोरी दीजे त्याग ।
द्वेष भाव ने दूरी कीजे, घर में अनुराग ॥६॥

हिल-मिल कर घर वालों साथे, संप राखजे मान ।
दीन दुखी पर करुणा कीजे, जो चावे कल्याण ॥७॥

नार पदमणी प्रीतमजी सुं, बांधे गाढ़ी प्रीत ।
'धीरज' धर शुभ गीत गावजे, पाल पुरानी रीत ॥८॥

इस विध दी सीख बनी ने, मिल सारो परिवार ।
जाण फायदो इनसुं उण भी, लीवी हृदय धार ॥१॥

॥ मरदार बनासा ॥

(तर्ज— घण्टा घर बनियो गिरदी कोट में ।)

सरदार बनासा, चरखो मंगवादो मारे वास्ते ।
उमराव बनासा, रुई मंगवादो मारे वास्ते ॥१॥
चरखा लादो घणी चाव है, देवो रुई पिजाय ।
झीणो-झीणो तार काठ सुं, हरख-हरख मन लाय ॥१॥
कात-कात ने कोकडियाँ कर, घरे बनासा थान ।
सादी-खादी बापरियाँ सुं, घणो बदेला मान ॥२॥
कंचुक, साडी, और ओढणों, घाघर घेर दार ।
देशी पहराँ खादी में तो, करसाँ देश उद्धार ॥३॥
खाणों देशी पीणो देशी, देशी मारो अंग ।
देशी चाल ढाल भी देशी, साचो देश रो रंग ॥४॥
धोती कोट कमीज दुपट्टा, सब खादी के धारो ।
चाले घणा खरच पिण कमती, होवे देश सुधारो ॥५॥
कान लगाकर सुनो बालमा, घणा फायदा इणमें ।
धनी-निर्धनी दुःखिया सुखिया, सुख पावे सब इनमें ॥६॥
टेम मिले नहीं झगड़ा करणे, ईश्वर प्रेम बढ़ावे ।
तन आरोग्य दिल हो ताजा, दुःख के दिन कटजावे ॥७॥

आलसियाँ को काम दिरावे, निरधनिया ने धन ।
 धनवानों रो मद घटावे, चरखा माने धन ॥८॥
 'धीरज' धर बतलावुं साहज, जो लादोला चरखा ।
 सुख संवत अमृत री घर में, हो जावेला बरखा ॥९॥

❀ वना ❀

(सर्ज - मोटा धीरे-धीरे हाक, डराईवर देश चित्त ।)

तो पर दारी बार हजारी बनाता अरजी मुनजो जी ।
 खादी लादो लुंगी लाशो, रेजी लादोजी ॥८॥
 खादी मेरी रंग-रंगीली, आजदी करतार ।
 बरबादी गेटे भारतरी, सादी रेजी धार ॥१॥
 साठ क्रोड रो कपडो पियाजी, परदेशां सं आवे ।
 वरसा वरसी देश माँघ लुं, द्रव्य खींच ले जावे ॥२॥
 चरबी री चरचा मुणतो तो, खुले कान रा डाटा ।
 गोहत्या रो पाप मोटको, लागे जिणसुं घाटा ॥३॥
 खादी मांघे घणी सादगी, दूर करे अभिमान ।
 हृदय धर लो आय बनासा, कम खरचा रो ज्ञान ॥४॥
 रेशम री तो बात न पूछो, हिंसा रो है गेह ।
 कीडां री हत्या भारी, किकर धारो देह ॥५॥
 खरचो घटिया देश सुधरया, आप अनीति छूटे ।
 आमदानी थोड़ी खरचो ज्यादा, माहें लूटे ॥६॥

बिना काम किया सुं बनासा, कूण जगत में पूछे ।
 खाली बैठे वाने ऊँदी-ऊँदी, कुबुद्धियाँ सूझे ॥७॥
 इण कारण सुं चरखो माने, वेगो लाय दिरावो ।
 गण्पा झगड़ा मिटे घरों घर, अरजी मान लिरावो ॥८॥
 झीणो-झीणो तार कातसाँ, गाय-गाय शुभ गीत ।
 'धीरज' धरने चरखो कातो, वढ़े देश सुं प्रीत ॥९॥

❀ बना ❀

(तर्ज-कालो कमली वाले तुमको लावो प्रणाम ।)

बनडी जोवे वाटां बनसा आवो सही, बैठी झाँके
 हाटां बनसा आवो सही ॥१॥ पूरी करली आप पढ़ाई,
 लगी कमाई हुई सगाई, वाने बैठन वेगा बनासा आवो ।
 सही ॥१॥ कसरत करते डील बनायो, चेहरा ऊपर नूर
 सवायो, जाऊँ बलिहारी वारी बनासा आवो सही ॥२॥
 बनडी ईश्वर सुं वर मांगे, गौर वरण वर नजर न
 लागे, कालो डोरो बांधो बनासा आवो सही ॥३॥
 उमावाँ में बनडी गेली, आप कदी खबरों नहीं मेली,
 ऊबी काग उड़ावे बनासा आवो सही ॥४॥ बनडी ने
 'श्रीनाथ' सुहावे, 'धीरज' धरने दिवस बितावे, मन री
 रलियाँ पू ण बनासा आवो सही ॥५॥

॥ विनोद रो गीत ॥

(तर्ज — अंबाजी पाका मरवण नींबू जी पाका ।)

आडो तो खोल ए बनडी आडो तो खोल, बारे
ऊभा है थारा सायबा, ऊंघाली बनडी आडो तो खोल
॥टेर॥ तू तो सूती है बनडी खूटी ने ताण, सीयाँ मरे
है थारे सायबा, ऊंघाली बनडी आडो तो खोल ॥१॥
सरमाँ मरे ने सायना मूँडने बोले, जाणे सुसरो जी सुनसी
बोली ॥२॥ मोटा घरारा छोरा लाजजी राखे, बूम
आंछे नहीं पाडे ॥३॥ कूंटो खटकायो बनडी तोय न
जागी, चूल्यो उतारण मनमें ठाणी ॥४॥ खटको सुनन्तां
गोरी झटके सुं जागी, आडो खोले ने सायबा भेटया ॥५॥
बनडी तो बोली मारो पहलो कसूर, सायबा मुलकाये
माफी दीनी ॥६॥ 'धीरज' धरे ने धीरे बोलया श्रीनाथ
चूके है मोटा-मोटा लोग ॥७॥ इति ॥

॥ बना ॥

(तर्ज — साहब भले विराजोजी)

में तो खादी पहरांजी माने वनासा लादो खादी पहराजी
मलमल वायल दाय न आवे, छींटा सुं मन फाटो ।
चले घणो ने खरचो थोडो, पहरां कपडो काठो ॥१॥

पहरे कपडो झीणो, जिनसुं लाज शरम सब खोवे,
 पर पुरुषां रे मूंडा लामो, केडी दुरगत होवे ॥२॥
 गायां री चर्बी लागे है, हिंसा रो नहीं पार ।
 पत्नीमारी खरी कमाई, क्यूं सेलो थे बाहर ॥३॥
 साल अरबरो साल बनासा, बरदा-बरसी आवे ॥
 भारत में निकमाई फैले, धान न पुरो पावे ॥४॥
 इन खरचां रे कारण बनासा, बाला बिछवा काडो ।
 किन विध सुं निकमाई मांहे, भरां पेट रो खाडो ॥५॥
 चरखो लादो सूत कातसां, धरे बनासां खादी ।
 देशी खासां देशी पहरां, करां देश आबादी ॥६॥
 द्रव्य बचासां, गायां बचासां, भलो देश रो करसां ।
 अब तो ज्ञान दियो गाँधीजी, देश भलाई करसां ॥७॥
 शुभ गीतां में 'बदनकांत' तो गूथे एडा गीत ।
 देश हमारो बालो लागे, गाढ़ी बाँधो प्रीत ॥८॥

॥ बना ॥

(तर्ज—जियो बना जाइजो-जाइजो सब ही देश पुरव मत जावजो जी मारा राज)

जियो बना आयजो-आयजो बनडी रे देश चार
 दिन पावणा जी मारा राज ॥टेरा॥ जियो बना बनडी
 जोवे वाट झरोखे ऊभी ताकतीजी मारा राज ॥१॥
 जियो बनडा-बनडी उडावे काग, फलखे डावी आँखडी

जी मारा राज ॥२॥ जियो बना आया-आया साथीडो
 रे साथ, डेरा हरिया बाग में जी मारा राज ॥३॥
 जियो बना जिमणिया तैयार, सालाजी चालया तेडवाजी
 मारा राज ॥४॥ जिमो बना ऐंठे न नाँखे लगाव,
 नाणे साल बापरो जी माराराज ॥५॥ जियो बना दाय
 न फाटा आय, सुणे शुभ गीत ने जी मारा राज ॥६॥
 जियो बना खेले न चोपड दाव, पोथ्यां पढे ज्ञान री
 जी मारा राज ॥७॥ जियो बना पिये नहीं अंग्रेजी
 चाय, अरोगे कडिया दूध ने जी मारा राज ॥८॥ जियो
 बना 'धीरज' धर्म सुं प्रेम, बड़ो 'श्रीनाथ' ने मारा
 राज ॥९॥

॥ बना ॥

(तर्ज : बना सडक सडक हुंघ आइजो, अंजन सुं अलगा रहीजो जी
 मारा रेल ने डिगावोला)

बना अमेरिका थे जाइजो, अकल री बातां थे लाइजो
 जी, मारा देश ने सिखावोला कांइजी ॥१॥
 बना लंदन होता आइजो, देश प्रेम री बातां
 लाइजो जी, मारा देश ने जगावोला कांइजी ॥२॥
 बना पेरिस होता आयजो, सफाई री बातां लावजो
 जी, मारा देश ने सुधारोला कांइजी ॥३॥

बना जर्मन होता आवजो, विज्ञान केरी बातां
 लावजो जी, मारा देश ने चलावोला कांडजी ॥४॥
 बना जेनेवा होत आवजो, विश्व शान्ति री बातां
 लावजो जी, गंगा प्रेम बहावोला कांडजी ॥५॥
 बना जापान तो थे जावजो, हुन्नर री बातां
 लावजो जी, मारा देश ने बतावोला कांडजी ॥६॥
 बना 'धीरज' धरता आवजो, श्रीनाथ न सुख
 पहुँचावजो जी, सेवा देश री बजावोला कांडजी ॥७॥

॥ बना ॥

(तर्ज—आंबाजी पाक्या मरवण नांबू जो दाक्या)

मूंडे तो बोलो बनासा मूंडे तो बोलो,
 खोलो रसना ने अमृत घोलो, बनासा मांसु मूंडे
 तो बोलो ॥८॥

थे तो दाडम ने में तो दाख बनासा,
 एकण क्यारी में भेला ऊग्या ॥ बनासा मांसु मूंडे ॥
 थे तो राजा ने तो राणी बनासा, एकण चँवरी में
 भेला परण्या ॥ बनासा मांसु मूंडे तो बोलो ॥९॥

थे तो शक्ति ने में तो रूप बनासा ॥
 एकण गाडी में भोला जोत्या ॥१०॥

ये तो मोती ने में तो लाल बनासा,
 एकण नथडी में भेला ओप्या ॥४॥
 थे तो बाजू ने में तो लूस्र बनासा ।
 एकण डोरा में भेला बांध्या ॥५॥
 थे तो चावल ने में तो दाल बनासा ।
 एकण भांणां में तो भेला पुरस्या ॥६॥
 थे तो ज्योति ने में तो दिवलो बनासा ।
 एकण पडवा में भेला प्रगट्या ॥७॥
 'धीरज' धरने इतरे मुलक्या 'श्रीनाथ' ।
 बोलया सायबा ने हिवडा हुलस्या ॥८॥

॥ बूढो बनडो ॥

(तर्ज—ओ ताराचन्दजी नींव गमारण वेरण आई हांजी ऊनो जी पानी सर-सर बाणी मोतीडे)

क्यो बूढा बनडा, धोलां में धूल नकाई ॥टेर॥
 हां जी आखां तो ऊंडी हाले है मूंडी, हुंडी बटाई कीनी
 भूंडीरा ॥क्यो॥१॥ हां जी देखे जी बाला, जाने तन
 ज्वाला, केश रंगाया झूठा कालारा ॥२॥ हाँ जी लकडा
 ये जाणे, पडिया मसाणे, मन में विचार न आणेरा ॥३॥
 हां जी बनी तो ठोठी, पोती सुं छोटी, देखत लागे नग
 खोटी रा ॥४॥ हां जी दुखाँ री घाटी, रीतां सुं नाटी

कूण पढ़ाई ऊंदी पाटीरा ॥५॥ हां जी मिनक जाली
करे दलाली, बेटी बेचन रीता चाली रा ॥६॥ हां
जी आया जी पंच, कियो प्रपंच, बातां बनाई कोरी
टंचरा ॥७॥ हां जी लाडूजी खावे, देश डुबावे, विधवा
री गिनती बढावे रा ॥८॥ हां जी छोरी डुबोई, विधवा
जो होई, बात न पूछे उणरी कोई रा ॥९॥ हां जी
साची जो बात, कही श्रीनाथ, पाप पंचों रे सारो
माथरा ॥१०॥ इति ॥

लडकी की पुकार

(तर्ज : मेरे बाप ने मुझको बाल पगे परणाया)

मेरे बाप ने रे मुझको बूढे से परणाया ।
सब सखियां मेरी करे मसखरी, दाहे पोती क्याही ॥१॥
मैं टावर रमणे सुं राजी, घर में चैन न पाऊं ।
ओ बूढलियो बारे जावे, मैं भी फिरणी जाहूँ ॥२॥
बारे निकली पडस भामू, सानी बूढो आयो ।
पकड़ हाथ खाने पाछो लग्यो, घर में यूं बरडायो ॥३॥
धोल राहि धूल पडे हैं, जो तूं बाहर जावे ।
लोग हँसे न मोसो बोले, मासुं सह्यो न जावे ॥४॥
उमर मेरी मोटी हो गई, जोडी विन नहीं भावे ।
सुख मारे श्रीनाथ करेला, धीरज धर हरखावे ॥५॥

॥ बना ॥

(देखी : सारी-सम्पत्ति रक्त तेरी याद ससाये)

सुन-सुन बनी तेरी शादी रचायी, शादी रचायी
तेरी व्याह रचाया रे ॥ सुन-सुन बनी तेरी शादी
रचायी । टेरे ॥ पिताजी ने गोद खिलाया, माताजी ने
दूध पिलाया, प्रीत पुरानी अब तो हुई परायी ॥१॥
मामाजी ने मायरो भराया, मामाजी ने चून्दड़ी ओढाई
प्रीत पुरानी अब तो हुई परायी ॥२॥ बहनोई सा ने
बंदोली कढाई, बेनडजी ने तुफा उतारे, प्रीत पुरानी
अब तो हुई परायी । सुन-सुन बनी तेरी शादी रचायी
॥३॥ फुफाजी ने बरात कढाई, भुवाजी ने आरती
सजायी, प्रीत पुरानी अब तो हुई रे परायी । सुन-सुन
बनी तेरी शादी रचायी ॥४॥

॥ बना ॥

(तर्ज-जरा सामने तो आओ छलिये)

जरा सुनो ए मेरी लाइली, जब जाओगी तुम
ससुराल में, सासुं ननन्दों का कहना मानना, यही तेरे
जीवन का सार है ॥टेरे॥ सासु जब तुम्हे काम बतावे,
उसे कभी न तुम टालो, छोटे देवर जी को भाई समझ
कर, लिखना-पढ़ना तुम सिखाओ । विनयवती तुम

कहलावोगी, जब राखोगी लाज तुम आंख में ॥१॥
जेठानी जो बड़ी है तुमसे, उससे कभी न तुम लडना ।
देवरानी को बहन समझ कर, उससे कभी न जोर
करना । सुशीला लज्जावती कहलावोगी, जब-जब
राखोगी लाज तुम आंख में ॥२॥ सामाधिक पडिक्क-
मणो आदि, धर्म क्रिया को मति भूलना, परलोक जाते
जीव साथे, धर्मकरणी एक चलता है, यश कीर्ति
पाओगी जग में, जब राखोगी लाज तुम आंख में
॥इति॥

॥ गणधर ॥

॥ विनायक ॥

मारा रिद्धि-सिद्धि रा दातार विनायक गौतम
प्यारे रे ॥टेर॥ वसुभूति ना नन्दनजी का, पृथ्वीदेवी
जाया रे । वीरप्रभु ना शिष्य पाटवी, कंचनवर्णी काया
रे । जिन धर्म दुलारा रे ॥१॥ ज्ञान खजाना पूर्ण
भरिया, विघ्न मिटावन हारा रे । दल, जंगल, दुश्मन
मद गाले, टाले भय जो सारा रे, भक्तजनों की रख-
वारा ॥२॥ कलियुग में निर्धन राजादि, जपिया मंगल
माल रे । चिन्तामणि सम चिन्ता चूरे, काटे कर्म का
जाला रे । क्याल है दातार रे ॥३॥ आवो विनायक

काज सुधारो, में हूँ भक्त तुम्हारा रे, गादी नीचे रख
 दो जो अवमुण है मारा रे । ग्यारा प्रभु हार हियारा
 रे ॥४॥ आप सरीखा देव जगत में और नजर नहीं
 आया रे । बुद्धमल राय प्रसादे, मुनि मिश्रीमल गाया
 रे, दीजो वर जय-जय कार रे ॥१५॥ इति ॥

॥ विरद बडी का गीत ॥

(तर्ज — ऐसी विरदयां में बधाने लेस्यो)

वर्द्धमान स्वामी जिन शासन शृंगारो, सोलह
 मासा रो एक सोनैयो जानो, एक दिन मायें एक क्रीड
 आठ लाखो, इसडो तो दान दियो वर्द्धमानो, उन दिनां
 सु आ वृद्ध बडी कहलायो, बना-बनी दान-हाथ भर-भर
 दीजो । धर्म, जात, समाज रो भलो थे कीजो, उदार
 भावना विवाह वाला मन राखो । कंजूसपना सब त्याग
 करावो, ऐसी-ऐसी विरदयां माता ले जो बधाई, शुद्ध
 सोना सुं बधाई ने लीजो, उजला मोतियां सु बधाय
 ने लीजो । खादी रा कपडा सुं बधाय ने लीजो,
 केसरिया कसुम्बल सुं बधायने लीजो । दान दिरावेला
 लाडलडारा बाबोसा, हर्ष मनावेला लाडलडीरा माता ।
 जय विजय होयजो वर्द्धमान जिनन्द ॥

॥ नेतो ॥ (विरद बडी पर निमन्त्रण)

(तर्ज-थाने निवतू थाने निवतू पिताजी रा पूत)

थाने निवतू, थाने निवतू, पिताजी रा पूत हो,
बीरासा पधारो मारी विरदडीजी ॥ आछी विरदचां,
भली विरदचां आवनो रो जोग हो, परिवार ने लेने
षधारजो जी ॥ भले आसां, भले आसां, दिन दस चार
हो, ये तो मायरो पेराय जस लेवजोजी ॥ थाने निवतू,
थाने निवतू बहनोइयां रोसाथे हो, फुफाजी पधारो मारी
विरदडीजी ॥ आछी विरदचां, भली विरदचां, आवनो
रो जोग हो ॥ मैं तो आयने बंदोली कढावसां जी ॥
जनता सुं जीमो, मौन कर जीमो, ऐंटो मत नाखो हो ।
इनमें दोष घणो लागतो जी ॥ ऐंटो नहीं नाखां, मीठो
खावां, थाली खोल पीवसां जी ॥

॥ लक्ष्मी का गीत ॥

(तर्ज-चाले लक्ष्मी जिन घर जावां जिन घर)

लक्ष्मी चंचल स्थिर नहीं रेवे, रिद्धि-सिद्धि नहीं
आवे ॥ पुन्यवंत घर लक्ष्मीजी आवे, रिद्धि-सिद्धि रा
भण्डार रे ॥ लक्ष्मी पायने दान जो दीजो, दुःखी जीवां
री करुणा लावजो ॥ दान तो दीजो ने नाम बढायजो,
व्याव में सुजस लीजो ॥ बना-बनी रे हाथ पिताजी,

घणो जो दान दिरावजो जी ॥ गुल बटायजो ने साधर्मी
ने साता उपजाय जो, संघ री सेवा करावजो ॥ माता-
पिता तो बहु हरषावे, बना-बनी रे मंगल गावता ॥

॥ चाक-कलश-बारी और उकरडी का गीत ॥

॥ चाक मूदना का गीत ॥

(तर्ज—रंगाय दो नेमीश्वर चून्वडजी)

बायां तो सब मिल चालतीजी, सजिया है सोले
सिनंगार तो ॥ चाक पूजन ने बायां सांचरीजी ॥१॥
चाक पूजन ने बायां चालतीजी, गावे है मंगल गान के ।
चाक पूजन ने बायां नीसरीजी ॥२॥ चाक री पूजा वे
इम करेजी, इनरा थे जानो है भाव के । चाक पूजन
ने बायां नीसरीजी ॥३॥ रथ ने दोई चक्र कह्याजी,
जदी तो चालेला रथ तो, एक चक्र सुं रथ नहीं चाले
जी । चाक पूजन ने बायां नीसरीजी ॥४॥ इन विध
गृहस्थ आश्रम रूपी रथ ने जी, स्त्री पुरुष रूपी चक्र
कह्याजी । चाक पूजन ने बायां नीसरीजी ॥५॥ बना-
बनी री जोडी सरीखी मिलेजी, तो ही गृहस्थाश्रम रूपी
रथ चालसी जी, नहीं तर दुःख ये पावसी जी । चाक पूजन
ने बायां नीसरीजी ॥६॥ ऋषभदेव प्रथम स्थापियाजी,
प्रजापति कुंभकार जात के । कलश बधावन बायां

नीसरीजी ॥७॥ हाथी के होदे पर बँठने जी, कलश
 गडयो प्रभु हाथी सुं जी, वरत्या है जय-जयकार के ।
 कलश बधावन बायां नीसरीजी ॥८॥ इन कारण कुंभ-
 कार ने तिलक करेजी, पेचो तो देवे बंधाय के । कलश
 बधावन बायां नीसरीजी ॥९॥ नव खंडियो वेश घर
 लावियाजी, बना-बनी परणीजे जान के । कलश
 बधावन बायां नीसरीजी ॥१०॥ भारी बधावनो तीसरो
 जी, इन मायें मोटो छे ज्ञान के । भारी बधावन बायां
 नीसरीजी ॥११॥ एक-एक लकड़ी जंगल रेवेजी, उनरी
 तो शोभा नहीं थाय के । भारी बधावन बायां नीसरी
 जी ॥१२॥ सगली लकड़ी एकटी होवेजी, उनरी तो
 जोभा घणी थाय के । भारी बधावन बायां नीसरीजी
 ॥१३॥ तोड सके नहीं कोई जी, नहीं लागे दुष्मन रो
 डाव के । भारी बधावन बायां नीसरीजी ॥१४॥ इम
 बना-बनी मिल रेवजोजी । सगली सिखावण मिल इम
 देवतीजी । भारी बधावन बायां नीसरीजी ॥१५॥ इन
 कारण तिलक कुंकु तणोजी, पेचो तो देवे बंधाय के ।
 भारी बधावन बायां नीसरीजी ॥१६॥ खाती धर्म रो
 वीर छे जी, बना-बनी ने ज्ञान सीखावजो जी । भारी
 बधावन बायां नीसरीजी ॥१७॥ संप राखो बारी समो
 जी, कुटुम्ब ने लेयजो निभाय के । भारी बधावन बायां

नीसरीजी ॥१८॥ शोभा तो थानी होसी घणीजी,
पावोला रिद्धि-सिद्धि अपार के । भारी बधावन बायां
नीसरीजी ॥१९॥ उकरडी पूजन चौथो कह्योजी, इन
मायें गुण अपार के । उकरडी पूजन बायां नीसरीजी
॥२०॥ कचरा तो डाले इन मांयने जी, कमल ऊगे इन
मांय के । उकरडी पूजन बायां नीसरीजी ॥२१॥ हार
गाड बायां आवती जी, बना-बनी लावे छे काढ के ।
उकरडी पूजन बायां नीसरीजी ॥२२॥ उकरडी ज्युं
थे बन जावजोजी, समता राखो मन मांयके । उकरडी
पूजन बायां नीसरी जी ॥२३॥ हार ज्युं हृदय में
बैठसोजी, कमल सुगंध ज्युं यश फलसीजी । उकरडी
पूजन बायां नीसरीजी ॥२४॥ ऐसी सिखावण सगली
देवतीजी, बना-बनी लेवे हृदय धार के । उकरडी पूजन
बायां नीसरी जी ॥५॥

✽ विनायक ✽

(तर्ज—जब तुम्हीं चले परदेश)

माता पृथ्वी के नन्द, करो आनन्द, सदा सुख पावो
जो गौतम गणपति ध्यावो ॥टेरे॥

जय-जय गणेश, जय गण नायक, जय-जय गणधर
जय शिवदायक, लाखों नर-नारी देव-देवी गुण गावे
जो गौतम गणपति ध्यावो ॥१॥

दुर्भाग्य मिटे, दारिद्र नशे, सोभाग्य बढ़े संपत्ति विलसे,
नूपुर रणकाती राणी लक्ष्मी आवे ॥२॥

हे विघ्न-विनाशक जगनामी, लब्धि संपन्न निधि
स्वामी, आशा तरु में नव-नव पल्लव प्रगटावे ॥३॥

दुर्मतिवारक संकट हरता, शरणागत की पालनकर्ता
शत्रु भी मित्र बन सादर शीश नमावे ॥४॥

केवलमुनि मंगलाचार कहे, दे ऋद्धि-सिद्धि भण्डार भरे,
मकरंद गंध सा दिग्दि गंध यश छावे ॥५॥

॥ बाजोट ॥

(तर्ज—समुदां रे पेले चन्दनयारो रूखो ।)

शहरां रे मांहि ने खाती री दुकान, खाती री
दुकान, गड लायारे खाती बाजोटियो जी, गड लाय रे खाती
थांभ तोरण जी ॥१॥ चन्दनियाँ रे पाटा पर बना-बनी
बैठे, पंडित बुलावो भणिया गुणियाजी ॥२॥ नवकार
सुनावो ने मंगलिक सुनावे, जीवन में, मंगल वरतजो
जी ॥३॥ चारों दिशा मांय तणी ए तणाओ, ऊपर
रालो आ चून्दडी जी ॥४॥

॥ थांभ का गीत ॥

(तर्ज—रंगायजी नेमीश्वर चूम्बडी जी ।)

पेलो तो थांभ रतना जडियोजी, ऊपर कलश
सुजान के ॥ थांभ सुहावनोजी ॥१॥ चार तीर माहें
रेवजोजी, थांभ जैसो मजबूत के ॥ थांभ सुहावनोजी ॥२॥
डिगाया डिगजो मतीजी, धर्मसेवा में भःपूर के ॥ थांभ
सुहावनोजी ॥३॥ कंकण वंधन शुभ कह्यो, जी डोरो
है लाल सुरंग के ॥ थांभ सुहावनोजी ॥४॥ तोडिया
तो टूटे नहीं जी, इम राखजो प्रेम की प्रीत तो ॥ थांभ
सुहावनोजी ॥५॥ लाख री बींठी लक्ष राखजोजी,
संसार कुटुम्ब रे मांय के ॥ थांभ सुहावनोजी ॥६॥
लोढ़ारी बींठी ज्यूं मजबूत रहियोजी, तो निभेला संसार
के ॥ थांभ सुहावनोजी ॥७॥ दोइ बातां में नहीं सेंठी
रहोजी, होबेला कौडी सम इज्जत ॥ थांभ सुहावनोजी
॥८॥ बना-बनी शिक्षा हृदय धारजो जी, कांकण
डोरा रो यही उपदेश के ॥ थांभ सुहावनोजी ॥९॥

॥ तेल चढाते वक्त गाने का गीत ॥

(तर्ज—पन्नालालजी पूछे बालमिया, थारे चून्दड चीगट किम रे हुई ।)

पिताजी पूछे माताजी ने, थारे चून्दड चीगट
किम रे हुई ॥ बालक बनडा ने तेल चढावतडा ॥

बींदराजा ने तेल चढावतडा ॥ मारे चून्दड चीगट
 इम रे हुई ॥ ये तो तेल चढाय जस लेयजो खरी, आ
 तो तेल री महिमा जगमें खरी, तेल उघाडो मति रखजो
 खरी जीवां री रक्षा करजो खरी, बना-बनडी रा आनन
 मनावो खरी ॥

॥ लगदड का गीत ॥

(तर्ज-लगदड लो जी ।)

लगदड लो मारा बालक बना लगदडलोजी,
 जिम थे लखपति होइजोजी ॥१॥

धाना लो मारा अन्तरलाडा धाना लो जी,
 जिम थे धनवंता होइजो जी ॥२॥

जीरो लो मारा अन्तर लाडा जीरो लोजी,
 जिम थे चिरंजीव रहिजो ॥३॥

दान देवो अन्तरलाडी दान देवोजी,
 जिम थे दानेश्वरी होयजोजी ॥४॥

तप करो अन्तरलाडा तप करो,
 तपस्वी थे होयजोजी ॥५॥

शिक्षा लेवो अन्तरलाडा शिक्षा लेवो,
 जिम थे जगमें शीलवंता होयजोजी ॥६॥

सांजी का गीत-संध्या के समय बोलने का गीत ॥

(तर्ज—कपूरा रा लिया पय सार के ।)

कपूर सरिखो ये तो ऊजलोजी, सांझ समय रे
मांय के, सभी सांझ दियो बलेजी ॥ परणीजे सा
पिताजी रा पूत के, जहाँ घर मंगल वरतियाजी ॥
परणीजे सा काकाजी री धीव, जहाँ घर हर्ष
बधावनाजी ॥ दीवा सरिखा होयजो बींद राजा तो,
कुल में अंधारो मेटजोजी ॥ दीवा ज्यूं दीपो कुल मांय
के, जय-जयकार करावजोजी ॥

॥ वारणा ॥

(तर्ज—जी माने मेलं चढंता ।)

जी माने मेलं चढंता, कांकरो कुण रात्योजी
राज, जी उज्जवल दंति रा बनासा, गाडो हेत लगायोजी
राज ॥१॥ जी माने भोजन करंता ऐंटो मति नाकजो
जी राज, जी उज्जवल दंति रा बनासा, गाडो हेत
लगायो जी राज ॥२॥ जी माने पाणी पीवंता, अनछान्यो
मति पायजो जी राज, जी उज्जवल दंति रा बनासा,
गाडो हेत लगायो जी राज ॥३॥ जी माने कपडा पेरन्ता
खादी रातो पेरायजोजी राज, जी उज्जवल दंति रा
बनासा गाडो हेत लगायो जी राज ॥४॥ जी माने

बिनय करंता सेवा धर्म सिखावोजी राज, जी माने
 रेशम रा त्याग करायजो जी राज, जी उज्ज्वल दंति
 रा बनासा, गाडो हेत लगायो जी राज ॥५॥

॥ झाला ॥

(तर्ज—झाला-झ ला कांई करो जी ।)

झाला-झाला कांई करो जीवो राज बनासा, झाला
 परणन रात ॥१॥ शुभ मोरत में परणजो जीवो राज
 बनासा, मनमें गुणो नवकार ॥२॥ धर्म सरिखो मित्र
 नहीं ओ राज बनासा, सदा राखो तुम पास ॥३॥
 बनडी ने दुःख मत देवजो जीओ राज बनासा, मत
 लड़जो कोई वार ॥४॥ बनडी कु सिनगार है जीओ
 राज बनास, तार देवे संसार ॥५॥ मीठी-मीठी बोली
 राखजो जी ओ राज बनसा, मीठी देवो जिमाय ॥६॥
 परनारी मत निरखजो जीओ राज बनासा, शोभा
 होसी संसार ॥७॥

॥ पेमो ॥

॥ विनोदिक गीत ॥

(तर्ज— अरे पेमा दिवर जिठाणियां)

अरे पेमा दिवर जिठाणियां दिवर जिठाणियां,
 भेली जो रेसां, भेली जो रेसां, अरे पेमा इम रेसा अरे

पेमा इम रेसां ॥१॥ अरे पेमा दिवर जिठाणियां, दिवर
 जिठाणियां, झगडो न करसां, झगडो न करसा अरे पेमा
 मिल रेसां, अरे पेमा मिल रेसां ॥२॥ अरे पेमा दिवर
 जिठाणियां, घट्टी जो पीसां, घट्टी जो पीसां, अरे पेमा
 इम पीसा, अरे पेमा इम पीसां, अरे पेमा मिशन को
 आटो नहीं खासां ॥३॥ अरे पेमा दिवर जिठाणियां,
 दिवर जिठाणियां, बिलोनोजी करसां, बिलोनोजी
 करसां, डालडारे घी नहीं खासां, अरे पेमा नहीं खासां
 ॥४॥ अरे पेमा दिवर जिठाणिया, दिवर-जिठाणियां,
 धान जो चुगसां, धान जो चुगसां, अरे पेमा लट्टां इल्लियां
 तावडे नहीं डालां, अरे पेमा नहीं डालां ॥५॥ अरे पेमा
 दिवर-जिठाणियां २ माथो जी धोवां, माथो जी धोवां,
 जुवां-लिखां नहीं मारां, अरे पेमा नहीं मारां ॥६॥
 अरे पेमा दिवर-जिठाणियां, दिवर-जिठाणियां, खादी
 जो पेरां, रेशम नहीं पेरां, अरे पेमा नहीं पेरां ॥७॥
 अरे पेमा दिवर जिठाणियां, दिवर-जिठाणियां पानी
 जो लावां, अनछान्या नहीं लावां, अनछान्या नहीं
 लावां, जीवां री जतन करसां, अरे पेमा जीवां री
 जतन करसां ॥८॥ अरे पेमा दिवर-जिठाणियां, दिवर-
 जिठाणियां भोजन करसां, भोजन करसां, ऐंठो नहीं
 नाकां, अरे पेमा नहीं नाका ॥९॥ अरे पेमा दिवर-

जिठाणियां, दिवर-जिठाणियां, संप में रेसां, संप में
रेसां, हिल-मिल रेसां, हिल-मिल रेसां, आनन्द करसां,
अरे पेमा आनन्द करसां ॥१०॥

॥ नाच का गीत ॥

(तर्ज — रणझणियो ले)

ढोल ऊपर मत नाचजो सारा बाईजी, कांई जिन
थी जावे लाज हो भोजाई जी ॥१॥ मोटी जात
भारत तणी मारा बाईजी, कांई मुलकों में प्रसिद्ध हो
भोजाई जी ॥२॥ खानदान कुल आपनो मारा बाईजी,
कांई दुनियां करे बखान हो भोजाईजी ॥३॥ ढोल बजे
मैदान में मारा बाईजी, कांई रण के बाजे थाल हो
भोजाई जी ॥४॥ छत्तीस कौम देखन मिले मारा बाई
जी, कांई निरखे थारो नाच हो भोजाई जी ॥५॥ पेट
उघडसी नाचतां मारा बाईजी, कांई झाला देतां हाथ
हो भोजाईजी ॥६॥ घरदार घूमे घाघरो मारा बाईजी,
कांई कमर लचका खाय हो भोजाईजी ॥७॥ ढोली
करे थारी मसकरी, मारा बाईजी कांई डाको देवे चुकाय
हो भोजाई जी ॥८॥ नाचन थाने कोई केवे मारा बाईजी,
कांई आवे रीस अपार हो भोजाईजी ॥९॥ चवडे नाचो
ढोल पर मारा बाईजी, नहीं आवे लाज लगार हो
भोजाई जी ॥१०॥ पहली पातरियां नाचती मारा बाई

जी, उन जागा नाचो आप हो भोजाई जी ॥१०॥
 पुरुष देखे परवारिया मारा बाईजी, कांई व्यभिचारी
 हलियार हो भोजाई जी ॥११॥ थे भोला समझो नहीं
 मारा बाईजी, क्युं चबड़े नाचो आप हो भोजाई जी
 ॥१२॥ पैसा री कीमत करे मारा बाईजी, कांई देवे
 दलालों रे हाथ हो भोजाईजी ॥१३॥ भणिया-गुणिया
 हो नहीं मारा बाईजी, थे जागो धोलो दूध हो भोजाई
 जी ॥१४॥ पिण जहर भरयो इण नाच में मारा बाईजी,
 है खरी-खरी आ बात हो भोजाईजी ॥१५॥ सीख
 हमारी मानजो मारा बाईजी, कांई लेलो, सोगन आज
 हो भोजाईजी ॥१६॥ नाच कला तिरिया तणी मारा
 बाईजी, जो राखणी चाहो आप हो भोजाई जी ॥१७॥
 पति परमेश्वर आगले मारा बाईजी, कांई नाचो भक्ति
 सेत हो भोजाई जी ॥१८॥ 'श्रीनाथ' अब ढोल पर
 मत नाचोजी, कांई शुभगीतां री ओर चित्त ने राचो
 जी ॥१९॥

॥ आरती ॥

(तर्ज—तूं तो कई बाई भुआ आरती)

बन्दोली आई बाबासा री पोल, जटे ऊंटा तो
 पाट बैठनोजी ॥ जठे बैठे जठे बैठे बाबासा रा पूत, थे
 तो करो बाई भुआ आरतीजी ॥ थानी आरती में रुपया

पांच पचास, मोरां तो डाली डेढ़ सौ जी ॥ बाई देसां
 ए सहस्र पचास, जामन री जायी बेनडी जी ॥ बाई
 मिलसी ए माने सब परिवार, जामन-जायी न मिलेजी ॥
 वीरा आंसूं वीरा आंसूं ओ भतीजा-भतीजी रे व्याव, में
 तो हरष-हरष करसुं आरतीजी ॥ बहन भाई, बहन भाई
 राखजो प्रेम, दुनियां में ओ सुजस लेवजोजी ॥

॥ माया स्थापने का गीत ॥

(तर्ज—बंठो माया, बंठो माया ये गुल धान्या)

माया तो माता री प्रीति कहलावे, बना-बनी रो
 जीवन सफल बनावे ॥ बना-बनी रो जीवन उत्तम
 बनावे ॥१॥ पिताजी तो माया री जुगत बतावे, माता
 जी तो लुल-लुल पाय जो लागे ॥२॥ आठ प्रवचन दया
 माता रा जानो, दया धर्म सुं जीव सुख पावे ॥३॥
 बना-बनी दया माता रे चरणे शीश नमावे, गुण तो
 गावे न आनन्द पावे ॥४॥ घृत धारा ज्यूं धैर्यवंत
 होइजो, ने धर्म द्विपायजो ॥५॥

॥ विरथाल का गीत ॥

(तर्ज—बंठो माया उठो माया ये गुल धान्यां)

चार बायां मिल थाल परोसे, बना-बनी ने भोजन
 करावे, विरथाल नाम जगमें कहलावे ॥१॥ एंटों मती

नाकजो, जतना सुं खावो । भेला करीने घर में मत
 राखजो, लीलन फुलन सुं कर्म बंधावे ॥२॥ दान देई ने
 सुजस लीजो, थाल भर-भर साधर्मी ने दीजो ॥३॥
 अनाथ दुखीयाने साता उपजाइयजो शुभ करणी सुं
 बना-बनी सुख पावे ॥४॥ विरथाल का यह भाव
 सुनायो, जय-जयकार आनन्द वरतावो ॥५॥

॥ माहेरा रो गीत ॥

(सर्ज -- जीथो बना जाइजो जाइजो सब ही देश पूरब मत जावजोजी)

जियो वीरा घर में नागर बेल
 आंगण आंवो मोरियो जी वेगा आव ॥२॥
 जियो वीरा घर मांहे विरद है दोग,
 कागद लिख मेलियाजी वेगा आव ॥१॥
 जियो वीरा थारो घर समद्रां पार,
 उडाऊं ऊबी काग ने जी वेगा आव ॥२॥
 जियो वीरा क्यूं करी इतरी जेज,
 देवर मोसा बोलसीजी वेगा आव ॥३॥
 जियो वीरा मिलसी सघलो साथ,
 जामण जायो कद मिलेजी वेगा आव ॥४॥
 जियो वीरा पानी गई रे तालाब,
 पाल चढ़ झांकती जी वेगा आव ॥५॥

जियो वीरा झीणी-झीणी उडरे गुलाल,
घोड़े चढ़ आवियाजी वेगा आव ॥६॥

जियो वीरा सोना रो सूरज आज,
लारे भावज लावियाजी वेगा आव ॥७॥

जियो वीरा डेरा हरिया बाग,
दिराया कंथ खंत सुं जी वेगा आव ॥८॥

जियो वीरा जितरी घर री रीत,
माहेरा उतरो मांडजोजी वेगा आव ॥९॥

जियो वीरा लियां दियां राजी डूम,
में तो भूखा मोहराजी वेगा आव ॥१०॥

जियो वीरा एकज मारी मांग,
खादी-सादी लावजो जी वेगा आव ॥११॥

जियो वीरा इन अवसर पर आय,
दिपाव्रो मारा विरदनेजी वेगा आव ॥१२॥

जियो वीरा आरी आ आशीश,
अमर मोलयो चून्दडी जी वेगा आव ॥१३॥

जियो वीरा 'धीरज' धर श्रीनाथ,
बखाण्यो थारो माहेरो जी वेगा आव ॥१४॥

॥ माहेरा रो गीत ॥

(तर्ज—बरसो मारा काला बादल बरसो ।)

बरसो पिताजी रा भईसा आवेला थारी जी ॥
 खोलो तिजोरियाँ ने पेटियाँ काढो रुपैयाजी ॥
 पंचां में तिलक कढाओ चून्दडी ओढावजोजी ॥
 देवो मन्ने सोना ने चाँदी, हीरा ने पन्नाजी ॥
 मोती माणक ने पन्ना, गेहूणा ने कापडा जी ॥
 सासु सुसराजी ने देयजो, देवर जेठाणियाँ ने जी ॥
 ननंद ननदोई ने दीजो, श्री संघ साधर्मी ने जी ॥
 देवो मोरां ने रुपिया, जल ज्यूं बरसजोजी ॥
 एक मातारा जाया, अन्तर मत राखजोजी ॥
 दुनियां में सुजस लेयजोजी, दान खूब देयजोजी ॥
 धन्य थांनी माता जाया पुत्र गुणवंता जी ॥
 बरसो मारा काला बादल बरसो' सवैयाजी ॥

॥ नकाशी का गीत ॥

(तर्ज—केसरियो लुल-लुल सामो जीवे ।)

बनडा ने मामाजी कोजलियो पेरावे, शुद्ध तो
 खादी रा कपडा पेरावे ॥ केसरिया पेचो माथे बंधावे,
 कसुम्बल जामो तन पर पेरावे ॥ बनडा रे बाबासा
 मोड बंधावे, पेले मुकुट अब मोड जी जानो ॥ बनडा

रा काकासा जान सजावे, जान सजावे न सुजस लेवे ॥
 बनडा रा बहनोई घोडी सिनगारे, घोडी सिनगारे न
 मारग रोके ॥ बनडा री माताजी तिलक करावे,
 तिलक करावे ने दूध पिलावे ॥ दूध पीने जायजो रे
 जाया, परणीज ने वेगा आयजो ॥ बनडा रे काकीसा
 चावल चेडे, चावल चेडे ने हिम्मत बंधावे ॥ बनडा
 री बेनड आरती करे, आरती तो करे ने वीरा ने
 बधावे ॥ बनडा रा वीरो सा बाजा मंगावे, बाजा
 मंगावे ने हर्ष मनावे ॥ केसरियो लुल-लुल सामो
 जोवे, जानुं मारे सब परिवार साथ में आवे, साथ में
 आवे न सुजस लेवे ॥

॥ तोरण पर बीन्द जब आते हैं तब गाने का गीत ॥

(तर्ज—कमली वाले ने ।)

घोडे पर बैठी बहन सयानी, लूण उतारे बनडे
 रो ॥ बलिहारी जाती भाई री, बहु मोद बढ़यो है
 मनडे रो ॥टेर॥ शुभ मुहूर्त्त में मंगलकारी, तैयारी
 सारी कर डारी । वेलासर वर घोडी निकल्यो, मुख
 नूर बढ़यो है बनडे रो ॥१॥ निशान चले नौबत घुरें,
 अंग्रेजी बाजा बाज रहे । कोतल घोडों री लेण बनी,
 घणो ठाठ सज्यो है बनडे रो ॥२॥ है हूस हूसीला बड़

जान्यां, बण ठण ने आगे चाल रया ॥ सिगनार सजी
 सब जानणियां, मिल साथ कियो है बनडे रो ॥३॥
 सरपेच कलंगी तुरा धज, मोती री लूँबक झूम गयी ।
 झिलमिल-झिलमिल गहणा पलके, चलके तन सुन्दर
 बनडे रो ॥४॥ श्रीनाथ को बनडी धीरज से, गोखे से
 बैठी झांक रही । बनडी ने निरखण चुपके सुं, ललचाय
 रयो चित्त बनडे रो ॥५॥

॥ संभेला रो गीत ॥

(तर्ज—संभेले री वेला मारी बनडी पोल परी उघडेरें ।)

उठो मारी बालक बनडी, कोजलियो तो पेरों ।
 धोला तो कपड़ा ए बनडी, शुद्ध खादी रा ॥ १ ॥
 इसडा तो कोजलियो बनडी, मामी सा पेरारवे ।
 मामी सा पेरारवे बनडी, मामो सा हर्षारवे ॥ २ ॥
 उठो मारी बालक बनडी, चुडलोजी पेरों ।
 इसडो तो चुडलो थारी माताजी पेरारवे ॥
 माताजी पेरारवे ने पिताजी हर्षारवे ॥ ३ ॥
 उठो मारी बालक बनडी, बिछिया जो पेरों ।
 इसडा तो बिछिया थारी भोजाई पेरारवे ॥
 भोजाई जी पेरारवे भाई रे मन भावे ॥ ४ ॥

उठो मारा माताजी सजो सिर्नगार ।
बधावण री वेला माता, होयजो तयार ॥५॥

कलश तो लीधो माता, बायां रे परिवार ।
तिलक तो कीनो ने चावल चेड्या ॥६॥

बनडा ने देखने हर्ष मनावे ।
उठो मारा पिताजी मिलनी करावो ॥७॥

हृदय सुं हृदय मिलायने मिलजो ।
ब्याई-ब्याई में अन्तर मत रखजो ॥८॥

प्रेम का झरणा तो आप बेवायजो ।
केसर कुंकुरा तिलक करायजो ॥९॥

अन्तर गुलाब जल छांटना नकायजो ।
गुलाल तो तन पर कोई मत डालो ॥१०॥

अंदी तो रीत आ जल्दी मिटाओ ।
शुभ वेला मांही आछी न लागे ॥११॥

मेहलां रे मांही बालक बनडी बंठी ।
बनडा री वाट बालक बनडी जोती ॥१२॥

तोरण ऊपर बनडोजी आवे ।
बनडी तो देखने अति हरषावे ॥१३॥

॥ बनडारा बधामणा ॥

(बींद तोरण पर आवे जद बोलने का गीत)

(तर्ज--जिनमन का डंका आलम में बजवा दिया)

देखण ने चालो मिल करके, तोरण पे बनडो आयो है, तोरण पै बनडो आयो है, साथिडो ने संग लायो है ॥१॥ आ अबलक घोडी नीचे है, जिण रे पग नेवर बाजे हैं । बनडा री शोभा छाजे है ॥ तोरण ॥२॥ संग ढोल नगारा लाया है, सखिया ने मंगल गाया है । देखत मन हर्ष सवाया है ॥ तोरण ॥२॥ वेवाईजी री हुशियारी है, जान बनाई हृद भारी, स्वागत री करलो तैयारी ॥ तोरण ॥३॥ ओ बनडो मनमें मुलके है, तुरी सिर ऊपर झिलके है । काई नूर लिलाडे पलके है ॥४॥ चुपके छिपके उठ धाई है, चढ़ बनी गोखडे आई है बनडे पर आख जमाई है ॥ तोरण ॥५॥ श्रीनाथ ने धीरज धारी है, बनडी भी गई निहारी है । अब पूखण की तैयारी है ॥६॥

॥ जानियां का गीत ॥

(तर्ज--काणा कोड्या जानियां लाया देड)

शाना दाना जानी लाया, शोभा घणी जानकी पिताजी ने साथे लाया, सत्य जयकार की ॥१॥ काका

जी ने साथे लाया, दान दिरावसी । वीराजी ने साथे लाया, होसी मंगल कारजी ॥२॥ रातारा मत जीमो जान्या, शोभा नहीं आपकी । दिनरा तो जीमो, शोभा होसी आपकी ॥३॥ तोरण की रीत चाली नेमिनाथ भगवान थी । अभयदान तो देवो ब्याई, जीव दया है मोट की ॥४॥ अभयदान तोरण पर देवो, रक्षा करो पशु पक्षी की, पशु पक्षी रक्षा करने, नाम बढाओ महावीर की ॥

॥ जान का म्वागत ॥

(तर्ज--सज्जन आया मारे आंगण)

सज्जन आया मारे आंगणे, बहुत दिनासु वाट जोवता रे । कद आसी सज्जन जान, सज्जन मारे आज आनन्द बधावना रे ॥१॥ सज्जन आया मारे आंगणे रे, ऊँचा तो पाट बिठाय ॥२॥ वस्त्र माला पेराव सां रे, कुंकुरा तिलक लिलाड ॥३॥ रतन सरीखी कन्या देवसां रे, कन्या घणी सुखमाल ॥४॥ मैं जान्या जिम जानजो रे, कन्या ने सोरी राखजो, मारी छे प्राण आधार ॥५॥ आपरे खोलां में देवसां रे, राखजो प्राण समान ॥६॥

॥ पूँखण का गीत ॥

(तर्ज—पूँखणियाँ पूखताए लादो ए नवसर हार)

पूँखण चालो सखियां मिलने, बनडो ऊबो द्वार
 ॥१॥ गुदलरु सावा साजणा, काई करिये न जेज
 लगार ॥२॥ बनडो ऊबो दाट है जेवे, वेगी हो तैयार
 ॥३॥ चूंदडी ओढो नाक में बाली, पहरो नवसर हार
 ॥४॥ कुंकु चावल सामग्री सुं, भरो रुपारो थाल ॥५॥
 झिलमिल आरती हाथ में लेवो, जलदी चालो बार ॥६॥
 मूसल हांसली जूदूडो तीर, पूँखणिया तैयार ॥७॥ पूँखण
 वाली चतुर स्यानी, बाबासा घर नार ॥८॥ तिलक
 करंता चावल चेडत तणिक न लागे वार, समझण नाक
 मरोडला नाहीं, रीत करे आ गँवार ॥१०॥ पूँखे जत-
 नसुं पदमणी है, नाके छोँके हुशियार ॥११॥ धीरज
 धर सामुजी लावे, वाने तो श्रीनाथ ॥१२॥

॥ पूँखण का गीत ॥

(तर्ज—तोरण आय दडकिया जी गज कामनियां ।)

तोरण बीन्दराजा पधारियाजी बधावना, काई
 सामुजी देवे उपदेश बनाजी तिलक इम काढेजी
 बधावना ॥ कुंकु जिम प्रीति राखजो बधावना, काई
 चावल जिम उज्जवल भाव राखोजी बधावना ॥ दही

जिमावे ठंडो रेवजो बधावना, कांई गुल जिम मीठी
जबान राखजो बधावना ॥ नाक लेऊँ बेटी देऊँजी कांई
बधावना थे राखो नाक री लाज काजल इम घालेजी
बधावना ॥ मर्यादा में जो तुम न रेवोजी बधावना,
कांई कुल में कलंग लग जाय कंवर सा बधावना ॥
मर्यादा में चालजो बधावना, कांई झिलमिल आरती सुं
बधाय ले जाऊँ परणासुं बधावना ॥ मोत्यां ज्यूं मूंगा
घणोजी बधावना कांई हिवडा रे हार कुल दिपावजो
बधावना । दही मथने से मक्खन निकलेजी कांई बधावना,
कांई नरम-गरम खजो भाव होवे जसकीति बधावना ॥
तोरण बीन्द सराविया बधावना, कांई सारे बन्धु सब
परिवार आनन्द वरताविया बधावना ॥

॥ हथलेया और चँवरी का गीत ॥

(तज—माया आया मगल गाया भुआ बाई रो नेग चुकाओ ।)

पंडितजी हथलेवो जुडावोजी । भुआजी हाथे
मेंहदी रखावोजी चेडा बांधी ने चवरयां में जावेजी ।
मेंहदी रंग ज्यूं प्रेम बढाओजी । चवरियां में चँवर
ढुलावोजी । जुवाडा बैलां रे गर्दन पर रेवेजी गाडी रो
भार सगलो उठावेजी । जिम गृहस्थ रा भार
उठावोजी । जोडी जुगत सुं हिल-मिल चालोजी ।

चारो दिशा में खूंटिया रूपावोजी । ज्ञान, दर्शन,
 चारित्र तप कहलावेजी । काचा-ताणा ज्युं संसार है
 काचोजी । चवदहवां स्वप्न अग्नि री साक्षी देवेजी ।
 पति-पत्नी विश्वासघात मत करजोजी । करो तो अग्नि
 ज्युं दुःख पासोजी । पंडित ने पास बैठावोजी । मंत्र
 नवकार लोगसस सुनावोजी । शान्तिनाथ का स्तोत्र
 सुनावोजी । भक्तामर का श्लोक सुनावोजी । मंगलिक
 उत्तम श्रेष्ठ सुनावोजी । चार कलश माता-पिता लेने
 आवेजी । अगर, चन्दन, केसर ने कुंकुजी । आरती
 करने धन देवोजी । मामाजी आयने सेवरो दिरावेजी,
 वीराजी आयने सेवरो पेरावेजी । सात वचन बनी ने
 बना देवेजी । सात वचन बना ने बनी देवेजी, आगे तो
 ए फेरा फिरावेजी ॥

॥ चँवरी में पंडितजी वर-वधु को हित शिक्षण देना ॥

नवा नगर सुं पंडित आयो, सियल सुभूषण साथे
 लायो ॥१॥ गुणवंती गौरी ने देखकर, नीति रो मारग
 दिखायो ॥२॥ सत्य धर्म ने साचो पालो, ऐडो चोखो
 ज्ञान करायो, पती धर्म री पाति बांधी, समता रो सिर
 पेच लगायो चतुराई री चूपों पहरी, विनय धर्म री
 वाली लायो नित्य नियम रो दे तिमणियाँ, हिम्मत रो

गलहार धरायो ज्ञान ध्यान रा दिया गोखरू, गजरो शुभगुण
 रो पहरायो गुण रूपी गहना पहराई, गुणवंती रो नाम
 दिपायो सत्य शीलरा गीत गायने, मंगल में मंगल वरतायो
 लाज सहित संचरजो बहिनो, यूँ कह पंडित नगर सिधायो
 शुभ गीतां सु स्नेह सवायो, धीरजमल श्रीनाथ लगायो ॥

॥ पती से सात वचनों की माँग ॥

(तर्ज — जब तुम्हीं चने परदेश लगा कर ठेस ।)

ले हाथ में मेरा हाथ, वचन दे सात, गृहिणी बनाना
 जीवन भर मुझे निभाना ॥ १ ॥

आज्ञा नहीं सिर्फ सलाह लेना, जो काम करो सो कह देना
 गृहस्थी की नैया ऐसे पार लगाना ॥ २ ॥

गल्ती हो तो शिक्षा देना, एकान्त में चाहे सो कहना ।
 ननंद सखियों के आगे, न आँख दिखाना ॥ ३ ॥

मैं तुम पर ही दावा रखती, औरों से माँग नहीं सकती
 आवश्यक वस्तु मेरी सारी लाना ॥ ४ ॥

सुख दुःख या रोग राग रंग में, रखना सब समय मुझे
 संगमें । छोड़ना हाथ मन अध बीच छे दिखाना ॥ ५ ॥

गैरों से प्रीति लगाना मत, परनारी के घर जाना मत ।
 दुई को छोड़ कर प्रेम रंग वर्षाना ॥ ६ ॥

गंगा यमुना का मेल चले, इस मेल में जीवन खेल चले
 केवल कहे कर्तव्य पालनकर सुखपाना ॥ ७ ॥

❀ पत्नी से सात वचन लेना ❀

(तर्ज—जब तुम्हो चले परदेश लगा कर ठेस ।)

देता हूँ वचन मैं सात, रखूंगा साथ, कहा सो माना,
पर तुम ये वचन निभाना । टेर।।

जो आज्ञा दूँ पूरी करना, बिन हुक्म एक पग नहीं धरना ।
मत सुनी अनसुनी करके जिया जलाना ॥१॥

सह योगिनी सह धर्मिणी रहना, जीवन में संग-संग बहना,
मैं जाऊँ पूर्व तो तुम मत पश्चिम जाना ॥२॥

मानस के अनावृत द्वार रहे, प्रीत की कल निर्झरणा बहे ।
दो तन एक मन होना न कुछ भी छिपाना ॥३॥

चाहे वह सुर हो सुरपति हो, चाहे नरपति या रतिपति हो ।
पर पुरुष समझना भाई न नैन मिलाना ॥४॥

जो मांगेगी दूंगा मैं वह सभी, तुमको यह ध्यान रहे फिर भी,
जो मिलजावे उस ही में काम चलाना ॥५॥

संपत्ति विपत्ति की कडियों में, दुःख की यह सुख की घडियों
में, तुम साथ छोड़ कर पीहर भाग न जाना ॥६॥

करुणा सेवा लज्जा गहने, वह धन्य हुई जिसने पहने ।
तुम दिव्य देवी बन केवल कहे यश पाना ॥७॥

॥ फेरग खाने का गीत ॥

(तर्ज—पहले तो फेरे बनडी बाबासा की बंटी ।)

पेले तो फेरे बनडी अरिहंत जी ने नमजो ।
दूजे तो फेरे बनडी सिद्ध जी ने नमजो ।
तीजे तो फेरे बनडी साहु जी ने नमजो ।
चौथे तो फेरे बनडी दया धर्म ने नमजो ।
माता-पिता काका वीराजी ने बुलावो ।
मामाजी मामीजी सगला ही आवो ।
बनडी रो तो हथलेवो बेगो छुडावो ।
गायां रा गोकुल धन बहुत देयजो ।
पंडित ने दक्षिणा पूरी जो देयजो ।

बींद राजा को डेरे पर पहुँचाने के लिए
जाते वक्त बोलने का गीत

(तर्ज—आलो-लीलो मरवो ने नवा छाजां छायो ।)

आलो लीलो मरवो ने नवा छाजां छायो, अपना
हो शशीकला बाई जिस घर देशां ॥ राय उमरावाँ रो
होड़ मती करजो, थानी जोडी रो वर देखने दीनां ॥
सोलह वर्ष मारी बनडी रही ब्रह्मचारिणी, इनसुं वर
मिलिया सुखकारी ॥ बीस वर्ष मारा बनडा रया

ब्रह्मचारी, इन कारण मिलिया शीलवन्ती नारी ॥ सुख
 मायें रहजो ने जीवन बितायजो, हिलमिल प्रेम बहुत
 बढ़ायजोजी ॥

॥ बधावा ॥

(तर्ज—कसुम्बल वीरा बधावना ।)

ये तो ऊँची-ऊँची मेढी सोवन्ति, ओ तो दिवलो
 बले रे मजालो ॥ करसुं मंगल बधावना ॥१॥ जठे
 पन्नालालजी पोढ़िया, वारी सैंदन ढोले वायरोजी ॥
 करसुं मंगल बधावना ॥२॥ यह तो ढोल ढुलन्ता इम
 कह्यो, थाने क्रिम सुख आयी नीन्दोजी ॥३॥ बाई मंजु
 परणाई मेली सासरे, माने इण सुख आयी माने
 नीन्दोजी ॥ करसुं मंगल बधावना ॥४॥

॥ कैंवर कलेवा और संघ पूजन का गीत ॥

(तर्ज—थारो माथा रो दूबालो ओ बीन्दराजा ।)

सासु सुसराजी घणा हरषाया ओ बीन्दराजा ।
 कलेवो मेल्यो जीमण काज ॥ लाडु ने पेडा सरस
 जलेबी । घेवरिया है चार ॥ कपड़ा ने गेणा माणक
 मोती, पेरो तन पर धार ॥ संघरी सेवा करनी बींद
 राजा, संघ चार प्रकार जान ॥ साधु-साधवी ने श्रावक-

श्राविका, ये चारों ही उत्तम जान ॥ साधु संता ने
 वन्दना जो करनी, ज्ञान सीखो बारम्बार ॥ चौदह
 प्रकार का दान जो देनो, ओ श्रावक रो आचार ॥
 श्रावक-श्राविका साधर्मो भाई, यांरी सेवा उत्तम जान ॥
 आहार-पानी, वस्त्र दान जो देनो, श्री संघ में सुयश
 थाय ॥ गोत्र तीर्थकर बांधे बींदराजा, चार तीरथ सेवा
 जान ॥ कृष्ण श्रेणिक नी परे तीर्थकर गोत्र बंधाय ॥
 श्री संघ री सेवा पुन्यवन्त करसी, वरतेला संगलाचार ॥

❀ धडीन्दो ❀

(तर्ज—छाती धड़के डरपो मत ।)

मारे अठासुं आयो रे धडीन्दो, सगां रो दिल
 हर्षे-हर्षे भल । हां रे हर्षे भल, में तो शुभ गीत गासां
 बार-बार गासां ॥टेर॥ फलाण चन्दजी वाली निजपति
 प्यारी, थारा सुं मैं बात करसुं ॥१॥ अमुकरामजी वाली
 लायी सुपारी, पति आज्ञा में रहे नारी ॥२॥
 फलाणमलजी वाली पंखी डोले, सारां सुं मीठी बोले ॥३॥

॥ भोजन के समय व्यायजी को गाने का गीत ॥

(तर्ज—सांमली भीत बिजोरा मां, या, ओरारी भीत, झेलू बीजोरा ले)
 लारली रात ब्यायजी आया, आया सरवर री पाल ।
 लावो वेवायां ने ॥टेर॥

सोना रो भल सूरज ऊगियो, आया वेवाई द्वार ।
 लावो वेवायां ने ॥ १ ॥
 मैं थाने पूछूं वेवाई जी, थारे न कितरो साथ ।
 लावो वेवायां ने ॥ २ ॥
 दो काकारा दो मामारा, चारो ही बेटा थाय ।
 लावो वेवायां ने ॥ ३ ॥
 नोहरा मांहे डेरा दिरावो, करसां हो सार संभाल ।
 लावो वेवायां ने ॥ ४ ॥
 दांतण देय संपाडा सारूं, पाणी ऊनो तैयार ।
 लावो वेवायां ने ॥ ५ ॥
 गादी ढाल बिछावो पाटो, मेलो रूपारो थाल ।
 लावो वेवायां ने ॥ ६ ॥
 मगद चूरमो खाजा पुरसां, जिनमें है वेशी खाण्ड ।
 लावो वेवायां ने ॥ ७ ॥
 घणा दिनां सुं आप पधरया, पूछूं मैं केवो बात ।
 लावो वेवायां ने ॥ ८ ॥
 कांई आपरो हुक्म हबालो, कांई विणज व्यापार ।
 लावो वेवायां ने ॥ ९ ॥
 सुणो-सुणो फलाणचन्दजी सा थारी, चोखी है कुल रीत,
 लावो वेवायां ने ॥ १० ॥
 सगा वाला सुं हेत सवायो, देखत हरख अपार ।
 लावो वेवायां ने ॥ ११ ॥

थोड़ी देवा घणीज मानो, लेवो थे करने कोड ।
 लावो वेवायां ने ॥१२॥
 वन आवे है फूल पांखडी, मानो थे चौसर हार ॥
 लावो वेवायां ने ॥१३॥
 करो नहीं थे थूक फजीता, राखो सीधो व्यवहार ।
 लावो वेवायां ने ॥१४॥
 मारा बाईसा सुखी सासरे, पावे बेटी ज्यू प्यार ।
 लावो वेवायां ने ॥१५॥
 दौड़-दौड़ ने दोरी बगत में, आवो पालो कुल रीत,
 लावो वेवायां ने ॥१६॥
 एक ओलम्बो देऊँ आपने खटकियो है मारे चित्त
 लावो वेवायां ने ॥१७॥
 वेवाणजी ने क्यों नहीं लाया, मासु काई वारे रीस,
 लावो वेवायां ने ॥१८॥
 अबके आइजो जरूर लाइजो, मानो श्रीनाथ री सीख ।
 लावो वेवायां ने ॥१९॥

॥ वेवायों रा बखाण ॥

(तज—बांस बढाओ नगरी रा चार, घाघरियो घूमेला ।)

थारा कुल रा हो करां बखाण, वेवायां सुणो सा ॥टेरा॥
 थे तो आया हो वरसां सुं आज, वेवायां सुणो सा ॥१॥

माने गावण रो है घणो कोड, वेवायां सुणो सा ॥३॥
 धीरा गरवा हो गुणवन्ता आप, वेवायां सुणो सा ॥३॥
 घणा गुणी हो शूरा कुलवान, वेवायां सुणो सा ॥४॥
 रात्रि भोजन हो नही करो लगार, वेवायां सुणो सा ॥५॥
 भक्षाभक्ष रो हो राखो विचार, वेवायां सुणो सा ॥६॥
 थारे कुल री आ हो मोटी रीत, वेवायां सुणो सा ॥७॥
 नहीं खावो हो मोसर रो माल, वेवायां सुणो सा ॥८॥
 बेटी बेचण री नहीं थारे रीत, वेवायां सुणो सा ॥९॥
 डोरो मांगण री भी नहीं है रीत, वेवायां सुणो सा ॥१०॥
 करो टाबर रो नहीं वेगो व्याव, वेवायां सुणो सा ॥११॥
 बूढा-ठाडा रो, नहीं चावो व्याव, वेवायां सुणो सा ॥१२॥
 थारे घर में हो गावे शुभगीत, वेवायां सुणो सा ॥१३॥
 विद्या पढ़ने में पूरा प्रवीण, वेवायां सुणो सा ॥१४॥
 मुलकों-मुलकों में हो, विणज व्यापार, वेवायां सुणोसा ॥१५॥
 स्वागत करसां हो, गा गीत रसाल, वेवायां सुणो सा ॥१६॥
 मारे आइजो हो, थे बारम्बार, वेवायां सुणो सा ॥१७॥
 मारे बाईसा ने हो लीजो निभाय, वेवायां सुणो सा ॥१८॥
 गावे हरखे हो सुणे श्रीनाथ, वेवायां सुणो सा ॥१९॥

॥ वेवायां ने सीखामण ॥

(तर्ज— थारी-थारी हो वेवायां नार-दूध दही बेचन ने चाली,
जेलूँ बेच न जाणें गँवार फिर गई सगारी गली ।)

थारी-थारी ओ वेवायों नार सीख साची पूछन ने चाली । पूछे-पूछे हो मन धरी कोड रीत काँई कुलरी-भली ॥१॥ थारी-थारी हो कुल मरजाद बताय देऊँ बात मैं खरी । सुणो-सुणो हो ध्यान लगाय, होवेला थारे मनमें रली ॥१॥ थारो-थारो हो देश विख्यात छाप जिनरी मुल्कों में पड़ी, थारी-थारी हो उत्तम जात-एकताई न्यात में बडी ॥२॥ मोटो-मोटो हो घर में संप रींझ रही लिछमी घणी । सोरो-सोरो हो सारो परिवार-रीत भांत उत्तम बणी ॥३॥ मारा वेडाईसा चतुर सुजान, न्याय बैठा हाटां में करे । पूछे-पूछे हो सिखामण लोग-पाशों वारो राज में परे ॥४॥ करे-करे हो न्याति में सुधार खोटी रीतां ने दूर करे । जाति न्याति में हो मोटा पंच खंच नहीं खोटी करे ॥५॥ रीति नीति हो विणज व्यापार परदेशां में प्रख्यात घणो । खर्चे-खर्चे हो धरम रे काम लेवो लावो लक्षमी तणो ॥६॥ खावे-खावे न मौसर माल व्याव अनमेल न करे । मांगे-मांगे न डोरो आप कन्या बेच थैली न भरे ॥७॥ ऐडी-ऐडी धीरज कुल रीत हियो मारे देखने ठरे । नहीं गावे हो फाटा गीत शुभगीतां सुं प्यार है घरे ॥८॥

॥ वेवायी का गीत ॥

(तर्ज—थांनी-थांनी ओ बेईजी थांती नार)

थांनी-थांनी ओ बेईजी दही दूध रो दान देवे ।
सामा मिलिया शान्तिलालजी कुमार, हाथ माहें ज्ञान
रो पोथी ॥ सुनो-सुनो ओ व्यायनजी बात, रातरा थे
जीमो मती ॥ सुनो-सुनो ओ व्यायनजी बात, कंद
मूल थे खावो मती । इनमें लागे है पाप अपार, कर्म
बंधे चिकना करो ॥ सुनो-सुनो व्यायनजी बात, पापड़
रातरा थे बटजो मती ॥ और आरम्भ-सारम्भ रा
काम, रातरा थे करजो मती ॥ इनमें हिंसा होवे अपार
मच्छर, डांस, जीव मरे करी ॥ सुनो-सुनो व्यायनजी
बात, गंधा गीत गायजो मती ॥ इनमें शोभा नहीं लिंगार,
अनर्थादण्ड पाप होवे करी ॥ सुनो-सुनो व्यायनजी बात,
बाई ने सोरी राखजो करी ॥ में तो दीनी खोला माहें
डाल, आप रे तो पुत्री लाड़की ॥ सुनी-सुनी ओ बेईसा
थारी बात, आज दिन धार ली करी ॥ मने शिक्षण
दीनो आप, भव-भव भलो होइजो करी ॥ आप शीलवंत
कुमार, मारो जीवन सूधारयो करी ॥

॥ बेईजी का गीत ॥

(तर्ज—आवो बेईजी डोडी-डोडी निजरासुं)

आवो बेईजी शुभ निजर थी थे जोवो, हां ओ
बुद्धिवालिका, हां ओ विनयवालिका, पाप निजर थी
मत जोवो ॥टेरा॥ हां ओ बेईजी रातरा भोजन थे
मत करजो ॥ हां ओ बेईजी ऐंठो थे मती नाखजो ॥
हां ओ बेईजी मूंगा मोलारी चीजां है । हां ओ बेईजी
कीड़ियां घणी मरजासी ॥ हां ओ बेईजी होली रा
फाग मत खेलजो ॥ हां ओ बेईजी घर में पाप अपार
मानजो ॥ हां ओ बेईजी जुवा सट्टा मत खेलजो ॥
हां ओ बेईजी पर-नारी सामो मत देखो ॥ हां ओ
बेईजी जावेला दुर्गति मांय ॥

॥ भोजन री तैयारी ॥

पांतिया लावो रे पांतिया लावो ।
पांतिया मँला वे तो धोवाडे ने पांतिया लावो ॥१॥
पाटिया लावो रे पाटिया लावो ।
पाटिया भागा वे तो संघावे ने पाटिया लावो ॥२॥
थालियां लावो रे थालियां लावो ।
थालियां ऐंठी वे तो मंजावे ने थालियां लावो ॥३॥

बाटकियां लावो रे बाटकियां लावो ।
 बाटकियां गमी वे तो सोधावे ने बाटकियां लावो ॥४॥
 कलशियां लावो रे कलशियां लावो ।
 कलशियां फूटा वे तो झेलावे ने कलशिया लावो ॥५॥
 पुरसणिया लावो रे पुरसणिया लावो ।
 पुरसणिया भूखा वे तो जिमाडे ने पुरसणियां लाओ ॥६॥
 भोजनिया लावो रे भोजनिया लावो ।
 भोजनिया ठंडा वे तो ऊना करने भोजनिया लावो ॥७॥
 दीवटिया लावो रे दीवटिया लावो ।
 दीवटिया बुझिया वे तो सलगावे ने दीवटिया लावो ॥८॥
 पान बीडा लावो रे पान बीडा लावो ।
 पान थारा कोरा वे तो लगावे ने पान बीडा लावो ॥९॥
 गीतडा गावो रे गीतडा गावो ।
 गीतडा नहीं आवे तो शुभगीतां री पोथियां सूं गीतडा
 गावो ॥१०॥

॥ जुवा-जुवी का गीत ॥

(तब—जुवा रमे जुवी रमे बनडा ने बनडी)

सुनजो बना-बनी सीख सुखदाई । जुवा रमण
 री चाल है खोटी ॥ जुवा तो रमिया पाण्डव भाई,
 झोपदी ने हारी बनवास में फिरिया ॥ नरराज तो

राज्य ने हराया । कई कष्ट वनवास दुःख उठाया ॥
जुवा तो वासुदेव ने कंस जो खेलया । देवकी रे छः
ही जो पुत्र ने मारया ॥ इम तो जुवा थी बहु दुःख
पाया ॥ इम जाणी ने जुवा मत रमजो ॥ खोटी चालां
कुटुम्ब सिखावे । इन थी बना-बनी दुःख जों पावे ॥
सब मिलने जुवा मति खेलायजो ॥ बेटा-बेटी बिगडे
ने कलंक लगावे । प्रेम थी बैठाय ने शुभगीत सुनायजों ।
ठौरां मुट्ठी बना-बनी मत रमाइजों ॥ पतिव्रता नारी
पति ने नहीं मारे, मारे तो अपना धर्म गमावे मारे तो
चुडियां-बद जावे । अपशकुन जो व्याव में थावे ॥
सदाचारी पुरुष नारी ने नहीं मारे, नारी ने मारे तो
इज्जत गमावे ॥

॥ कंकण डोरा खोलने का गीत ॥

(तर्ज—इन डोर ले सात गांठ लाड-लडासुं)

इन डोर ले सात गांठ लाड-लडासुं न खुलेजी ।
इन डोर ले सात गांठ लाड-लडासुं न खुलेजी ॥ थाना
मात-पिता दीनो जन्म ज्ञान नहीं देवियोजी, अब बनजो
चतुर सुजान डोरला खोलजोजी ॥ थाना मात-पिता
बुद्धिवान ज्ञान सिखावियोजी ॥ ए तो जीमो अमृत
भोजन जाण जल अनछान्यो मत बापरोजी ॥ए॥

गांठ समो संसार, जुगती सुं निभावजोजी ॥ लेयजो
कुटुम्ब सुं यज्ञ, सबने निभायजोजी ॥ डोर लो शुभ
स्थान थांभ बंधावजोजी ॥

॥ पेरावणी का गीत ॥

(तर्ज—मारे आंगण जेवंतडी रो रूखो मारा पिऊजी)

मारे आंगण जेवंतडी रो रूखो मारा पिऊजी,
सज्जन रे जांगण ऐलचीजी ॥ राजकँवर रो मारथों तो
गुंथायो मारा पिऊजी, सोलह शृंगार सजावियाजी ॥
राजकँवर सारे कालजिया री कोरो मारा पिऊजी, दूध
पाय मोटी करीजी ॥ हस्ति मांयला मोटा हस्ति देवो
मारा पिऊजी, राजकँवर मत देवजोजी ॥ घुडला
मांयला आछा घुडला देवो मारा पिऊजी, राजकँवर
मत देवजोजी ॥ गोकुल मांयली आछी गायं देवो मार
पिऊजी, राजकँवर मत देवजोजी ॥ गेणा मांयला आछा
गेणा देवो मारा पिऊजी, राजकँवर मत देवजोजी ॥
कपडा मांयला आछा कपडा देवो मारा पिऊजी, राज-
कँवर मत देवजोजी ॥ हारया-हारया राजा ने राणा मारी
मरवण, इण विध अपन हारियाजी ॥ जीत्या-जीत्या
सज्जन रो परिवारो मारी मरवण आपें ए तो हारिया
जी ॥

॥ विदाई का गीत ॥

(तर्ज-ओ आम्बाजी पाकां आंबली)

ओ कोपरा तो रुपिया बरसाविया ॥ ओ आया
द्वार के पास । ओ थली रे नमन करे । ओ इतना दिन
रमी घर मांय ॥ ओ सीवा छोडी चालियाजी । ओ में
थाने पूछां मारा मंजु बाई ॥ ओ इतरो पिताजी सुं
हेत छोड़ने बाई सीद चालया ॥ ओ आया परदेशी
कँवर सा ॥ ओ लेग्या सहेलयां सुं टाल ॥ ओ कँवरा
बाई सीद चालया ॥ ओ पतिव्रता धर्म थे पालजो ॥
ओ रयजो पति आज्ञा के मांय । ओ पति आज्ञा रे
विरुद्ध मत चालजो ॥ ओ साधु सुसरारी आज्ञा पालजो ।
ओ वे ही है मांयने बाप सेवा उनकी करजो ॥ ओ
देवर जेठ ने भाई जिम जानजो जो ॥ ओ ननदल बेन
समान हिल-मिल सब में रेवोजी ॥ ओ संसार में सुजस
लेवजो ॥ ओ माता-पिता रा नाथ जो दिपाय कँवर-
बाई सुख में रयजो ॥ ओ साधु संतरा दर्शन थे करजो ॥
ओ साभाविक पडिक्कमणो करजो नित जाण, प्रेम माहें
रेवजो । ओ पुत्री पहुँचावन पाछः फिरिया । ओ छूटी
आंसूडा री धार श्रावणियो बरसियो ॥

॥ बनी ने सिखामण ॥

(तर्ज-लहरियो पंचरंगो बणियो-लहरियो राजाशाही बणियो)

बनी तू सीख मान लीजे, सासरिया में जाय सब
रो मन तूं हरलीजे ॥१॥ जदतूं जावे सासरिया में, करजे
सद्व्यवहार । परमेश्वर जूं जाण पति ने, करजे पूरो प्यार
॥२॥ सास ससुर ने मायत गिणजे, लीजे सेवा धार । मीठा
बोल बोलजे बाई, मत करजे तकरार ॥ बनी ॥३॥
देराणी जेठानीजी री लीजे बातां मान । आलस तन
सुं दूर राखजे, होवेला सन्मान ॥४॥ पति जिमायां
पछे जीमणो, लीजे ओ व्रत धार । वेगी ऊठे रोज सबेरे,
वही सुलक्षणी नार ॥५॥ वगर काम पर सेरी पर धर
अठी उठी मत जाय । एडो नेम धारजे बाई, हरख
उमंग मन लाय ॥६॥ कजियो चुगली पर निन्दा ने,
चोरी दीजे त्याग । द्वेष भाव ने दूरो कीजे, धर मन में
अनुराग ॥७॥ हिलमिल कर घर वालों साथे, संप
राखजे मान । दीन दुःखी पर करुणा कीजे, जो चाहे कल्याण
॥८॥ नार पदमणी प्रीतमजीसुं, बांधे गाड़ी प्रीत ।
'धीरज' धर शुभ गीत गावजे, पाल पुराणी रीत ॥९॥
इण विध दी सीख बनी ने, मिल सारो परिवार । जान
फायदो इणसुं उनभी, लीवी हिरदे धार ॥१॥

॥ बना ने सीख ॥

(तर्ज—सावण लागो भदवो सखी, वरसण लागो मेह)

बनी तूं सासरे, सुख सेती जाइजे है । घणी तूं गुणवंती,
कुल देश दिपाइजे हैं ॥टेर॥

सुन्दर साडी शीलरी बनी, लीजे अंग पर धार ।
चटक मटक मत चालजे बनी, तज दे नैन विकार ॥१॥

बाबा सा री लाडली बनी, काका सा सुं नेह ।
पीहर वालो त्यागनेजी बनी, जाय रही पति गेह ॥२॥

ओलूं थारी आवसी बनी, कर आवण रो कोल ।
था बिन सूनी लागसी बनी, बाबा सा री पोल ॥३॥

बात एकान्त न कीजिए बनी, भले हो बाप के भ्रात ।
पर नर सुं मत बोलजे बनी, हंस-हंस काढी दांत ॥४॥

दुपहरे नहीं लावजे पानी, पणघट धोजे न पाँव ।
वाजतो गहणो पहरतां बनी, होवेला बदनाम ॥५॥

कजियो तजियो सुं होवे बनी, सासरिये बहुमान ।
सास ससुर पति पूजणे रो, धरजे हृदय ध्यान ॥६॥

सीख सखीरी मानजे सखरी, सेवा श्रीनाथ की धार ।
आनंद मंगल होवसी बनी, पूज्यो पद भरतार ॥७॥

॥ विदाई का गीत ॥

(तज—जाओ-जाओ ए मेरे साधु)

जाओ जाओ ए प्यारी बेटी, रहो खुशी के साथ ॥१॥

चौदह वर्षों घर आंगण में, खेली धूम मचाई ।
आज लाडली एक पलक में, तू हो गई पराई ॥१॥

सभी तरह की सही मुसीबत, पाली और पढ़ाई ।
दूर हृदय से होती है तू आज हृदय की जायी ॥२॥

लड़ी रूठली जिद्द भी करली, यहां तो खट गई मैना ।
वह है देश विराना, वहाँ पर चतुराई से रहना ॥३॥

आज विदा करने में तुझको, हृदय फटा जाता है ।
मत रोओ हे मेरी बेटी, जग का ऐसा ही नाता ॥४॥

भोली सूरत मीठी बातें, याद करी रो लूंगी ।
मुन्नी बिटिया राजा कहकर, अब किससे बोलूंगी ॥५॥

सास समुर और पतिदेव की, सेवा खूब बजाना ।
ननंद देवरानी जेठानी से, झगड़ा नहीं मचाना ॥६॥

गृहचन्द्रिका, गृहलक्ष्मी, बन प्रकाश फैलाना ।
केवलमुनि धर्म जिनवर को, भूल कभी न जाना ॥७॥

॥ बिदाई का गीत ॥

(तर्ज-जब तुम्हीं चले परदेश)

मां बाप का छोड़ दुलार, भाई का प्यार । लाडली जाओ, अपना घर स्वर्ग बनाओ ॥१॥ जी दुःखता आता रोना है, घर से जा रहा खिलौना है । मेरी बिटिया मत रोओ, चुप हो जाओ ॥२॥ कन्या परधन कहलाती है, समुराल एक दिन जाती है । आनन्द निकेतन की कोकिल बन जाओ ॥३॥ जिनना ही दूर स्वजन जाता, स्नेह सूत्र भी उतना बढ़ जाता । राजा बेटा पीहर की, याद भुलाओ ॥४॥ सबसे अच्छा व्यवहार रहे, सन्मान रहे, सत्कार रहे । जो शिक्षा देवे प्रेम से, शीश चढाओ ॥५॥ प्रतिदिन नवकार मंत्र पढना । इसपे ही दृढ़ निश्चय करना । प्रभु भजन क्रिये बिन, कभी न भोजन खाओ ॥६॥ मत करना अपनी मनमानी, बनकर रहना घर की रानी । पति सेवा में सीता मैना बन जाओ ॥७॥ सखियों से ननंद जेठाणी से, सासु से या देवराणी से, मत करो लडाई, चुगली कभी न खाओ ॥८॥ जाति का मान बढ़ा करके, स्वदेश की आन बचा करके । भारत माता की वीर पुत्री कहलावो ॥९॥ नन्दन सुहाग का खिला रहे, चन्दा से मंगल मिला रहे । केवलमुनि फूलो-फलो शान्ति सुख पावो ॥१०॥ इति ॥

॥ विदा होत समय मां से आशीष ॥

(तज-जब तुम्हीं चले प. देश)

मां देदे शुभ आशीष, चढ़ा कर शीश, सुखी हो जाऊं ॥ अपना कर्तव्य निभाऊं ॥१॥ गौदी में स्वर्ग का सुख पायी, नहीं कभी भी गर्म हवा आयी । मां इस ममता को कैसे हाथ भुलाऊं ॥१॥ अपना सुख सारा वार दिया, प्राणों से बढ़कर प्यार किया । उपकार का बदला कैसे बोल चुकाऊं ॥२॥ किस प्रेम से मुझे पढ़ाती थी, तू कितना लाड लडाती थी । मां बोल आज क्या विदा दे रही जाऊं ॥३॥ मां तेरी याद मुझे जब आवेगी, रो-रो हिचकी बंध जाएगी । प्यारे पीहर को छोड़ के कैसे जाऊं ॥४॥ रूठी कौन मनावेगा मनुहार से कौन खिलावेगा । अपनी सुख-दुःख की बातें, किसे सुनाऊं ॥५॥ मां मुझको नहीं भुला देना, भैया को भेज कर बुला लेना । उत्तर देना जब पत्र तुझे भिजवाऊं ॥६॥ ऊंचा आदर्श दिखाऊंगी, जीवन में ज्योति जगाऊंगी । सुगृहिणी बन कर सेवा सदा बजाऊं ॥७॥ केवलमुनि आशीर्वाद मिले, सद्गुण के सुन्दर पुष्प खिले । मैं दोनों कुल में यश सौरभ पैलाऊं ॥८॥

॥ बीन्दू बीन्दूनी को बधाने का गीत ॥

(तर्ज--टोडरमल चालो बधावन)

बना परण ने बनी साथे लायो, माताजी ने हर्ष
घणो हुवोजी ॥ मोतियां री बाली ने हाथ में कलश,
लेने बधावन आवियाजी ॥ तिलक जो काढ़या ने
चावल चेडया, आरतडी तो करे घणा प्रेम सुं जी ॥
मंगल गावे न बाजाजी बाजे तो, कुल बहु ओ वंश
बढ़ावसीजी ॥ पिताजी पुन्यवंता ने माताजी पुन्यवंती
कँवर पुन्यवंतो परण पधारियाजी ॥ बहन बहनोई
मारग रोके, आधी पांति माने देवोजी ॥ पांति थाने
देसां ने प्रेम बढ़ासां, ननन्दल ने बेण ज्यूं राखसां जी ॥

॥ थाली सरकाने का गीत ॥

(तर्ज--ज्यूं कडकासी ने ज्यूं बड़कासी कुल बहु)

॥ होमो झूठलीजी ॥

कँवर परणन ने घर माहें आया, हाथ में तलवार
लीनीजी । सात तो थाली मारग रखदी कँवर तो आगे
सरकावेजी । लारे कुलबहु विनयवंती धीरे-धीरे उठावे
जी । जतना सुं लेने सासुजी रे खोला माहें रखतीजी ।
आपको घर को काम में करसुं, आप कदी नहीं करसो
जी । शांति में रयजो शुभ आशीर्वाद दीजो, विनय
की परीक्षा बतायीजी ।

॥ घी गुल में हाथ घलाते समय गाने का गीत ॥

(तर्ज—तू तो ओ घर ओ बर मांगे ए)

ये तो सामुजी ने वेगा बुलाये ए, घृत गुल का भण्डार भोलाए ए । ये तो सुसराजी ने वेगा बुलाए ए । भण्डार की कुंजियां दिराए ए । पति राज ने वेगा बुलाये ए । ये तो धन रासी दिराए ए । बहुने घर की बडेरी बनाए ए । कुल देवी समान मनाए ए । सामुससुरा की सेवा कराए ए । ये तो जग माहें सुजस पाये ए ।

॥ राती जोगा प्रारम्भ होने के पहले गाने का गीत ॥

॥ शांतिनाथ भगवान का स्तवन ॥

(तर्ज—अगर वीर स्वामी हमें न बचाता तो भारत)

सैं तो शांति ही शांति चाऊँ सदा,

नित्य मंगलमय गुण गाऊँ सदा ॥१॥

अचलाजी के नन्दन विश्व के प्यारे,

शान्ति दुलारे थे हिंद सितारे,

जिन शान्ती ही शान्ती बरताई सदा ॥१॥

नब लक्ष जो जाप जपे तेरा कोई,

सुख शान्ति रहे उस घर में सदा ही ।

दुःख मारी बिमारी न आवे कदा ॥२॥

जैसे नाम गरुड़ का जो लेवे कोई,

काटा सर्प का जहर उतारे सही ।

तैसे शान्ती के नाम से पाप अदा ॥३॥

शान्ती नाम का अमृत प्याला सदा ।

जो पीवे पिलावे अमूल्य सुधा ।

पावे स्वर्गरु मोक्ष भला सर्वदा ॥४॥

अनुभव के ही साथ कहे सबसे,

पूज्य गुरु अमोलक यूं तुम से ।

होवे शान्ती ही शान्ती गावो सदा ॥५॥

॥ राती जोगा रो गीत ॥

(तर्ज—सोना री डांडी राजा रूपा रा चेडा)

आदिनाथ भगवान अरिहंत कहलावे, आठ कर्म
तोडी मुगते सिधायी जी । उनरी शासन की माता
चक्रेश्वरी कहलावे । रक्षा करे श्री संघ की जी ।
पिताजी मनाने और माता जी हर्षावे । चक्रेश्वरी तो
विपदा निवारती जी । माथा ऊपर मुकुट कानां
कुण्डल, हिवडे तो नवसर हार । नवकार का ध्यान जो
प्राणी करसीजी । उनका तो कण्ठ-दुःख दूर होसीजी ॥

॥ राती जोगा रा गीत ॥

(तर्ज—सती माता कटोडा रा बाजाए माता बाजिया)

दया माता जतन करोनी छः ही कायरा ॥८६॥
 दया माता शान्तिनाथ प्रभु सोलमा ॥ दया माता जतन
 करोनी छः ही कायरा ॥१॥ दया माता शान्ती वरतायी
 सारा देश में ॥ दया माता जतन करोनी छः ही
 कायरा ॥२॥ दया माता मृगी रो रोग मिटाया ॥ दया
 माता जतन करोनी छः ही कायरा ॥३॥ दया माता
 निर्वाणी देवी शासनदेवी रखवाली ॥ दया माता जतन
 करोनी छः ही कायरा ॥४॥ दया माता ध्यान करेला
 शान्तिनाथ को ॥ दया माता जतन करोनी छः ही
 कायरा ॥५॥ दया माता भारे कण्ठ बिछन दूर होये ॥
 दया माता जतन करोनी छः ही कायरा ॥६॥ दया
 माता संकल वरते थारा नाम से ॥ दया माता जतन
 करोनी छः ही कायरा ॥७॥ दया माता शान्तीनाथ
 जी रो करेला कोई जाप ॥ दया माता जतन करोनी
 छः ही कायरा ॥८॥ निर्वाणी माता संघ माहे शान्ती
 वरतावजो ॥ दया माता जतन करोनी छः ही कायरा
 ॥९॥ दया माता ऋद्धि-सिद्धि सुं भरजो भण्डार ।
 दया माता जतन करोनी छः ही कायरा ॥१०॥ दया
 माता आनन्द वरतावजो सारा देश में । दया माता
 जतन करोनी छः ही कायरा ॥११॥

॥ राती जोगा रा गीत ॥

(तजं—थे मारी सेडल माता सेरी नगरा जोगा ती)

रिष्टनेमी भगवान की शासन तूं रखवाली तो,
अम्बा माता कृपा दृष्टि राखजो ए मांय ॥१॥

नेमीश्वर ने पशुव छुडाया तोरण ऊपर जाय ने तो,
इन विध साता वरतावजो ए मांय ॥२॥

पार्श्वनाथ भगवान शासन की देवी जानो तो,
पद्मावती रक्षा करी भगवान की ए मांय ॥३॥

जलता तो नाग ने नागनी बचाया तो,
नवकार को शरणो प्रभु सुनाविया ए मांय ॥४॥

इण शरणा रा उत्तम फल पाया तो,
धरणेन्द्र पद्मावती प्रगट हुवा ए मांय ॥५॥

बैरी ने दुष्मन दुख ने दरिद्र,
नाम लिया सुं दूरा होवे ए मांय ॥६॥

पार्श्वनाथ भगवान कमठ हटाया तो,
अज्ञानी रो मद सब गालियो ए मांय ॥७॥

आनन्द वरतावजो ने सुख साता देयजो,
नाम लिया सुं विपदा टले ए मांय ॥८॥

॥ राती जोगा रा गीत ॥

(तर्ज—भेरू कटोडे हो थारी थापना)

चौवीस तीर्थकरां का शासन का देवता, ये तो चौवीस यक्ष जान हो । जिनशासन की सेवा बे करे, जिन देश क्षेत्र के मांय हो । देवता तो चार जात का, भुवनपति, वाणव्यंतर, वैमानिक हो । पूर्व भव में तप संजम पालियो, केइ दीदो सुपात्र दान हो । इन प्रभावे देवता हुआ, ये तो करे जिन शासन री सेव हो । ये तो यक्ष राज कहलावे, ये तो वरतावे जय-जयकार हो । ये तो विघ्न सदा दूरी करे, सुख संपत्ति से भर देवे भण्डार । ये तो गावतडा सुख ऊपजे, ये तो सुनियारी परम कल्याण हो । चौवीस तीर्थकरा का जो ध्यान करसी, चौवीस तो यक्ष करसी सहाय हो ।

॥ कंकण डोरा खोलने का गीत ॥

(तर्ज—जुवा खेले जुबी खेले बनडा ने बनडी)

जुवा-जुबी मत खेलो बनडा ने बनडी । कांकण डोरो जयना सुं खोलो । कोरडा रमणा कदी मत करजो दुनिया में मारनो कौन बतायो । पति नारी पर हाथ नहीं उठावे । पुरुष नारी पर हाथ नहीं चलावे । इन

रीतां ने कोई मत करजो । खोटी तो रीत दुनियां में
 बाजे । कुल माहें कलंक पूरोजी लागे । बना-बनी ने
 नमस्कार सिखायजो । पगां लगन री रीत है अछी ।
 बहूजी ने घणो धन जो दीजो । सासु सुधरा रे पगां
 पडजो । विनय तो करजो ने धर्म बढायजो । गुरु-
 गुरानी का दर्शन करजो । मंगलिक सुनजो ने समकित
 धारो । ऐसी तो जाता उनने दिरायजो । जीव दया
 माहें दान जो दीजो । इन थी जीवन सुख माहें जावे ।

॥ बैठिका ॥

(तब—लका रो सोना मंगायजोजी)

वीरा आया बाई ने लेबन ने जी । हर्ष हृदय
 नहीं मांय । टीका रा बधाबना ॥ टेरे ॥ पाटा पर भाई
 बहन बैठिया जी । आरती करे ननंदल आय, तिलक
 काढे कूंकुराजी । पीट थापे बहनोई आयनेजी, धिन-
 धीन थारोजी कुल, दिपायो मारा वंशनेजी ॥ मोटा-
 मोटा खाजा लावियाजी खिमिया है मोटी चीज, घर में
 शान्ती वरतावजो जी ॥ लापसडी मीठी खाय ने, मीठा
 रहो जग मांय, सुजस थारो फेलसीजी ॥ व्यावरा गीत
 पूरण हुवा जी, सब नगरी में करयो नमस्कार, भूल चूक
 होवे करी, लीजो आप सुधार, बहनने भाई ले गयो जी ।

॥ विवाह का गीत समाप्तम् ॥

॥ दिन रा भोजन करते वक्त गाना ॥

॥ जमाई का गीत ॥

(तर्ज—आनन्द का ढंका आलम में बजवा दिया)

आओ सखियां मंगल गावां, घर आज जमाई
आया है, शुभ गीतों रा रसिया बनने, संग साथिडो ने
लाया है ॥टेर॥ हीरा भी हलका याँ सामी, मोती भी
हलका यां सामी । सोना, रूपा, सुं भी नामी, घर
आज जमाई आया है ॥१॥ चांदा ज्युं निर्मल चलके
है, सूरज ज्युं ज्योति भलके है । आभे ज्युं विजली
भलके है, घर आज जमाई आया है ॥२॥ लाडू सुं
अधिका बाला हो, मीठा अमृत रा प्याला हो । मारे
हिवडे री माला हो, घर आज जमाई आया है ॥३॥
कोमलता कमलों सी प्यारी, चंचलता तितली से न्यारी ।
मीठास रा पूरा अधिकारी, घर आज जमाई आया
है ॥४॥ बल विद्या धन का धारी हो, जग सा भारी
उपकारी हो । 'धीरज' श्री रा व्यापारी हो घर आज
जमाई आया है ॥५॥

॥ दिनरा गाने का गीत ॥

॥ जमाइजी रो स्वागत ॥

(नर्ज—बांस बडाओ हो बगडीरा चार-घाघर घूमेला ।)

कंदोई बुलावो हो नगरी रा चार—जमाई जीमेला ॥टेरा॥
मत लाजो हो परदेशी खाण्ड—जमाई जीमेला ॥१॥
देशी शक्कर हो मँदा घृत सार—जमाई जीमेला ॥२॥
नहीं द्विदल हो नहीं बासी साग—जमाई जीमेला ॥३॥
सीरो लापसी हो खाजा तैयार—जमाई जीमेला ॥४॥
साला सहेल्यां हो करे मनुहार—जमाई जीमेला ॥५॥
ऐंठो नहीं नाखेहो जाणे घर रो माल—जमाई जीमेला ॥६॥
पान सुपारी हो देसां इलायची लूंग—जमाई जीमेला ॥७॥
इण विध गासां हों जमाइयों ने गीत-जमाई जीमेला ॥८॥
साथे आया हो वेवायांरो साथ—जमाई जीमेला ॥९॥
ज्यांरी करसांहो घणी सारसंभाल—जमाई जीमेला ॥१०॥
मारा बाईजीने हो देसां चूंदडी हार—जमाई जीमेला ॥११॥
नणदोईजीने हो देसां पंचरंगी पाग—जमाई जीमेला ॥१२॥
नारेल देसां हो वेवायां रे हाथ—जमाई जीमेला ॥१३॥
पहुँचावाजासांहो मिल सारो साथ—जमाई जीमेला ॥१४॥
अरजी करसांहो फिर आइजो आप—जमाई जीमेला ॥१५॥
सुणसी श्रीनाथ हो ऐसा शुभगीत—जमाई जीमेला ॥१६॥

॥ दिनरा जमाई भोजन करते वक्त गाने का गीत ॥

॥ जमाई जी का गीत ॥

(तर्ज—धोया-धोया थाल पऱसीया भात बे ।)

घणा दिनां से वाट जोवती आया जमाई आज बे
आनन्द मंगल उत्सव मारे नणदोयों रे काज बे ॥टेर॥
आवो-आवो सखी सहेल्यौं मिल कर गावो गीत बे ।
जमायाँरा लाड़ करांला आ पुरानी रीत बे ॥१॥
गीदी बिछावो पाटो ढालो, लोटो भरु गिलास बे ।
थाल कटोरा भरके भोजन, बैठ जीमारो पास बे ॥२॥
मीठो जीमो मीठा बोलो, मीठी करजो बात बे ।
सीधा आवो सीधा जावो, घरे बितावो रात बे । ३॥
काई तो थे विणज करो अरु काई करो व्यापार बे ।
कितरी थारे आमद खरचो कितरो है महावार बे ॥४॥
परधन माटी जेडो जाणो परनारी गिनजो मात बे ।
छेह किणी ने दीजो मती थे पहले पकड्यो हाथ बे ॥५॥
फैशन सूं थे दूर रहजो, मती लोपजो कार बे ।
भाग तमाखू मती अरोगो फेंको चिलम सिगरेट बे ॥६॥
सट्टो छोड़ो लाटरी छोड़ो दोनो ही जुगार बे ।
मात पितारो कहनो मानो, शिक्षा लीजो धार बे ॥७॥
कपड़ा री थे राखो सफाई देव गुरु सूं प्रीत बे ।
'श्रीनाथ' जब आओ सासरे सुण लीजो शुभगीत बे ॥८॥

॥ रातरा गाने का गीत ॥

॥ जमाईजी रा गुण ॥

(तर्ज—हरियाडे जीरो नीपजे ।)

जमाईजी भले ही पधारिया मारा फलिया हो
मनोरथ आज ॥टेरा॥ सामी मेलूं करूं आरती कांई
बधाऊं हो फुलडो रे हार ॥ जमाईजी भले ही पधारिया
मारा फलिया हो मनोरथ आज ॥१॥ रांधूं लचपची
लापसी कांई जीमाऊं हो घणी मनुहार ॥२॥ न्याय
नीति कर शोभता मीठी वाणी हो पाले सदाचार ॥३॥
फैशन रो खरचो नहीं नशो हो नहीं खोटी रौल ॥४॥
धर्म नेम पाले सदा भल पाले हो माइतारी आण ॥५॥
गुण-गरवा धीरा घणा देशी पहरे ओ चाले सादी चाल
॥६॥ रातरा भोजन नहीं करे नहीं नाखे हो ऐंठो मूंगो
माल ॥७॥ बासी ये भोजन नहीं करे, भक्षाभक्ष हो
जाणे गुणवान ॥८॥ पतिव्रत धर्म पालता सोरो राखे
हो सब परिवार ॥९॥ आगत स्वागत आपरो करसां
हो मन हरख अपार ॥१०॥ शुभगीत नित गाबसां
लाड़ कोंड हो करसां मनुहार ॥११॥ श्रीनाथ सुणसी
सदा चोका लागे जमायां रा गीत ॥१२॥

॥ रातरा गाने का गीत ॥

॥ जमाईजी रा बखान ॥

(तर्ज—धी पाल की ।)

आवो जमाई पांवणां गुणवंताजी,
हम घर करो पवित्र हो जयवंताजी ॥८॥
घणां दिनां से आविया जमाईजी,
कब की मैं जोऊँ वाट हो नणदोईजी ॥९॥
पहरण काठा कापडा जमाईजी,
काई केसर तिलक लिलाट हो नणदोईजी ॥१०॥
चाल चूँप गज गामिणी जमाईजी,
काई मधुरी वाणी रसाल हो नणदोईजी ॥११॥
पढिया गुणिया नर्वासिधा जमाईजी,
काई धरम करस बड वीर हो नणदोईजी ॥१२॥
मारा बाईजी लाडला जमाईजी,
पतिव्रत धर्म प्रतिपाल हो नणदोईजी ॥१३॥
आप पतिव्रत पालजो जमाईजी,
काई बढसी चौगुणी प्रीत हो नणदोईजी ॥१४॥
हलका शब्द मत बोलजो जमाईजी,
काई रूठों ने लीजो मनाय हो नणदोईजी ॥१५॥

दिन दस रहजो पांवणां जमाईजी,
 काई आइजो बारम्बार हो नणदोईजी ॥८॥
 'शुभगीत भल गावजो जमाईजी,
 काई 'श्रीनाथ' सुख पाय हो नणदोईजी ॥९॥

॥ रातारा गाने का गीत जमाई का गीत ॥

(तर्ज—पनीहारी ए लो)

आया जमाई पांवणां गुणवंताजी,
 करूँ घणी मनुहार वारूँजी ॥
 शूरवीर धीरज घणी गुणवंताजी,
 राजकँवर अनुहार वारूँजी ॥८॥
 शुभ लक्षण कर शोभता गुणवंताजी,
 सागर सम गंभीर वारूँजी ॥९॥
 खानदान उच्च आपरो गुणवंता जी,
 पालो कुल आचार वारूँजी ॥१०॥
 रात्रि भोजन नहीं करे गुणवंताजी,
 भक्ष अभक्ष विचार वारूँजी ॥११॥
 बासी बिदल जीमे नहीं गुणवंताजी ।
 ऐँठो न नाखे लगार वारूँजी ॥१२॥
 मौसर में जीमे नहीं गुणवंताजी,
 और न जिमावे आप वारूँजी ॥१३॥

कन्या विक्रय जहां पर होवे गुणवंताजी,
 जीमे न जावे द्वार वारूँजी ॥६॥
 बूढा रे तो ब्याव में गुणवंताजी,
 करे घणो प्रतिवाद वारूँजी ॥७॥
 फाटा गीत नहीं सांभले गुणवंताजी,
 न देवे दूजा ने गाल वारूँजी ॥८॥
 ज्ञान हुन्नर को घरे-घरे गुणवंताजी
 ये तो करे घणो प्रचार वारूँजी ॥९॥
 बाईजी मारा समझना गुणवंताजी,
 वे थारो बँटावे हाथ वारूँजी ॥१०॥
 भानन्द सुं स्वागत करूँ गुणवंताजी
 मैं गाऊँ गीत रसाल वारूँजी ॥११॥
 पुरसणवाली पदमणी गुणवंताजी,
 थे जीमो राजकुमार वारूँजी ॥१२॥
 साली सहेलियाँ सामने गुणवंताजी,
 ऊभा करे अरदास वारूँजी ॥१३॥
 दिन दस रहजो पावणा नणदोईजी,
 फेर आजो बारम्बार वारूँजी ॥१४॥
 'श्रीनाथ' शुभगीत ने गुणवंताजी,
 सुणजो श्रीफल बेचाय ॥१५॥

॥ रात के समय गाने का गीत ॥

॥ मारा राजकँवर नणदोईसा ॥

(तर्ज—मारा सूरज किरण नणदोईसा थे फाग खेलवा आईजोसा)

मारा राजकँवर नणदोईसा सासरिये वेगा आईजोसा
॥टेरे॥ सासरिये वेगा आइजो-शुभ गीतां री पोथियां
लाइजो ॥ मारा राज कँवर ॥१॥ सिर पंचरंग पेचो
सोहे-मारो निरख-निरख मन मोहे ॥ मारा राजकँवर
॥२॥ थारे तिलक लिलाडे भलके-मूंडो सूरज ज्यूं
चिलके ॥ मारा ॥३॥ फंशन रो खरचो छोडियो-थे
प्रेम देश सुं जोड्यो ॥ मारा ॥४॥ नहीं नशा पत्ता सुं
राजी, थारी महिमा धर-धर गाजी ॥५॥ थारी चाल
चूँप गजवाली, है वाणी मधुर रसाली मारा राजकँवर ॥
॥६॥ नही करो मसकरी खोटी, कुल रीत आपरी मोटी
॥ राजकँवर ॥७॥ ये मगद चूरमो खाजा, थे जीमो
ताजा-ताजा ॥ मारा राज कँवर ॥८॥ थे धर्म करण
में शूरा, पत्नि व्रता पालक पूरा ॥ मारा ॥९॥ क्यूं
आप एकला आया, नहीं वेवार्यों ने लाया ॥ मारा
राजकँवर ॥१०॥ कहुँ आगत स्वागत थारी, आ अरजी
सुनजो मारी ॥११॥ मारा राजकँवर ॥ है
कोर कालजा केरी, मारा बाईसा थारी चेरी ॥१२॥

मारा बाईसा भोला सेणा, नहीं मांगे थांसू गेणा,
 ॥ मारा राजकँवर ॥१३॥ खादी सूं प्रेम बढ़ायजो,
 मारे बाईसा रे रेजी लाइजो ॥ मारा राजकँवर ॥१४॥
 शुभ गीत गायलो लावो, धीरज धर सुणता जावो
 ॥ मारा राजकँवर ॥१५॥

॥ जमाइजी रे परिवार रो बखाण ॥

(तर्ज—आकडारी डाल ऊपर कागलो झबूकेरे हां के हां ओ राज)

नींबडारी डाल ऊपर काग बैठो बोल रे, हां के
 हां ओ राज । जमायां री खबरों लायो काग रुडो
 बोल रे हां के हां ओ राज ॥टेरे॥ बाईसा ने खबरों
 देवो नणदोई सा आया रे ॥१॥ इतरे में देवरजी
 बोलचा, बहनोई सा आया रे ॥२॥ घणा दिनां सुं वाट
 जोवती, आप पधारया आज रे ॥३॥ सुणो-सुणो
 फलाणचन्दजी सा थारी, मा बाप री जात रे ॥४॥
 शहर सादडी मुलकों चावो, जठे विराजो आपरे ॥५॥
 बाप आपरे गढ़ रा राजा, शूरवीर सरदार रे ॥६॥
 माय आपरी रंभा राणी, रतनो री भंडार रे ॥७॥ हिल-
 मिल ने भेला रेवो, भायां रे परिवार रे ॥८॥ बहनों
 थारी चतुर सयानी, शुभ गीता सुं प्यार रे ॥९॥ कुल
 दीपक हो आप जमाई, गरवा ने दातार रे ॥१०॥ मां

बापरो केणो मानो, आज्ञा सिर पर धार रे ॥११॥
 काठा कपडा पहरण थारे, फैशन सुं नहीं प्यार रे ॥१२॥
 भणिया गुणिया हो घणा ने, नव सिधा हुश्वार रे ॥१३॥
 मारा बाईसा लाडला ने, सेजां रा सिनगार रे ॥१४॥
 खानदान कुल आपरो है, सब गुण रो भंडार रे ॥१५॥
 धीरज धरने सुनजो सारा, शुभ गीतां रा सार रे
 ॥१६॥

॥ दिनरा जमाई भोजन करते समय बोलने का गीत ॥

(तर्ज—बोल्यो रे बोलचो)

बोलचो रे बोलचो गीतां रे खातर बोलचो,
 ज्ञानवाली रा । घणो फूटरो बोलचो विद्यावाली रा ।
 समय देखने बोलचो अवसर वाली रा । हां रे हूँ । मारे
 देशरो सेवक थूं । शुभगीत सुनाऊँ हूँ ।

॥ बेटी को माता की सिखामण ॥

(तर्ज—गोपीचन्द्र लडका)

यूँ कहवे माता, सीख सुणाऊँ बेटी सांभलो ॥टेरा॥
 मुश्किल घणी कमाई बाई, पुरुष कमावे लावे ।
 अण पढ़ियोडी नार होय सो, ऊँदो खर्च बढावे रे ॥१॥
 चतुर सयाणी समझण तिरिया, घर रो लेखो राखे ।
 आवक सुं खरचो कर कमती, सुखरो मेवो चाखे रे ॥२॥

आवक सुं जावक हो ज्यादा, घाटो नींव जमावे ।
 पैसा हित पल्ला खेंचीजे, हाट हवेली, जावे रे ॥ ३ ॥
 जिण मौसम में निपजे चीजां, उण मौसम में लेणी ।
 लारा सुं लेवण में पड़सी, दूणी कीमत देनी रे ॥ ४ ॥
 बूँदां-बूँदां ताल भरीजे, कण-कण करता कोठी ।
 धँसे-धँसे पूंजी होवे, बात समझ आ मोटी रे ॥ ५ ॥
 समझण नार समझ कर खरचे, चरचे चोखी लोग ।
 जगमें यज्ञ फैलायजे धीरज, सभी तरह से योग रे ॥ ६ ॥

॥ बधावां ॥

(तक-कोरी तो कुडली ओ राज)

मंगल गीतां रो आज गावो बधावो । गावो-गावो
 बाबा सा री पोल रंग रसिया राज गावो बधावो ॥
 ॥ टेरे ॥ पहलो बधावो राज विद्या रो आयो, आयो-
 आयो गुरांसा रे द्वार गुण रसिया राज गावो बधावो
 ॥१॥ दूजो बधाओ राज ज्ञान रो आयो, आयो-आयो
 ज्ञानीजी रे द्वार चित्त रसिया राज गावो बधावो ॥२॥
 तीजो बधाओ राज धर्म रो आयो, आयो-आयो साधुजी
 रे द्वार दिल रसिया राज गावो बधाओ ॥३॥ चौथो
 बधावो राज विनय रो आयो, आयो-आयो सुसराजी
 रे द्वार सुख रसिया राज गावो बधावो ॥४॥ पंचम

बधावो राज 'धीराज' रो आयो, आयो-आयो ज्ञान
भंडार श्रीनाथ राज गावो बधावो ॥५॥

॥ होली का गीत ॥

(राग-फाग)

ऐसा खेलजो रे फाग सदा सुख पाओ ॥१॥
धरम का बाग खुली, समकित की सरदा, विरती
कोयल नाद करो भविका ॥१॥ कुमति होलीका ने
दीजो मंगलाय ने, कर्मा की धूल उड़ावो भविका ॥२॥
समता सरोवर, स्नान करो सुगुणा, पाप को मैल
पखालो भविका ॥३॥ धीरज को धोतियो थे, पेरो
घणा प्रेस सुं । जयणा को जामो पेरो भविका ॥४॥
परमार्थ की पागडी, उपयोग रो उपर नो, शील को
सिर पेच थे बांधो भविका ॥५॥ क्षमा रूपी छोगो
मेलो, घाटो बांधो सांच को । तप रूपी तुरीं झुकावो
भविका ॥६॥ करुणा का कुण्डल चोकसी का चौकडा,
भक्ति की भमर कडी पेरो भविका ॥७॥ दसविध
धरम को, हार हिये पेरजो । दान-मान कडा हाथ पेरो
भविका ॥८॥ वैयावच्य बींटी दस, अंगुली में पेरजो,
क्रिया के कन्दोरो थे पेरो भविका ॥९॥ भावरूपी भांग

को थे घोट-घोट पीवो, संतोष की शक्कर मिलाओ
 भविका ॥१०॥ धर्म कुटुम्ब संग, सुमति सुहागन, हिल-
 मिल गेर खूब खेलो भविका ॥११॥ सज्जाय का ढफ
 लेवो, झांझलो भजन को, प्रभु गुण गान खूब गावो
 भविका ॥१२॥ लोभ रूपी इलोजी, महानिर्लज जग
 में, जिनको थे खूब तरसावो भविका ॥१३॥ जिन-
 वाणी पानी, वैराग्य रंग घोलजो, उपदेश की पिचकारी
 भर मारो भविका ॥१४॥ शुक्ल लेश्या की झोली,
 गुलाल शुभ ध्यान की, भर-भर मुट्ठी उडावो भविका
 ॥१५॥ संवर की सूकडी ने, गोठ करो ज्ञान की, गेर
 चारों तीरथ काडो भविका ॥१६॥ तेरह क्रिया की थे
 नावणो करजो, दया की दुकान भांड बैठो भाविका ॥१७॥
 ऐसो भाग रमो, साल-दरसाल थे, सिद्धपुर पाटन में
 बसो भविका ॥१८॥ भारी करम जाके, दाय नहीं
 आवसी, हलुकर्मी सो हरषावे भविका ॥१९॥ जो नहीं
 मानसो तो, आगे पछतावसो, सतगुरु ज्ञान बतावे
 भविका ॥२०॥ उगनीस सौ सैंतीस, फागण वदी में,
 बीज बुधवार आयो भविका ॥२१॥ तिलोक ऋषी कहे
 मिरज गांव में, धरम को फाग सरायो भविका ॥२२॥

॥ होली का गीत ॥

(तर्ज—धूसो बाजे रे)

होली खेलो रे—बाल सब मिलकरके ॥टेरे॥

गाल न बोलो, कीच न ढोलो ।

मिल करके मण्डल खोलो । हो ॥१॥

पत्र पढो अरु खबर सुनाओ ।

शुभ गीतों को मिल गाओ । हो ॥२॥

सत पुरुषों को संगती कीजे ।

व्यसन त्याग सुयश लीजे । हो ॥३॥

नाच बजाय प्रभु गुण गावो ।

वसंत ऋतु को लो लावो । हो ॥४॥

बाल करें गुरु ज्ञान की भक्ति ।

बदनकांत यह शुभ युक्ति । हो ॥५॥

॥ गंदा गीत ॥

(तर्ज—धूसो बाजे रे)

मती गावो रे गीत फाटा कोई, मती गावो रे ॥टेरे॥

फाटा-फाटा गीत रूलियारों ने भावे,

दूजां ने नहीं दाय आवे । मती गावो रे ॥१॥

फाटा गायार्न दूनी आफत,

राज अपडले ने डंडे ॥२॥

टाबर गावे देश डुबावे,
संस्कार खोटा होवे ॥३॥

असर पडे कानून रो कमती,
पिण गीतां रो तो ज्यादा ॥४॥

दुरगुण इणसुं छाने उपजे,
लारां सुं चवडे आवे ॥५॥

व्यभिचार री चाह बढावे, छोडो थे बद ।
गीतां ने मत गावो रे गीत फाटा कोई ॥६॥

ब्रह्मचर्य रो नियम टूटे,
जिणसुं, बल बुद्धि खूटें ॥७॥

चौखा गीत बनाओ गाओ,
खोटा ने मत अपनावो ॥८॥

शुभ गीतां सु होय सुधारो,
बद गीतां रो उठाओ धारो ॥९॥

मिस मेयो यूं दाग लगावे,
भारत में फाटा गावे ॥१०॥

शुभ गायन श्रीनाथ सुनोओ,
जो थे सुख साचो चाहो ॥११॥

॥ शीतला माता ॥

॥ झूठा बहम ॥

(तर्ज—गोपीचन्द लड़का ले ले फकीरी तज दे राज)

टाबर ने ठारो, धाने मनाऊं माता शीतला ॥टेरा॥
धुगधुगती सिगडी माथे पर, उलवाणे पग आऊं ।
ओछूं रुपियो सवा रोकडो, डावां हाथ सुं खाऊजी ॥१॥
गेला गूंगा बावलास में, चूक्या गेले घालो ।
आई आफत आपरे सरे थे, किरपा करने टालोजी ॥२॥
ठंडी बासी घाट राबडी, भीख मांग ला खाऊं ।
खण लेऊं मांचे सूवण रो, झट दर्शन ने आऊंजी ॥३॥
अंधी सरदा मांय लोग यूं रोग बढाता जावे ।
योग्य मान नहीं करे दवाई, खता हाथ सुं खावेजी ॥४॥
श्री नाथ इण तरह बहम है, झूठा घर-घर चाल्या ।
माता है वह रक्षा कर दे, क्यूं टाबरिया बाल्याजी ॥५॥

॥ शीतला माता का स्तवन ॥

(तर्ज—माता के दरबार चंपो बहुत फलियो मारी मांय)

दया माता के दरबार ज्ञान का फूल खुल्या मारी
मांय, ये कुण जी सीखे ज्ञान, ए कुण जी धारे मारी
मांय ॥ गौतम स्वामीजी सीखेजी ज्ञान, श्री संघ धारण
करे मारी मांय ॥ धारयो सीखयो ज्ञान, मुगती मांय
ले जावे मारी मांय ॥

॥ आदर्श शीतला माता ॥

(तर्ज—थे मारी सेडल माता सेरां नगरा जोगा तो)

थे मारी दया माता तीन लोक पूजिजो तो,
छः काया री रक्षा मैं नित करां ए मांय ॥१॥
थे मारी दया माता झूठ नहीं बोलो तो,
सत्य वचन सुखकारीया ए मांय ॥२॥
थे मारी दया माता चोरी नहीं करे तो,
पर धन तो थे पर हरयो ए मांय ॥३॥
थे मारी दया माता ब्रह्मचर्य पालो तो,
उत्तम तप हो कह्यो ए मांय ॥४॥
थे मारी दया माता परिग्रह नहीं राखो तो,
ममता मोह निवारियो ए मांय ॥५॥
थे मारी दया माता रात्री भोजन नहीं करो तो,
लेप मात्र नहीं राखती ए मांय ॥६॥
आ तो है जिन भारग री आ माता तो,
इनने सेवयां सुख उपजे ए मांय ॥७॥
दया माता बालक ने नहीं मारे तो,
रक्षा करे सारा देश की ए मांय ॥८॥
माता होय बालक ने मारे तो,
वो माता नहीं कहलावती ए मांय ॥९॥

आ तो चैचक रोग तन मांय उपजे तो,
 माता ने दोष किम देवता ए मांय ॥१०॥
 दवाई देय ने चिकित्सा करावो तो,
 ततकाल रोग मिट जावती ए मांय ॥११॥
 आछा लो कपडा ने गेणा पेर ने जाओ तो,
 कादा कीचड भर घर आवसो ए मांय ॥१२॥
 दही चढावे ने करबो चढावे ने,
 कुत्ता पड-पड चाटता ए मांय ॥१३॥
 माथे तो धार लगाय ने दौडे तो,
 देवी री अशातना इम होवे रे मांय ॥१४॥
 दया पालो ने नवकार सुनाओ तो,
 बालक ने साता ऊपजे ए मांय ॥१५॥
 मिथ्या भरम मन मांय काढो तो,
 जिन धर्म री सेवा थे ए मांय ॥१६॥
 शासन देवता साता जो करसी तो,
 दया माता री जय बोलजो मांय ॥१७॥

॥ शीतला देवी का स्तवन ॥

(तर्ज—वीरा माह्ला गंज थकी उतरो)

पूजो जिनवाणी माता शीतला शीतल चित्त करो भावेजी ।
 संसार दाबानल उपशमे, भविजन सुन उलसावेजी ॥

पूजो ॥१॥ चतुराई चूलो थापजो, कर्म इंधन करो
 भावेजी । तप अग्नि धुकावजो, काया कडाई चढ़ावेजी
 ॥२॥ कहणा रस घृत पूरजो, निर्ममता कर मेंदोजी,
 क्षमा रूप खाजा करो, सुगुण गुंजा उमेदोजी ॥३॥
 परमारथ पूडी करो, पुण्य-पाप खीचड जाणोजी ।
 संतोष रूप करो लापसी, समता शक्कर बखाणोजी
 ॥४॥ धर्म मोदना मोदक करो, जयणा जलेबी बनावोजी ।
 प्रीत रूप पेडा करो, प्रेम का घेवर बनावोजी ॥५॥
 दया का दूध ओटावजो, दान को दही जमावोजी ।
 सुबुद्धि रूपी बरफी भली, उपयोग का ओला बनावोजी
 ॥६॥ बडा करो विज्ञान का, गुलगुला गुप्ति रसालोजी,
 भावना रूप भुजिया करो, हेतु दृष्टांत मसालोजी ॥७॥
 गुरु सेवा रूपी सेवां करो, तत्व को तेवन ठवोजी ।
 भज पकोडी चरपरी, सुकथा कचोरी सरावोजी ॥८॥
 चौकसी चौखा आणीजी, रूप रच रायतो करीजोजी,
 घाट राब करबो करो, हिरदे हांडी में धरजोजी ॥९॥
 स्नान करो उपशम जले, पाप को मेल पखालोजी ।
 शील शृंगार सजोसरे, कषाय अग्नि को टालोजी ॥१०॥
 सुगुरु केन कलसां विषे, ज्ञान का जल भर लेवोजी ।
 मेंदी अहो अनुमोदना, सुमती सुपारी ठावोजी ॥११॥
 स्थिर परिणाम थाली करो, विवेक बाटकी जाणोजी

विजयपिंगाणी, बनावजो, सत्य को कुंकुम घोलाणोजी
 ॥१२॥ अक्षय गुण आखा चढाइये, प्रश्न का पान
 विचारोजी । कीर्ति फूल शुभवासना, ध्यान की धूप
 उदारोजी ॥१३॥ शुक्ल लेश्या की रुई करो, नेम नैवेद्य
 लीजोजी, आव्रत रज परिटालवां, त्याग को गहणो
 ढांकीजोजी ॥१४॥ परमेष्ठी गुण शुद्ध दाखियां, गावजो
 गीत रसालोजी । पूजा करो इस शाश्वती, सकल कर्म
 होय टालोजी ॥१५॥ धर्म पुत्र चोखो रहे, रिद्धि-सिद्धि
 बहु थावेजी । शिवरमणी वरे शाश्वती, दुःख कदी नहीं
 आवेजी ॥१६॥ उन्नीस सौ अड़तीस शीतला दिने,
 कीनी थी यह सज्झायोजी, देश दक्षिण के मांय ने,
 तिलोक ऋषि फुरमावेजी ॥ पूजो ॥१७॥

॥ लड़कियां गुड़लियो फेरने का गीत ॥

(तर्ज-गुड़लिया रे बांध्यो सूत गुड़लियो धूमेलाजी घूमेला)

सहेलचां रो मिल गयो साथ, कलश लेवेलाजी
 लेवेला ॥१॥ वे लीनो अपने हाथ, भरतजी रे घर
 आवेलाजी-आवेला ॥२॥ ये ऊभी आंगण मांय, आदर
 देवेलाजी, देवेला ॥३॥ गलिछो देवी बिछाय सहेलचां
 बैठेलाजी, बैठेला ॥४॥ सुभद्राजी आओ पात, रुपैया
 देवेलाजी, देवेला ॥५॥ वाने दूध तो देय पिलाय, शुभ-

गीत सुनावेलाजी, सुनावेला ॥६॥ वे पडिक्कमणो देवे
सुनाय, बैठने सुनोलाजी-सुनोला ॥७॥ वाने स्कूल देवो
खुलाय, विद्यावंती होवेलाजी होवेला ॥८॥ थाने कुल
री शोभा बढाय, धर्म दिपावेलाजी दिपावेला ॥९॥

॥ गिनगोर ॥

(तर्ज—शान्तीलालजी रे सात बेटा बाई ए)

आदिनाथजी रे सौ बेटा बाई ए ब्राह्मी, सौवां री
बधाई मांगा बाई ए सुन्दरी, आदेश्वरजी चौंसठ कला
सिखाई बाई ए ब्राह्मी, बहोत्तर कला का ज्ञान बताया
बाई ए ब्राह्मी, ब्राह्मी सुन्दरी ज्यूं माने ज्ञान सिखाइजो
सुनो ओ पिताजी, सामायिक पडिक्कमणो पच्चीस
बोल सिखायजो सुणो ओ पिताजी, नवतत्व रा भेद
बतायजो सुनो ओ पिताजी, स्थानक जावां दर्शन करसां
गुरुका ओ पिताजी, व्याख्यान सुनने बुद्धिवंत होसुं ओ
पिताजी, गुरुजी ऐसा ज्ञान सुनाया सुनो ए बायां ॥
फैशन को तो त्याग दीजो सुनजो ए बायां सादो सूदो
जीवन राखो गुणवंती ए बायां, सिनेमा नाटक देखन
मत जाइजो शीलवंती ए बायां, लोकां में अपजस होसी
जीवन बिगड़ जासी ए बायां, गंदा गीत कदी मत
गायजो बाजरां मत हंसजो ए बायां, सीख मानो तो
थे सुख पासो नहीं तर अपजस पासो ए बायां ॥

॥ गिनगोर ॥

(तर्ज—हां ए मारी गवरल माथन मेमद लावसां)

हां ए मारी शासन जिनधर्म की रक्षा पाल ए,
पुन्य गोरो ने पाप सांबलो ॥१॥ हां ए मारी शासन
धर्म दोय प्रकार ए, साधु श्रावक नो जाणी ए ॥२॥
हां ए मारी शासन, विनय धर्म मूल जणी ए, दया रे
मुकुट सुहावनो ॥३॥ हां ए मारी शासन नव रत्न नव
सर हार ए, करुणा रा कुण्डल शोभता ॥४॥ हां ए
मारी शासन व्रत रा रतन जडाय ए, नथनी जतना री
शोभती ॥५॥ हां ए मारी शासन, सत्य धर्म बाजु बंध
ए, चुडलो तो सोवे सेवा धर्म को ॥६॥ हां ए मारी
शासन, वैयावच्च की मूंदडी ए, किरिया कंदोरो दीपतो
॥७॥ हां ए मारी शासन, जतना रा बाजे थारा घूघरा
ए, शाप्ती वरतायजो सारा तीर्थ में ॥८॥ हां ए मारी
शासन ऐसी गिनगोर थे पूजसो ए, होवेला परम कल्याण
है ॥९॥ ॥इति॥

॥ गोबर थे मत बीणजो मारा बाईजी ॥

॥ श्रावण के तीज के दिन गाने का गीत ॥

(तर्ज—आठ कुआ नव बावडी पणिहारी रे लो)

गोबर थे मत बीणजो मारा बाईजी, मारा बाई
जी । कांई जिणसुं जावे लाज भोजाई जी ॥टेर॥ उत्तम

कुल है आपरो मारा बाईजी, मारा बाईजी । मत
 करजो हलको काम भोजाईजी ॥१॥ ओडीले थे हाथ
 में मारा बाईजी, मारा बाईजी । क्यों जावो जल्दी
 बार भोजाईजी ॥२॥ थां लारे फिरता फिरे मारा
 बाईजी, मारा बाईजी । काई व्यभिचारी रुलियार
 भोजाईजी ॥३॥ गोवर कीडा कलबले मारा बाईजी,
 मारा बाईजी । काई गींडोला हो जाय भोजाईजी ॥४॥
 बिच्छु त्रिण में नीपजे मारा बाईजी, मारा बाईजी ।
 काई रात बगत खा जाय भोजाईजी ॥५॥ गोबर सुं
 गेणो घसे मारा बाईजी, मारा बाईजी । कदी कदी गुम
 जाय भोजाईजी ॥६॥ गावा बिगडे ऊजला मा० बा०,
 काई आवे भूंडी बास हो भो ॥७॥ इज्जत इनसुं कम होवे
 मा० बा०, क्यां होवे जग बदनाम भो० ॥८॥ गा करे
 पाडो करे मा० बा०, लो टोगडियों रो नाम भो० ॥९॥
 लाज शरम ऊंची धरी मा० बा०, थे नाटो पोठा देख
 भो० ॥१०॥ एक पोठा रे कारणे मा० बा०, थे खावो
 गाल हजार भो० ॥११॥ लडवा में कमती नहीं मा०,
 बा०, थे राखो नम्बर वन्न भो० ॥१२॥ चूडारी चटको
 करे मा० बा०, दे रांड रंडोचां गाल भो० ॥१३॥ चंपारी
 पोशाल में मा० बा०, काई सीखो खोटा लंछ भो०
 ॥१४॥ काम छोड़ने घर तणो मा० बा०, काई गप्पो

में प्रवीण भो० ॥१५॥ मैं भोली समझी नहीं मा०
 बा०, मैं जाऊं देखा देखा भो० ॥१६॥ दमडी गोबर
 करणे मा० बा०, नहीं खोसूं मूंगी टेम भो० ॥१७॥
 घर में चरखो कालसूं मा० बा०, गाने 'धीरज' सुं गीत
 भो० ॥१८॥

॥ श्रावण क तीज ॥

॥ पति-पत्नि का संवाद ॥

(तर्ज—हंस-हंस पूछूं बात ढोला)

में थाने पूछों बात ढोला क्यूं तो थे मुलकाया
 हो माने देखने हो राज । कांई थे पूछो बात मरवण,
 रीस न मानो तो कहदूं साची बातने हो नार ॥१॥
 बेगा वतावो बात बाला धीरज तो आ जाय ओ मारा
 जीवने हो राज ॥१॥ पेरण झीणा कापडा गोरी, देख
 हंसे संसार ओ थारा डीलने हो नार ॥ कांई ॥२॥
 खादी मंगदो आय ढोला, तो तज देऊं झीणा निर्लज
 देशने हो राज ॥ में ॥३॥ हाथ में हाथी हाड गौरी,
 डील दुखावण थारो है चूडो सूगळो हे नार ॥ कांई ॥४॥
 हलको करदूं हाथ ढोला, लाख टकारी लादो चमकती
 चूडियां हो राज ॥ में ॥५॥ गेणो गधारो भार गौरी,
 हाथ ह्थकडी ने बेडी पग में मैल है ओ नार ॥ कांई

॥६॥ दोरी वगत में काम आवे, टाबरिया पेरे तो दीसे
 फूटरा ओ राज ॥ में ॥७॥ पूंजी घटे चौरी बढे गौरी,
 टाबरिया पेरे तो मारया जावसी ए नार ॥ कांई ॥८॥
 सहजे छोडूं भार साहब, करसूं अब सिनगार पतिव्रता
 धर्म रो हो राज ॥ में ॥९॥ टाबर मैला दुबला गौरी,
 साखी ने माछरिया काटे सगला हो नार ॥ कांई ॥
 ॥१०॥ रोज नावसुं टाबरों ने, गावा तो पहरासुं वाने
 ऊजला हो राज ॥ में ॥११॥ अम्बल क्यूं दो टाबरों ने,
 नशा सुं मरजासे टाबर मोकला हो नार ॥ कांई ॥
 ॥१२॥ दूध विलासुं टेमयर ढोला, अम्मल तो देवन
 री है सोगन आज सूं ओ राज ॥१३॥ धीरज
 मन हरख्यो घणो गौरी मारी सगली सीख थे हिरदे
 धार ली हो नार ॥१४॥

॥ गौरी रा साहिबा ॥

(तर्ज-मन मोहन साधुजी शुनि)

गौरी रा साहिबा परदेशां बसिया ओ राज ।
 पधारो बालमा शुभ गीतां रा रसिया हो ॥ टेरे ॥
 कागज लिख भेज्या घणा रे, एकण की नहीं पहुँच
 के तो वे पहुँच्या नहीं रे, के घर को नहीं सोच ॥१॥
 थां लारे में छोडिया रे, बाला माय रे बाप ।
 देय दिलासा कागजां रो, छोड़ गया घर आप ॥२॥

ओलूं थारी आ रही, चित्त न पावे चैन ।
 आँसूडा टपकारतां रे, थाका मारा नैन ॥३॥
 बिजलियां चमके घणी रे, गरज रह्यो घनघोर ।
 पिऊ परदेशां जा बस्या रे, प्यारी सुं मुख मोड ॥४॥
 ताल तलैया भर गया रे, बोले दादुर मोर ।
 पपैया प्यू-प्यू करे रे, नेक न भावे शोर ॥५॥
 खोटा खरचा कारणे रे, बैठो बिछवा आप ।
 किरियावर किम काम का रे, धान मिले अठे धाप ॥६॥
 फैशन खरचो पूरवां रे, छोड़ चलया घर नार,
 फैशन ऊपर बिजली रे, क्यों न पड़े करतार ॥७॥
 अंग्रेजी ने धार लो रे, अंग्रेजी तज साज ।
 कल पाओ घर आवता रे, कलपाओ मत राज ॥८॥
 गाती जाती वाट में, बालम मिलिया आय ।
 सोना रा सूरज ऊगियो रे, धीरज मन हरषाव ॥९॥

॥ पत्नी का पति से कहना ॥

(तर्ज—सरोता कहाँ भूल आए प्यारे ननदंया)

अपने दिल री बातां पियाजी सुं पूछ रही, साची-
 साची बातां पियाजी सुं पूछ रही ॥टेरे॥ साची बात
 सुनाऊं साहब जो थे हुकम दिरावो । भूल चूक हो
 जावे स्वामी खामी माफ करावो ॥१॥ में तो बालो

पीहर छोड़्यो लारे आप रे आई । आप कदी भी दिल
 री बातों खोल नहीं दरसाई ॥२॥ पांच बरष परण्यो
 ने हो गया कदई दाय नहीं आई । बात-बात में रूठ
 आप तो राती आंख दिखाई ॥३॥ मारो रंग सांवलो
 थाने निशदिन लागे खारो । आ तो बात हाथ कुदरत
 रे मारो नहीं हो सारो ॥४॥ साथीडो ने साथ लेय ने
 गोठ गूंगरी जावो । उठे बुलावे पातरियों ने जिनरो
 मरम बतावो ॥५॥ हुकम उठाने वाली नारी घर री
 लागे खारी । पर नारी हरनारी धन री किन विध
 लागे प्यारी ॥६॥ बारे पग पड़ गयो आपरो मारा सुं
 नहीं छानो श्री नाथ पछताणो पड़सी धीरज धर नहीं
 मानो ॥७॥

॥ पति-पत्नी का संवाद ॥

(तर्ज—आठ कुआ नव बावडी पणिहारी रे लो)

आयी सावन री तीज ओ मारा प्रीतमजी, मारा
 प्रीतमजी हिंडोलो देवो गलाय साहबजी ॥१॥ हिंडोलो
 पर मत बैठजे गुणवंतीजी, गुणवंतीजी, वाधु काया री
 हिंसा थाय बुद्धिवंतीजी ॥२॥ नीचे पडे तो तन ने लागे
 गुणवंतीजी, गुणवंतीजी हाथ तो पैर टूट जाय बुद्धिवंती
 जी ॥३॥ लम्पटी पुरुष देखे घणागुणवंतीजी, गुणवंतीजी,

नहीं यह कुलवन्ती री रीत बुद्धिवन्तीजी ॥४॥ तीज
 तिवार मती करो गुणवन्तीजी, गुणवन्तीजी । अनर्थादिंड
 हिंसा थाय बुद्धिवन्तीजी ॥५॥ लिलोत्री छेदो मती गुण-
 वन्तीजी । मती जीमो रात्री के मांय बुद्धिवन्तीजी ॥६॥
 व्रत महावीर बारह कह्या गुणवन्तीजी, गुणवन्तीजी,
 दूजा व्रत मती जाण बुद्धिवन्तीजी ॥७॥ उपवास, एका-
 सणा थे करो गुणवन्तीजी, गुणवन्तीजी, आयम्बिल तप
 लेवो धार बुद्धिवन्तीजी ॥८॥ ए व्रत थे नित करो गुण-
 वन्तीजी गुणवन्तीजी, जासो मुगती मझार बुद्धिवन्तीजी
 ॥९॥ मिथ्या पर्व अभी नहीं कहूँ मारा प्रीतमजी,
 प्रीतमजी, सम्यक्त्व व्रत सुखकार साहबजी ॥१०॥
 फाटी गाली मत गावजो गुणवन्तीजी, गुणवन्तीजी । लागे
 दोष अपार बुद्धिवन्तीजी ॥११॥ टूटया कभी मत
 काढजो गुणवन्तीजी, गुणवन्तीजी । नकल करो मती
 कोय बुद्धिवन्तीजी ॥१२॥ गेर कभी मत खेलजो
 गुणवन्तीजी, गुणवन्तीजी । पाप लागे अपार बुद्धिवन्तीजी
 ॥१३॥ पर पुरुषां के तन पर गुणवन्तीजी, गुणवन्तीजी ।
 मत डालो कोई नीर बुद्धिवन्तीजी ॥१४॥ शील व्रत
 में दोष लागे गुणवन्तीजी, गुणवन्तीजी । केई बिगड़या
 लोग बुद्धिवन्तीजी ॥१५॥ पतला कपडा मत पेरजो
 गुणवन्तीजी, गुणवन्तीजी, जो दीसे सारे अंग बुद्धिवन्तीजी

॥१६॥ घणा पुरुष बिगडे घणा गुणवंतीजी, गुणवंती
 जी । मत करो ऐसा सिनंगार बुद्धिवंतीजी ॥१७॥
 सादी-सूदी रेवसुं मारा प्रीतमजी, मारा प्रीतमजी ।
 पालूं में शुद्ध आचार बुद्धिवंतीजी ॥१८॥ जुवा-सट्टा
 मत खेलजो मारा प्रीतमजी, मारा प्रीतमजी । दुनिया
 में इज्जत नहीं थाय साहबजी ॥१९॥ भांग तमाखू मत
 पीवजो मारा प्रीतमजी, मारा प्रीतमजी । इनसुं रोग
 हो जाय मारा साहबजी ॥२०॥ देवालिया कह बत-
 लावसी मारा प्रीतमजी मारा प्रीतमजी । माने आसी
 लाज मारा साहबजी ॥२१॥ परनारी माता गिनो
 मारा प्रीतमजी, मारा प्रीतमजी । करो पर नारी का
 त्याग मारा साहबजी ॥२२॥ इज्जत बढने धन रेबे
 मारा प्रीतमजी मारा प्रीतमजी कुल में लागे न दाग
 मारा साहबजी ॥२३॥ करजो सिर पर मत करो मारा
 प्रीतमजी, मारा प्रीतमजी । उलटा व्यापार दुःखदाय
 मारा साहबजी ॥२४॥ होली रो गीत मत गावजों
 मारा प्रीतमजी मारा प्रीतमजी, मती खेलो होली रो
 फाग मारा साहबजी ॥२५॥ सत पुरुषां रा काम नहीं
 मारा प्रीतमजी, मारा प्रीतमजी । यह रूलियारां काम
 मारा साहबजी ॥२६॥ माता-पिता री सेवा करो मारा
 प्रीतमजी, मारा प्रीतमजी, गुरुजीरा सुनो व्याख्यान

मारा साहबजी ॥२७॥ एक सामायिक नित करो मारा
 प्रीतमजी, मारा प्रीतमजी, मारा प्रीतमजी सुघर
 जावेला जमार मारा साहबजी ॥२८॥ ओ शिक्षण
 दिल धार लो मारा प्रीतमजी, मारा प्रीतमजी । सुघर
 जावेला जमार मारा साहबजी ॥२९॥ शुभ गीतां रा
 पुस्तक बाचजो मारा प्रीतमजी, मारा प्रीतमजी ।
 सायरकँवरजी देवे उपदेश मारा साहबजी ॥३०॥

॥ बहन भाई को समझाती है ॥

(तर्ज—छोटी मोटी सुइयों रे, जाली का मेरा)

छोटे मोटे भाइयो रे सुनो ये मेरी अर्ज को ॥टेरा॥
 एक दुःख पाया तुमने, फैशन के राज में, हाँ फैशन के
 राज में । आमदनी से खरचा बढ़ाया सर पर चढाया
 कर्ज को ॥१॥ एक दुःख पाया तुमने, फूट के राज हाँ फूट के
 राज में । आपस में कर तकरार, कराया अपने हर्ज
 को ॥२॥ एक दुःख पाया तुमने अंधी श्रद्धा के राज में ।
 जन्तर मन्तर कराया, बढ़ाया अपने घरज को ॥३॥ एक
 दुःख पाया तुमने, जुए के राज में । धोखे से गये
 ललचाय, भुलाया अपने फर्ज को ॥४॥ एक दुःख पाया
 तुमने, पंचों के राज में । रूढी के जाल फँसाय, करावे
 अपनी राज को ॥५॥ अब सुख पाओ शुभ, गीतों के
 राज में । हरषाकर श्रीनाथ, सुनाओ मीठी तर्ज को ॥६॥

॥ नशेबाज ॥

(तर्ज सीता माता की गोद में हनुमत डारी)

खोलो नशेबाज की पोल सभा के सामने जी
॥ ढेर ॥ पहले खोवे घर की लाज, कहलावे है नशेबाज ।
वर्णन सुन लो उनका आज, सारा बिगड़ गया है समाज
नशे के कारणे जी ॥१॥ देखो लाल आँख का रंग,
समझो पी ली उसने भंग, जिसके घर वाले है तंग,
बिगड़ा सदाचार का ढंग नशे के कारणेजी ॥२॥ आयी
ऐसी आखा-तीज, वो गई निर्धनता का बीज, अम्मल
महंगी खारी चीज, पूँजी सभी गई है छीज नशे के
कारणेजी ॥३॥ पी कर आये खूब शराब, पड़ गये
नाली बीच जनाब, कुत्ता कर गया मुँह पेशाब । समझे
चरका आया ख्वाब नशे के कारणे जी ॥४॥ गाँजा
चरस और कोकेन, सुलफा पी कर खोये नैन, रोते ऋण
कारण दिन रेन । गाकर समझाता श्रीनाथ नशे के
कारणेजी ॥५॥

॥ बहनों की शिक्षा ॥

(तर्ज—तुम तो भले विराजोजी)

बहनो बेगी चेतो ए, साची आ सीखामण ॥ बहनो ॥ढेर॥
मूरखता में रहनां बहना, बिगड़ गया सब कार
अब तो थारी हुई जरूरत, हो जाओ तैयार ॥१॥

विनय छोड़ सासू ननदां सुं, घणी मचाई राड़ ।
 धरम करम री बातां भूली, गाकर फाड़ कुफाड़ ॥२॥
 मंतर डोरा मादलिया कर, बाबाजी ठग जावे ।
 भेम घाल पाखंडी थाने, अपने जाल फसावे ॥३॥
 डाकणियां चूडेला केरो, झूठो घाले भेम ।
 थे भोली डर जावो विरथा, तोड धरम रो नेम ॥४॥
 मिनख पुराणा चवडे कहवे, थाने पगरी जूती ।
 ओ अपमान सहकर बहनों, कब तक रहोला सूती ॥५॥
 थे भणियोडी नहीं होवण सुं, ऐडी होवे बात ।
 ज्ञानवान गुणवंती होयने, खरी बतावो जात ॥६॥
 आंधी सरदा मांहे रहता, गया घणा दिन बीत ।
 अब तो शुभ गीतां री पोंथ्यां, पढ़ मेटो कुरीत ॥७॥
 लाज धरम मर्यादा रख कर, सुरीतां लो धार ।
 इणसुं थारो मान बढेला, और बचेला मार ॥८॥
 भणी-गुणी बहनां रे नेडा, लुच्चा कदी न आवे ।
 वे धीरज धारण कर मनमें, पति प्रेम उर लावे ॥९॥

✽ चरखा ✽

(तर्ज-जोधाणा ने पाली बीच में लांबी सडकों घाली रे ।)
 हां रे मांडो अरटियो, सीखामण साची रे ॥१॥
 पाछो मांडो अरटियो, क्यूं खूंटी माथे धरियो रे ।
 अरटियो तो देश रो, उपकार करियो रे ॥२॥

ठाला बैठा मानवियों ने, ऊंदा काम सूजे रे ।
 कामरा करंता ज्यां ने लोग बुझे रे ॥२॥
 काठा गाबा पेरे ज्यां रे, घर में लाभ होवे रे ।
 जीणा कपड़ा पेरंता तो पूंजी खोवे रे ॥३॥
 गायां रे चरबी री पण जिण रे मांय लागे रे ।
 पाप रो तो लेखो जिण रां, होसी आगे रे ॥४॥
 सात महीना करसा सारा बैठा निकम्मा रेवे रे ।
 साठ क्रोड रो घाटो वरसा वरसी सहवे रे ॥५॥
 धोरज धारो देश सुधारो, अंगरेजी ने धारो रे ।
 बालो लागे अरटियो आंखों रे तारा रे ॥६॥

॥ चोखी रीतां ॥

(तर्ज-लाल केश्या थारे मारे कदरी परीत रे ।)

पिऊजी मारा चोखी-चोखी रीतां रो परचार रे,
 वेगो करोनी भारत देश में ॥टेरे॥ पिऊजी मारा
 छोटा-छोटा टाबरां रा विवाह रे, किकर करे है मायत
 हाथ सुं ॥१॥ पिऊजी मारा काची-काची कूपलियां ने
 तोडतां, फल पावण री आशा क्यो करे ॥२॥ पिऊजी
 मारा हंसे-हंसे सब संसार रे, मानो परणाया दूला
 दूलियो ॥३॥ पिऊजी मारा करे करे पोतां री आश रे ।
 काचा वीर्य सुं कांई काम है ॥४॥ पिऊजी मारा बूढा-

बूढा डोकरां रा व्याव रे, लोभी मायत भरे थैलियां ॥५॥
 पिऊजी मारा छोटी-छोटी छोरियाँ डुबाय रे । बूढा
 मरियां सुं विधवा हो रही ॥६॥ पिऊजी मारा छाने-
 छाने गर्भ गिराय रे, भ्रूण हत्या रा पाप मोट का ॥७॥
 पिऊजी मारा डूबे-डूबे जिणसुं देश वे, सांच कहूँ तो
 शरमां मरुं ॥८॥ पिऊजी मारा देखे-देखे पातरियाँ रा
 नाच रे, जिणसुं बिगाडो हुआ देश रो ॥९॥ पिऊजी
 मारा फ़ैले-फ़ैले घणो व्यभिचार रे । रोग तो इतरा के
 गिनती नहीं ॥१०॥ पिऊजी मारा रोवे-रोवे नार
 हलियार रे, गरमी ने सुजाक ज्थों रे हो गई ॥११॥
 पिऊजी मारा फाटा-फाटा फागण रा गीत रे । भूंडा
 घणा है लाल केशिया ॥१२॥ पिऊजी मारा बिगडे-
 बिगडे छोटा बाल रे, सीखे लुगाईयां खोटा लंछ ने ॥१३॥
 पिऊजी मारा कहतां-कहतां छाती घबराय रे, सारा
 दोषां री गिनती नहीं हुए ॥१४॥ पिऊजी मारा चेतो-
 चेतो भारत डूबो जाय रे, अभे सोया सुं भूंडी
 लागसी ॥१५॥ पिऊजी मारा खोटा-खोटा पंच करे
 न्याय रे, पोल उघाडो वारी पलक में ॥१६॥ पिऊजी
 मारा सुनो-सुनो सारा शुभ गीत रे, दस मंगादो मारा
 भाग ए ॥१७॥ पिऊजी मारा मिले-मिले जोधाणां रे
 मांय, जैन ऐतिहासिक ज्ञान भण्डार में ॥१८॥ पिऊजी

मारा धन-धन धीरज आपने, गीत सुधारक सांचा
देश रा ॥१९॥

॥ वेश्या निषेध ॥

(तर्ज-मोटर होले-होले हाक ड्राइवर मेरा मन)

में थने बार-बार समझाऊं बालम पातर रे मत जाय ।
वेश्या रे मत जाय थाने लेवेला विलमाय ॥१॥
खानदान अति उत्तम थारों, चालो चोखो चाल ।
पातरियां रे परवश पडियां, होवेला बे हाल ॥२॥
मींडी लागे कुल रे माथे, लोग आंगली काढे ।
बडेरों रो बट्टो लागे, जातां रास्ते आडे ॥३॥
प्रीत करे धनवान पुरुष सुं, झूठो प्रेम दिखाय ।
माल उतारे मुलक-मुलक ने, चूँट-चूँट ने खाय ॥४॥
पैसा जद नहीं पास रहे तद, सांमी भी नहीं भाले ।
तोतावाली आंख पलटने, जूता मार निकाले ॥५॥
कंचन काया माटी होवे, लागे खोटा रोग ।
गरमी ने सुजाक हुवां सुं, हंसे देख के लोग ॥६॥
भोला मिनख भरम में पड़ने, पहले देखे नाच ।
नेणांरा टमकारा सेती, फँसे कहूँ मैं साच ॥७॥
कूण-कूण सारंगी पूछे, तबला दे धिक्कार ।
हाथ काढ पातर बतलावे, सांभलो सरदार ॥८॥

पति रहे पातरियां मांहि, पतिन मदन सतावे ।
जोबन झिलती कामणियां ने, कीकर 'धीरज' आवे ॥८॥

॥ दारूडे की चाट ॥

(तर्ज-मारे छेल भवर रो कांगसियो पणिहारी)

मारा प्राणनाथ ने समजाऊँ दारूडो छोडो जी ॥८॥
दारूडो मारूजी छोडो, भूँडो भूँडो बासे रे ॥१॥
सडियोडा मूँडा सुं होवे, कीकर पीयो जावे रे ॥२॥
दारूडो पिया सुं कालो मिनख तुरंत हो जावे रे ॥३॥
तांगी खातो होवे नागो, खाली में पड़ जावे रे ॥४॥
आय कूतरो मूँडा मांहि, सूँघ मूत कर जावे रे ॥५॥
अकल भ्रष्ट होने से पागल, चरको स्वाद बतावे रे ॥६॥
माय बहु बहनों बेटो ने, एक नजर थी भाले रे ॥७॥
बल बुद्धि ने रूप डील रो, पीतां प्राण गमावे जी ॥८॥
दिन भर दोरी करो मजूरी, घर पैसा नहीं लावोजी ॥९॥
धूजे टाबर नागा रेवे, पूरो धान न पावे जी ॥१०॥
पैसारो पेशाब लेयने, ठेके में पी आवो जी ॥११॥
खोटा खत में दसखत करदो, लारा सुं पछतावोजी ॥१२॥
नशा रे परवश पडियां सुं, होवे खून खराबीजी ॥१३॥
जो थे चाबो देश सुधारो, मारी विनंती मानोजी ॥१४॥
धीरज धर समझाऊँ बालम, मानो सोगन ले लोजी ॥१५॥

॥ करजा ॥

(तर्ज-कमतीवाले)

करजे के कारण क्रोडों को, भारत में नोंद न आती है । करना नहीं काम सुहाता है, रोटी नहीं पूरी भाती है ॥१॥ करजे कर जेवर बनवाते, वश होकर के नर-नारी के ॥ उन लोगों के घर में आफत, नित बिना बुलाये जाती है ॥१॥ बिन काम का सौदा करजे से, आसानी से मिल जाता है । फिर ब्याज का पैसा बढ़ने से, दूनी लागत लग जाती है ॥२॥ बिन रोकड़ पैसे चार जगह, नहीं देख सके वे मन चाही । रद्दी चीजें महँगी कीमत से, उनके सिर चिप जाती है ॥३॥ देखा-देखी करते खरचा, चरचा जब चलती ब्याहों की, क्या कमती खरचा करने से, कहीं नाक किसी की जाती है ॥४॥ आमद कमती खरचा ज्यादा, क्योंकि नहीं बजट जमाते है । जब लेनेवाला आता है, दिखता वह उनको घाती है ॥५॥ करजे का कितना कष्ट महा क्या कलम विचारी कह सकती यह भुक्त भोगी ही जानत है, जिनकी दाझीयां छाती है ॥६॥ करजे को जड से काटन की, मैं युक्ति सरल बताता हूँ । पहले छोटे सब करजों को, देने से आफत जाती है ॥७॥ फिर बड़ें करजे वालों को कुछ, तुम मूल सहित देते

जाओ श्रीनाथ फिर नया कर्ज न लो, तो पारगती हो जाती है ॥८॥

॥ खोटी रीत निपेध ॥

(तर्ज—बुरा गीत मत गावजो थाने वरजूंला)

खोटी रीतां राखतां, थाने वरजूंला ।

जो गावोला 'शुभगीत' कदी नहीं वरजूंला ॥८॥

बेटी-बेटा बेचंता थाने वरजूंला ।

काई जिनसूं लागे लंछ ॥१॥

बूढा ठाडा व्यावतां थाने वरजूंला ।

काई जिनसूं विधवा होय ॥२॥

मौसर नुक्ता जीमतां थाने वरजूंला ।

काई काम कूतरा जोग ॥३॥

भोजन ऐंठो नाखतां थाने वरजूंला ।

काई होता विरथा हाण ॥४॥

पातरियां नचावतां थाने वरजूंला ।

काई जिससूं बिगडे देश ॥५॥

फाटा गीत सुनावतां थाने वरजूंला ।

काई निर्लज होवे लोग ॥६॥

भाग तमाखू पीवतां थाने वरजूंला ।

काई होवे रोग अपार ॥७॥

कोरट झगडा ले जाता थाने वरजूला ।

काई भूंडा कहसी लोग ॥८॥

शोर फटाका छोटतां थाने वरजूला ।

काई जिणसू लागे लाय ॥९॥

खरच अणूतो करतां थाने वरजूला ।

काई करजो जिणसू होय ॥१०॥

झीणा कपडा पहरतां थाने वरजूला ।

काई जिण थी जावे लाज ॥११॥

नाटक थेटर देखतां थाने वरजूला ।

काई जिणसू हाण अपार ॥१२॥

मोटा मगता पालतां थाने वरजूला ।

काई सुंड मुसडा होय ॥१३॥

भोजन करतां रातरा थाने वरजूला ।

काई होवे पाप अमाप ॥१४॥

घी खिचडियाँ खावतां थाने वरजूला ।

काई जाकर काण मुकाण ॥१५॥

टाबर नहीं भणवतां थाने वरजूला ।

काई रह जावे वे ठोठ ॥१६॥

मंतर डोरा करावतां थाने वरजूला ।

काई जूठो फैले भेम ॥१७॥

रीत सुधारो देश री नहीं वरजूला ।

काई गा करके शुभ गीत कदी नहीं वरजूला ॥१८॥

आज्ञा पति री पालतां नहीं वरजूला ।

काई पूजोला श्रीनाथ कदी नहीं वरजूला ॥१९॥

॥ संधारा का स्तवन ॥

(तजं—भाव घरी नित्य पालजो ।)

संधारो प्यारो घणो, रत्न चिंतामणि जेम हो
भवियन । पांचवी गतिना पामणा, हीरा जड़िया हेम हो
भवियन ॥१॥ कायर रो काम छे नहीं, सूरा सन्मुख
थाय हो भवियन । पंडित मरण प्रताप से, जन्म-मरण
मिट जाय हो भवियन ॥२॥ आहार-पानी आदरे नहीं,
नहीं करे मुख से हाय हो भवियन, तन-धन ममता
त्यागने, जीव राशि खमाय हो भवियन ॥३॥ करो
विशुद्ध आलोचना, लगा दो मुगती सुं ध्यान हो भवियन ।
ऐसी देवो मुझ ने वीरता, हो जावे परम कल्याण हो

भवियन ॥४॥ सूरी रो जाया हो तो सूरमा, करे ऐसो
काम हो भवियन, समण हजारीमल इम कहे, फिर नहीं
आवे गर्भवास हो भवियन ॥५॥

॥ पूज्य गुरुदेव श्री अमोलक ऋषिजी महाराज ॥

॥ साहब का गुणगान ॥

(तर्ज—कमली वाले की ।)

सुयश जग में छाय रहा,
पूज्य अमोलक ऋषिजी स्वामी का ।

दुनियां में गुण गाय रहा,
पूज्य अमोलक ऋषिजी स्वामी का ॥१॥

लघु वय में दीक्षा ले करके,
किया बोध बत्तीसी सूत्रों का ।

प्रसिद्ध हुआ जग बीच रहा,
पूज्य अमोलक ऋषिजी स्वामी का ॥२॥

ऋषि सम्प्रदाय में शोभित हो ।

जिम तारागण में निशिमणी हो ।

बीज कला ज्युं यश फैल रहा ।

पूज्य अमोलक ऋषिजी स्वामी का ॥३॥

मन मोहन मूरत आप तणी,
हो बालब्रह्मचारी स्वामी ।

और चेहरा दमक-दमक करता,
पूज्य अमोलक ऋषिजी स्वामी का ॥४॥

कर करके गमन भूमण्डल में,
खूब धर्म उद्योत किया ।

गुण युक्त नाम है इस जहाँ में,
पूज्य अमोलक ऋषिजी स्वामी का ॥५॥

है जैन धर्म के विचक्षण ।
श्रोता सब ध्यान लगा सुनलो ।

मैं आशीर्वाद चाहती हूँ ।
पूज्य अमोलक ऋषिजी स्वामी का ॥६॥

